

وهو

رامي أحمد

رواية: وهم
المؤلف: رامي أحمد

تدقيق لغوي: لخضر بن الزهرة
تنسيق وإخراج داخلي: لخضر بن الزهرة
تصميم الغلاف: عبير محمد طوسون
رقم الإيداع: 2019 / 25720
الترقيم الدولي: 3-6-85607-977/978
الطبعة الأولى: 2019
رئيس مجلس الإدارة: أ. د. محمود محمد السعيد
المدير العام: هالة البشبيشي



بريد إلكتروني: info@alhalapublishing.com

تليفون : 01110161117

العنوان: 26 ش 261 المعادي الجديدة

صفحة الفيسبوك: مركز الهالة الثقافي

<https://www.facebook.com/alhalapublishing>

جميع حقوق الطبع والنشر محفوظة للدار، ولا يحق لأي شخص أو مؤسسة أو جهة إعادة إصدار هذا الكتاب، أو جزء منه، أو نقله بأي شكل من الأشكال، أو وسيلة من وسائل نقل المعلومات، ولا يجوز تداوله إلكترونياً نسخاً أو تسجيلاً أو تخزيناً، دون إذن خطي من الدار.

جميع الآراء الواردة في هذا الكتاب تعبر عن رأي كاتبها، ولا تعبر بالضرورة عن رأي دار النشر.



(رواية)

رامي أحمد

تمهيد

بعبق الخدر المتسلل عبر عروقي استرخيت مغمضاً عيني، ينفلت من بين أصابعي مبضع خلا إلا من بقايا المحلول الأبيض فيه؛ ليستقرّ في النهاية بين قدمي على أرضية السيارة المنطلقة بأقصى سرعة تلتهم الطريق المفتوح أمامها... كلُّ الأصوات والموجودات في لحظة من حولي تلاشت؛ وكأنها برهة سكون، انفرجت بعدها -على صورة من وحي عقلي- كلُّ أبواب الخيال.

الهواء البارد المتدافع من النافذة المفتوحة إلى جواري يستقبل وجهي مستمتعاً للطماتة، الكون! يبدو أكثر رحابةً من المعتاد، وكذلك تبدو أنفاسي؛ مؤهلةً لاحتوائه.

هذا الطيرُ الصغير الأزرق في الأفق من خلف سحبٍ رماديةٍ بدد بجناحيه تكاثفها؛ رأيتُه، يحلق مقترباً مني، ولا يفصل بيننا غيرُ فراغ، ألُوْحٌ له بذراعين؛ فردتهما للحد الأقصى متغاضياً عن يدٍ من العدم امتدت لتجذبني، وصرخات محذرة لم أعرها أدنى اهتمامٍ قبل لحظات من دوي ارتطام مرتفع؛ رَجَّ كل كياني معه.

شظايا الزجاج المهشّم كذرات لؤلؤ تناثرت حول جسدي السابح في الهواء كعصفورٍ تحطم قفصه، مصابيح السيارات تعكس في عيني ميضاً أشبه بعدسة مصورٍ محترفٍ؛ يلتقط أروع ما في اللحظة، بينما

الإطارات المكبوحه؛ صرير تشبثها بالأرض يصدح مبحوحًا كهتاف
ألف مشجع، خطوط الأسفلت المتوازية تقترب في سرعة مني،
وتستقبلني بارتطام أول.

لم أجد يومًا لمذاق الدم فوق شفتي مع ارتدادة الصدمة الأولى
نكهة ارتياح كتلك، طنينٌ يغلف الزمنَ الواقف من حولي، ويمنحني
الوقت لرؤية التفاصيل، صبغة اللون الأحمر التي طلّت كل شيء مع
صدمتي التالية بالأرض تبدو كجحيم في قلبه؛ أرحفُ متجاوزًا سيارة
على جنبها انزلقت، يتبعها خيطٌ من اللهب انعكس شرره كشعلات
احتفال بنهاية تقترب.

الظلمة تسود، والألم يساورني مع ذلك الخيط الضبابي المتشكل
من جزءٍ تبقى في وعيي يرسم بدقة ملامحها؛ ذات الشعر الحريري
الفاحم، والابتسامة الشبيهة ببحر أدمنت الغرق في أعماقه! كالموت
كانت، أو كأن الموت هي... ساكنٌ مهيمٌ على خط النهاية الزاحف أنا
نحوه، يقف متأملًا في شغف اقترابي الذي تسيدَ كلَّ شيءٍ دونه سوادٌ
حالك، وينتظر...

– شريف؟

– شريف، إنت معايا؟

بهدوء تسلل صوته الرخيم الهادئ عبر ذكرياتي فانتزعتني منها
إليه...

على مقعدٍ جلدي في مواجهتي داخلَ مكتبه الدافئ جلسَ؛ ستيئيُّ
نحيل حاد القسمات، تراجعت خصلاتُ شعره الرمادية عن مقدمة

رأسه، وبانت عيناه المختبئتان خلفَ عوينات سميقة ترصدان شروءًا
سيطر على قسماتي، وجعلني أشبهَ بتمثال جامد من الشمع.

أطرقت الرأس صامتًا أمامه لا ألوي إجابةً بعينها، ثم درت بعينيَّ
في أنحاء المكان لتستقرَّ في النهاية على الشريحة المعدنية المستقرة
فوق المكتب الخشبيِّ الأنيق حاملةً اسمه: الدكتور إبراهيم أبو المجد،
استشاريُّ الطب النفسي وعلاج الإدمان.

باب الحجرة المواربِ على كلينا تسللت عبر فرجته نسماتٌ
حُمِلت برائحة العشب الندي مع صوتٍ مرشات المياه التي انطلقت
تنثرُ رذاذها الصباحيَّ المعتاد في حديقة المكان الخارجية... ها أنذا
اليومَ في مركز العلاج التأهيلي، وبعد ثلاثة أشهر انقضت؛ أصبح
على صبحٍ أخير، مضطربًا كنت، يخامرني ارتباك النهايات، وتحتشدُ في
رأسي كافةُ المواقفِ وكل الصور.

مرةً أخرى قاطع هو شرودي متممًا بسؤاله:

– سرحت ف إليه؟

بلسانٍ مضطرب كخواطري أجبته:

– مش عارف!

لا يبدو سهلًا تحديد المسار فوق خريطةٍ تغيرت تفاصيلها، وبات
كل ما فيها يختلف، هذا أنا الذي غيره التعافي، ولم يعد بعد تسعينَ يومًا
كما كان... عجيبٌ هو الوقت! بمروره يغدو المؤلف صعبًا تمييزُهُ.

بابتسامة بسيطة لاحت على وجهه أمام ردي المقتضب تنهدَ،

وسحب من هواء الحجرة نفسًا عميقًا ملأ به صدره، ثم أفصح:

– الماضي اللي بتحاول تنساه سايب فيك لسه أثر.

لم يدرك لحظتها لأي مدى كانت دقيقةً عبارته، لم يدرك كيف أصاب بقوله حقيقةً ما يجول في عقلي الذي استعاد طيفَ حدثٍ قبل ثلاثة أشهرٍ وقع، مغيبًا فاقد الوعي إثر حادثة مميتة نُقلت إلى هذا المكان، محمولًا في عربة إسعاف علا فوق صوت أبواقها نحيبٌ أمي التي اصطحبتني كما قالوا، كانت تائهةً الوجدٍ تجاوب استفساراتهم جميعًا بالبكاء، وعم حسن؛ ذلك المترهل صاحب الجسد المشعَّر كان جنبها يستجدي بالتربيت فوق كفيها كليهما بعض الهدوء.

– لمدة خمس أيام فضلت محجوز عندنا في المكان، واحنا منعرفش عنك أي حاجة.

نطق بها الدكتور إبراهيم مستسلمًا بدوره لومضات من البارحة انبثقت في عقله، كان يتخذ من التهديدات بين كلِّ عبارة وأخرى مجالًا لاستعادة الصورة في خياله بشكلٍ أوضح.

– والدتك مكانتش عارفة تتكلم، وكل اللي عرفناه من كمية الجروح اللي على جسمك، وكلام الراجل اللي جه معاها يومها إنك اتعرضت لحادثة على الطريق السريع، وإنهم في المستشفى لقوا نسبة كبيرة من المادة المخدرة في دمك.

صمت قليلًا ليتنهد مرةً أخرى وهو ينظر باتجاهي ثم تابع:

– نسبة المخدرات اللي كنت واخدها مع علاجات التسكين

والمهدئات اللي ادوهالك في المستشفى كانت مؤشر كافي لأنك مش هتستعيد وعيك في فترة قصيرة، ودا خلاك محتاج متابعة خاصة ورعاية غير مضمونة النتائج، بس مع ذلك إحنا في المكان هنا مرفضناش نستقبل حالتك غير المستقرة، مع اتفاق ضمني بان الأسرة هنتواصل معنا خلال أيام عشان نعرف منهم تفاصيل أكثر عنك قبل ما نبدأ مراحل العلاج الفعلي.

نهض من فوق كرسيه أمامي متجهًا بجسده النحيل وخطواته الرزينة إلى ما خلف المكتب ليلتقط من درج فيه ملقًا؛ أخرجته قبل أن يفتح أول صفحاته متطلعًا على التاريخ المكتوب على رأسه قائلًا:

– يوم التلات، 19 يناير 2017، بعد خمس أيام بالظبط من حجزك هنا في المكان، كان تاريخ أول جلسة أسرية جمعت بيني وبين أسرتك يا شريف، وأول يوم أعرف حقيقي الشخص اللي محجوز عندي في المصححة يبقى مين.

قالها، فاعتدلت في جلستي أمامه مستجديًا سرد المزيد، سيتحدث عن البداية الآن، ولديّ ما يكفي من الفضول لأسمعه.

«من حيث انتهينا دائمًا؛ تبدأ الحكايات».

البداية: الثلاثاء، التاسع عشر من يناير 2017...

صباحٌ ملبَّدٌ بالحنق استقبل به الدكتور إبراهيم كل شيء حوله في طريقه المزدحم من المنزل وحتى مركز التأهيل الذي التقته على أعتاب بوابته الحديدية تلك السيارة ذات الأرقام الدبلوماسية المميّزة، وبنفاد صبرٍ علقَ يده فوق آلة التنبيه على المقود أمامه ليظهر إثر صرخها المزعج حارس البوابة العجوزُ بجلبابه الأبيض وهو يتجه نحوه رافعًا يده بالتحية متمتمًا:

– صباح الخير يا دكتور.

بعصبية صاح به إبراهيم:

– إيه ده يا عم راضي؟ مين اللي سايب عربيته في وش المدخل بتاع المكان كدا؟

لم يبدُ على الرجل أنه سمعه وهو يمدُّ سبابته نحو أذنه لتثبيت السماعات الطبية الرديئة فيها، فرفع الأخيرُ صوته مرةً أخرى مكرّرًا:

– بقولك مين اللي ركن العربية دي هنا؟

– أه يا دكتور، دي عربية بتاعت أهل نزيل عندنا هنا، بيقولوا إن عندهم جلسة مع حضرتك النهار ده، السواق اللي معاهم

ركنهما قريب بسّ عشان معاهم ست كبيرة حركتها ثقيلة شوية،
ثواني هاروح أندّه عليه يجي يحركها.

متململاً مطّ إبراهيم شفتيه وهو يتابع ببصره الحارس الذي رحل
مختفياً في مدخل المكان قبل لحظات من ظهور ذلك الخمسيني الأسمر،
والذي بدا بزيتّه الأزرق كخادم من خدم العائلات الأرستقراطية في
حقة السبعينات، لا ينقصُ من الصورة لاكتمالها غير قبةٍ لم يكن
يعتمرها، بات بديلاً عنها شعره الخشن المصقّف رغم ذلك بعناية...

رفع كفه بإشارة اعتذار لمنتظره قبل أن يدلف إلى سيارته،
ويتحرك بها مبتعداً من أمام البوابة التي دفع الحارسُ العجوز بصعوبة
درفتيا مفسحاً الطريق أمام إبراهيم وسيارته للدخول... كانت فيلا
بحديقة واسعة، يحفُّ أركانها الأربعة سورٌ طوبي مرتفع، بُنيّ بعرض
أحد أضلعه مبنى ثانوي عريضٌ من طابق واحد.

لأمتار قليلة إلى الداخل تحرك إبراهيم بسيارته حتى سلم
المدخل، قبل أن يترجلَ منها ليصعدَ درجاته المعدودة، متجهًا نحو
مكتبه عبر شرفة المكان؛ التي انتظره على مقاعد الانتظار المعدنية
فيها أربعةٌ، لم يميز منهم سوى ذات العباءة التي رآها من قبل... وجومٌ
عجيب خيم على ملامحها أمامه، وهو يقطع المسافة المتبقية بينه
وبينهم، والتي دارت عيناه خلالها في وجوه الجميع.

– دكتور إبراهيم كويس إنك وصلت، أهل النزيل هنا مستنيينك
بقالهم نص ساعة.

نطق بها أحدُ مسؤولي الاستقبال المعيّنين لديه في المكان وهو

يقترّب منه بخطواتٍ واسعة قبل أن ينحني على أذنه هامسًا بصوت خفيض.

– واضح يا دكتور إنو في بينهم مشاكل كبيرة، مبطلوش خناق مع بعض من ساعة ما وصلوا.

عقد إبراهيم حاجبيه مواصلاً طريقه وهو يومئ برأسه علامة التفهم، ثم تمتم مرجّبًا بتلك الأخيرة التي نهضت لاستقباله قائلاً:

– باعتذر عن التأخير يا مدام وداد، متهيألي الذاكرة مخانتنيش في الاسم؟ صح كدا؟

هزت صاحبة العباءة رأسها في حين تدخلت تلك العجوز الجالسة على كرسي يجاورها بمسافة تسأل:

– حضرتك لو الدكتور المسؤول هنا في المكان يا ريت تطمئنًا على حالة ابننا اللي عندك.

كانت سبعينيةً، لم تغز التجاعيد ملامحها كما فعلت بشعرها الذي اقترب في بياضه من لون الثلج، تدلُّ حمرة وجهها على نظام غذائي محكم، وتوحي ملابسها المنمقة وعصاها الخشبية السوداء بالعرفق الذهبي المزخرف لحناياها بوضع اجتماعي ومادي مرموق.

– ابننا؟

بلكنة مستنكرة نطقها وداد قبل أن تتابع بفرط عصبيتها الواضحة:

– ابنك مين يا ست انتي؟ ابنك الحيلة قاعد جنبك هنا أهو،
ويا ريت تاخدوا بعض وتمشوا انتي وهو وتسيبونا في حالنا،
عايزين مي إيه تاني؟ كفاية لحد كده! كفاية!

كانت تتحدث بانفعال مقاومةً رغبتها القوية في ذرف الدموع،
بينما استقبلت الأخيرة كلماتها أمام الجميع بنظرة باردة رفعت معها
حاجبها قبل أن تلتفت إلى الأربعيني صاحب الحلة السوداء والذي
اكتنف التوتر والحزن قسماته برغم محاولته لتهدئتهم قائلاً:

– اهدي يا أمي من فضلك، اهدي يا وداد، الظرف اللي احنا فيه
أعتقد إنه مش مستحمل أي نرفزة أو مشاحنات.

بصنعة البرود أجابته السيدة السبعينية وهي تحاول إخفاء غضبها
بحكمة:

– إنت شايف مين اللي بيتعامل بنرفزة دلوقتي؟

كان الدكتور إبراهيم واقفاً يتابعهم في صمت، منتبهاً في تلك
اللحظة فقط إلى ضخيم الجثة الواقف على بعد منهم بمقيصه الرث،
والذي احتلت هالات العرق معظم أجزائه، لقد رآه قبلاً مع صاحبة
العباءة يوم وصول الحالة في سيارة الإسعاف، يبدو الآن وكأنه
يتحاشى نظرات الجميع نحوّه، وبالأخص هي، كانت في لحظتها تنظر
إليه متممةً بكل حنق الدنيا:

– ليه كدا يا حسن؟ ليه؟

لم تلقَ جواباً منه لسؤالها سوى رأس مطرق، وعين أشاح بها

عنهم في صمت استثمره إبراهيم للعودة بهم إلى سؤال السيدة العجوز
وإجابته:

– أيوه يا فندم، مبدئيًا أنا بالفعل الدكتور المسؤول هنا
وصاحب المصححة في نفس الوقت، وتاني حاجة عايزكو تظمنوا
على ابنكم وتتعاونوا معنا بشكل جيد وكل شيء هيفكون بخير.

اندفع صاحبُ الحلة السوداء يسأله:

– هينفع نشوفه النهار ده يا دكتور؟

لم تخفَ عن إبراهيم تلك النظرة المتنمرة التي رمقت وداد بها
سؤاله بينما هو بيتسّم في وقارٍ للسائل قبل أن يرد:

– النهار ده لأ، مش هينفع تشوفوه، إلا لو حضراتكو طبعًا
مش مقررین تكمّلوا علاجه التأهيلي عندنا، لأننا طبقًا للنظام
العلاجي اللي ماشيين عليه في المكان؛ مينسمحش للأهالي برؤية
التزليل غير في جلسة المواجهة اللي بتتم بعد اليوم الواحد
والعشرين، ده أولًا، تاني حاجة، معتقدش إن ده هيفيد؛ خاصةً
وإنه لسه مفاقش من حالة اللاوعي اللي دخل هنا بها.

طيفٌ من الراحة احتل موقعه على وجه وداد بعد إجابة الدكتور
إبراهيم، قبل أن يستطرد حديثه معهم مستبقًا أي سؤالٍ قد ينبع من
عقل أحدهم بنبرة عملية اعتادها:

– بالنسبة للنهار ده إحنا جاينين عشان نعمل جلسة أسرية
ندرّش فيها عن شوية معلومات بخصوص الحالة، ودا في

اعتقادي محتاج نوع من تمالك الأعصاب أنا مش شافيه
للأسف بينكم، فلو حايين نلغي الجلسة النهار ده أنا معنديش
مانع؟!

أخرجت كلماته الحازمة بعض الموجودين في حين تتمم من بينهم
صاحب الحلة السوداء بصوت خفيض:

– لا مفيش داعي يا دكتور، لو الجلسة في مصلحته يبقى الأفضل
نعملها النهار ده.

هز إبراهيم رأسه أن جيد، ثم أكمل الطريق نحو باب المكتب
مشيرًا إلى مساعده الذي تبعه وعلامات الإعجاب من أسلوب رئيسه
جليةً فوق ملامحه.

– بلغهم يا عاطف يحضروني فنجان القهوة بتاعي، وابتعت
حد يشوف الناس هنا تشرب إيه قبل ما تدخلني الأستاذة وداد
ووالد الحالة بس للمكتب عشان نبتدي الجلسة.

قالها وهو يدير المقبض بيديه ليفتحه قبل أن يرتفع في استنكار
استوقفه صوت السيدة العجوز وهي تهتف:

– إزاي والده ووالدته بس يا دكتور؟ يعني أنا جدته هفضل
قاعدة برة هنا بعمل إيه؟

خطى بقدميه إلى داخل المكتب قبل أن يلتفت نحوها ليمنحها
اعتذارًا عابرًا بعينيه وهو يكرر في ذات اللحظة لمساعدته:

– الأب والأم بس يا عاطف، مش محتاج في الجلسة زيادة عن

الأتنن ءول.

قالها بنفس اللهجة العملية الحازمة، ثم أعلق الباب عليه أمامهم
بمنتهى الثقة، والهدوء.

الفصل الأول

«في رحلة سعيك خلف الحقيقة؛ تأهّب دوماً للقاء الوجد»

لم يكن بحاجةً أمامي لتفسير الأسلوب الجافِّ المقتضب الذي بدأ به معهم حوارَه، كطبيب نفسي كان يدرك كم ستعرقلُه مشاعرُ متضاربةٌ كتلك التي التمس ما يكفيه منها بينهم في لحظات اللقاء الأول، أفهم بدوري ذلك، لذا؛ لم يستوقفه شبحُ استنكارٍ تنامي برغم الفهم فوق ملامحي من مواصلة الحديث.

وصف لي ذلك السكوتَ الحانق الذي جمع بين كليهما داخلَ المكان لدقائقٍ أمامه في المكتب وكلُّ منهما يجلس في ركنين متباعدين كأقطاب متنافرة.

وداد أُمي، تلك المتشحةُ بحزن فاق سواد عباؤها، فوق المقعد أمامه جلست، وعلى بُعدٍ منها أبي، صاحب الحلة الخاوية إلا من جسدٍ بلا روحٍ تحويه؛ يتابع ببصره الأبخرة المتصاعدة من فنجان القهوة المستقرِّ فوق المكتب الخشبي أمامه، ومن خلفها وجهُ إبراهيم الذي تناول قلمه وملفًا فارغًا؛ فتح صفحته الأولى وشرع في وضع خطوطه فوقها.

– من أين سنبدأ؟

خامره السؤال وهو يبحث بين أعينهم له عن إجابة.

– مكنثش عارف هبدأ جلستي معاهم بأني سؤال.

صارحني بالجملة مغمضاً عينيه وهو يتراجع فوق مقعده أمامي ملتقطاً من الهواء حولنا نفساً عميقاً ملأ به صدره قبل أن يزفره ببطء شديد ليواصل:

– أبوك كان قاعد على نفس الكرسي اللي إنت قاعد عليه قدامي هنا، وملامحه كانت شايلة نفس النظرة اللي شايفها في عينك دلوقتي: نظرة الفضول، والرغبة في المعرفة.

قشعيريةً باردة سرت في جسدي وأنا أتحسس مسندي الكرسي مستشعرًا كم المشاعر التي تركها أبي فوقه، كأنما اختزنها فيه قبل أن يرحل، أو كأن مشاعري باتت مرهفةً إلى حد سمح لي بتخيل الأمر، (رباه!) لعمرى لم أحظ يوماً بفرصة اقترابٍ من إحساسه بقدر تلك التي منحني إياها المقعد في تلك اللحظة.

– اسم المريض؟

تمتم الدكتور إبراهيم كعبارة استفهاميةٍ مقتضبة، بعد برهة الصمت بدأها معهم حواراه واضعاً سن قلمه فوق الورق وهو يطالع وجه الأب الذي بدا عليه الاضطراب، شعور كان يمزج بين التردد والخوف؛ لم يستوعب إبراهيم حينها أسبابه، فكرر السؤال:

– أستاذ جلال أنا بسألك، اسم ابنك إيه؟

بدا الاحتقان جلياً على قسمات الرجل وهو يهز كتفيه في حيرة
موجهًا بصره نحو وداد التي جلست مستترّةً بعباءة حزنها متواريةً
خلف الألم قبل أن يتمتم بحروف مبوححة:

– اسألها.

عقد إبراهيم حاجبيه وهو يتراجع في مقعده خلف المكتب بغير
قدرة على الاستيعاب، بينما بذات النبذة المتهدجة تابع جلال:

– أنا معرفش أي حاجة عن اللي حصل يا دكتور، ولا عارف
مين ف ولادي اللي عندك جوه، أنا حتى معرفتش حاجة عن
المكان ده أو الجلسة دي غير يدوب من كام ساعة فاتوا.

ازداد انعقادُ حاجبي الدكتور إبراهيم مع مواصلة الأخير الحديث
من بين أنفاسه المتقطعة وهو يقول:

– كل اللي أعرفه إنو ليا ابن موصلش المطار في معاده،
وكلمتين قالملي وداد في التليفون يوم ما اتصلت أسأل عن
سبب التأخير.

انقطعت عند هذا الحد عبارته، لم يتحمل من فرط ما يشعر به
أمامها، بيد أنها لم تفارق أبداً عقله مذ قيلت:

«ابنك مات».

وقف مستنداً على حافة الشرفة الخارجية للمصحة خلف باب

المكتب بشعره الأشعث وجسده الضخم التي حملت هيئته كل مشاعر الخزي، يرتدي قميصاً رثاً انتشرت هالات عرق أضفاها التوترُ فوقه رغم برودة المكان وظلال الأشجار المحيطة التي لم تلق على وجهه البائس قبساً منها، مضطرباً انشغل في فرك سواد الشحم المتجمع تحت أظافره وهو يتأمل من حين لآخر كفيه التي أضفت عليهما سنوات العمر غلظةً لم يتقاسمها وقلبه، رقيقاً كان برغم قساوة هيئته.

في بوتقة العشق يحيا حبيسَ ذكرياتٍ قديمة لا تفتأ تعاوده كلما حاول الهروبَ منها، وفي الجزء المقدس للماضي من ثنايا عقله ما زالت صورة عقُدِ حباتِ الفول الملتف حول معصمه، ما زال صوتُ دقات الهون التي صدحت بها أرجاء البيت القديم، وما زالت هي نائمةً أمامه، بأصابع لم تتجاوز أعوامها الخمسة؛ لامس بحذر وجنتها، تلك الرضيعة مغمضة العينين في مهدها بعمر سبعة أيام يغطيها لحاف وردي، كانت رائعةً، وكأنها المركز لكون رحب يحتويه، أهتمامه من مجرد نظرة، وهو الذي لم يدرك أبداً كنهه الإلهام.

عُلقت الزينة في كل الأركان احتفالاً بحضورها، من حوله كان صفار العائلة جميعاً يمرحون، وفي أذنيه تناثرت الزغاريد والضحكات، أما هو فكان معها، هي فقط.

— أستاذ حسن، تشرب حاجة؟

انتشلته العبارة المنبعثة بصوت أحدهم من أروقة المشهد القديم عائدةً به لأرض الواقع فالتفت إلى مصدرها ليجده أمامه: عامل البوابة العجوز بجلبابه الأبيض الذي استقبلهم صباح اليوم، أشار له بثناقل أن لا، قبل أن تستعيده خواطره مرةً أخرى لمكان آخر.

بطول الطريق الذي قطعه وإياها إلى هنا لم يكن في رأسه غير صوت واحد: «كيف خذلتها؟ أي قدر من الحسرة كافٍ وقد أفسدت بحمقك كل شيء؟ وأي كمٍ من الأسف قد يجدي تعزيةً لقلبك في خيطٍ من الأمل كان ممتدًا وقطعته يداك؟ وداد! حبك الأبدي المكتوم! حلمك الذي خُلقت لأجله، وطال بقاؤه فيك متحدثًا كل ما كساك وكساها من تجاعيد الزمن، تلك التي قطنت معك نفس الحي، ولعبت معك في نفس الأزقة، وتشاركتما معًا نفس الضحكات البريئة، معها مر العمر يتقاذفكما بين شيطان اللقاء وموائى الفراق».

يذكر لوعتها في ليلة الحادث الأليم، راکضةً هي فوق الأسفلت يسبقها قلبها المنتفض، ويحاول اللحاق هو بها مهرولاً بجسده المترهل، ككابوس يشع أمسى من حولها كل شيء، تحتاج لصبرٍ فوق تحملها أمام المشهد، ويحتاج هو لأضعاف ما يملك من قدرة للتوین عليها.

حشود ملتفة حول سيارة محترقة يجمعون منها أشلاء جسد تفحم، بينما انهمك آخرون على مقربةٍ منها في حمل ذلك المخضَّب بدماثة، هامسةً أنفاسه بنبض بدا في مرحلة التلاشي، كل خلية من خلايا جسدها كانت تصرخ رافضةً التصديق، ليس حقيقياً ما تراه، ليسا هُما، ليسا طفلاها.

أضواء سيارات الإسعاف من حولها مع الدموع المنهمرة تورثها المزيد من اللوثة، ومزيج التربيئات فوق كتفها مع كلمات المواساة التي حاول بها تهدئتها تقتلع من عينها دموعًا لا تنتهي، إنه الوجد

المودي لهاوية الجنون.

كم من الصرخات اقتلعت حنجرتها؟ وكم من العبرات الملتهية ذرفت؟ هل قاسم هو بعضاً من شعور قلبها المنشطر فوق الأسفلت الدامي بين نصفٍ محترقٍ وآخر يلفظ أنفاساً أخيرة؟ هل استشعر الموتَ فيهما كما استشعرته؟ كان عاجزاً عن فعل شيء، أي شيء.

نظراتها تحكي بصدق ما يعتمل في نفسها من أحاسيس، كل لحظات الحياة ليتها اجتذت من روحها لمنحهما نبضا جديدا، أنى لهذا القدر أن يمنحها وداعاً لم يكن في الحسبان؟ أنى له أن يحرمها الحياة وهي حية؟ هذا الجحيم الأسود؛ يحيط بها لتسقط وحدها محترقةً فيه، يأخذها بعيداً لليلة حالكة؛ شمس الكون كافة لا تبدد ظلمتها.

ساعات من التيه سقطت غائبةً عن الوعي في نهايتها، ولم تنتزع منها إلا بهزات كفه القلقة فوق كتفها بعد انتهاء أخصائية التمريض داخل أحد المشافي الحكومية من دسّ السائل المهديّ عبر وريدها وهي تتمتم:

– الحقنة دي هتفوقها، اطمن يا أستاذ، الإغماءة دي طبيعي من أثر الصدمة اللي اتعرضت لها، خليك بس إنت جنينها وربنا يحفظكوا لبعض.

لم تنتبه وداد في استفاقتها لعبارة الممرضة التي وصفتهما فيها كزوجين، ولم ينقل لها جفناها المفتوحان تدريجياً غير صورة للمكان الذي ميزت منه بعد برهة ملامح حسن المتأثر ولكنته الصعيدية التي تتمم بها:

– حمدلله عالسلامة يا بت عمي.

بعين تملؤها الدموع نظرتُ إليه، نخر الحزن طاقتها وجعلها غير قادرةٍ حتى على الاعتدال أمامه فتشبثتُ بكمِّ قميصه على وضعها باكيةً:

– قوللي إنو كابوس اللي شفته ده يا حسن، أرجوك! قوللي إنو كان كابوس.

تمالك بصعوبة نفسه أمامها وهو يشيح بوجهه بعيداً، لم يدرِ بأي قولٍ يهدئها، وبأي لسانٍ يعزيها في ابن رأتَه أشلاءً محترقةً، وآخر ما زالت أنفاسه قابضةً رهن مقايضة بين حياة أو موت، كان يريدُها بخير، ولكن الموقفَ كان أقسى من أن يعينه.

– الدكاترة بيقولوا إن فرص نجاته من الحادثة معقولة، رسم المخ اللي اتعمله بيقول أن مفيش ارتجاج، والإصابات كلها عبارة عن جروح سطحية وكدمات، بس التحاليل بتأكد وجود نسبة عالية من المخدر في دمه، ممكن يكون لها تأثير مع التفاعل العصبي اللي عملته الحادثة ساعة وقوعها.

أخبرها بالأمر ولم يضيف، ناصفها بصمته اليأس وجعاً يخالطه القهر، وأنين بكاء تقطع مع ارتفاع رنين هاتفها المحمول في جيبه، فمد يده يلتقطه ويناولها إياه مغمغماً:

– خدته منك لما وقعتي، الأستاذ جلال اتصل أكثر من مرة، والصراحة معرفتش أرد أقوله إيه.

كان يكذب، لم يكن هذا هو سببه الحقيقي الوحيد وراء عدم الرد، جزءٌ دفين من نفسه فضّل أن يحتلّ وحده موقع المسؤولية، جزءٌ دفين منه امتن للحادث رغم فظاعته، وإن لم يدرك نفسه ذلك، لطالما تمنى مشاركتها أي شعور، حتى وإن كان الحزن.

بيد من وهن التقطت منه الهاتف متألمةً الاسم الظاهر على شاشته، خالجهما التردد في الإجابة، وانبثقت من رحم الألم داخلها رغبة في الانتقام، كثرة الوجد لا تضعفنا بقدر ما تقضي فينا على مساحات الرحمة والتقبل، صاحب الاسم البادي أمامها هو المحمل بذنب الماضي، والسبب في كل الشرور، صاحب الاسم البادي أمامها تراه شيطاناً مثواه جهنم، وهي العدالة ستمنحها إياه، لن تسكن وحدها هذا الجحيم.

ضغطت زرّ الإجابة فأتاها الصوت المفعم بالقلق من الجهة الأخرى يتساءل أين فتاه، ولماذا تأخر ميعاد وصوله؟ كانت جاهزةً بالإجابة، لكن شيئاً من الشفقة ربما علق على طرف لسانها ومنعها من البوح، أو أنه كان احتياجاً؛ توسلتها له الدموع التي لم تجف بعد فوق وجنتها، هو شيء لم تدرك لحظتها كنهه، لكنّها نفضته عنها في لحظة لمح خلالها حسن في عينيها نظرة انتقام عبّرت بعد السكوت عن نفسها بحروف الرد المقتضب البارد:

– ابنك مات.

قالتها وحسب، ثم قطعت الاتصال، وبعقل لا تحوي تلافيفه غير شعورٍ بالألم وكرهية عاتية التفتت نحوه تبكي:

– جلال مش لازم يعرف أي حاجة يا حسن، كل الحقائق مهما بلغت صعوبتها تريح، ولا راحة لمن لا يستحق.

نطقها بكل الحزن، ووافقها هو، وافقها استسلامًا لرغبتها، أو حقنًا لمشاعر حنقه الدفينة ضد رجل اقتنصها ذات يوم منه، عاهدها بإيماءة رأسٍ لم ينتو أبدًا نقضها، بيد أنه في النهاية فعل، وها هو ذا الآن يقفُ تائها بلا أهلٍ للوم نفسه ولا سواها.

عائدًا للواقع في شرفة المكان يمنحُ الباب المغلَقَ على بعد أمتار منه نظرة تحسر، ويتخيلها متشحةً بعباءة حزنها الأسود من ورائه تجلس يشارِكُها المكان طليقها وطبيب معالج، تعاتب نفسها على لحظة ثقةٍ زائفةٍ فيه، وتسأله بصوت ترددٍ في ضميره صدها: «ليه كدا يا حسن؟ ليه؟».

هنا كان عليّ أن أسأله بعد أن حاصرتها أعينهم داخل تلك الحجرة محدودة الاتساع في بادئ اجتماعهم الثلاثي المغلَق.

– هل ترددت لبرهة قبل الإجابة؟ هل راود التلعثمُ حروفها حين نطقت بالاسم؟ وهل بدت الكلماتُ كشظايا من نار اخترقت قلب أبي؟ ذلك الواقعُ بين برائن فضوله والمجهول، أبكي؟

ربما! لكن شيئًا من ذلك لم يثنِ القلم عن رسم حروف الاسم المذكور في رأس التقرير الفارغ.

– اسم الحالة شريف يا دكتور، شريف جلال عبد العزيز.

الفصل الثاني

«مجهولٌ أفضل من حقيقةٍ مؤجلة»

خيم الصمت الطويل على ثلاثتهم في المكان. صمّتُ حزين متربق
منحه الدكتور إبراهيم احترامًا كل الوقت، هي؛ كانت دموعها المنهمرة
وجعًا تحكي بصدق ما يعتمل داخلها من مشاعر، وهو؛ كان انتحابه
مقرونًا بشفاه مرتعشة، ظل يردد بها اسم وليده المفقود.

مات ياسين! إن كان الموجود هنا ابنه شريف، فقد مات ياسين،
ومن روايتها في مخيلته ارتسمت صورة لجسده المتفحم، كان ملثّمًا
بصدمة اكتشاف الحقيقة واحتراق ما سبقها من أمل وتوقعات، يعاني
تلك اللحظة التي يتخضب بعدها كل شيء بالسواد، كل شيء، من بعد
مهاقتها المقتضية أمضى ساعاته في ضياع وحيرة.

حاول مرارًا أن يتواصل معها، أن يفهم تفاصيل ما حدث، لكنها لم
تهده إجابة، لم ترحه، تركته لأكثر من أسبوع يحترق بين لهب علامات
الاستفهام كيئس متلهف لنصل سكين أغمده اليوم أخيرًا في صدره،
لكم تمنى متعلقًا بالوهم البائس في ثنايا عقله أن لا يعدو الأمر كونه
مجرد كذبة اختلقها بعقل مريض؛ تلك التي يدرك ما تحمل تجاهه في

قلبي من كراهية وحنق.

لعبت انتقام أعمى من عقل امرأة اعتبرته السبب الوحيد في جرح قلبي الغائر، لكنها وبكل الأسف لم تكن كذلك، لقد مات ياسين حقًا، وقد بات الآن يعرف، تنعى الفضول أخيرًا ليتترك مساحة كان يشغلها للوجع.

تنحني إبراهيم بعد برهة لجذب انتباه ضيفيه المدفونين وسط همومهما وكمن من الأسرار لم يفصحا منها عن شيء بعد، فثمة عقدة هنا عليه فك طلاسمها.

مستقرة عيناه على الوجه الأنثوي الذي حمل من الحزن قدرًا يخالطه اللوم، مزيج مربك حيره، وعجز عن فهم دواعيه، أكان حزنًا خالصًا من قلب أم فقدت ابنها؟ أم أنه الحزن المكبوت منذ عقود في انتظار سبب لإفراغه؟

افتتح حديثه بعد الصمت بعبارة تعزية وجهها لكليهما مغمغمًا بصوت سمعوه:

– البقاء لله.

ولم تجئه إجابة غير هنات النحيب، سأل بصوت هامس متحرجًا نبش قبر ألمهما المقدس:

– ياسين كان أخوه؟

أجابته بهزة رأس تحاشت خلالها النظر إليه، بينما تتمم الآخر:

– توأمه يا دكتور! ياسين الله يرحمه كان توأم شريف، الاتنين اتولدوا في نفس الساعة.

هز إبراهيم رأسه أمام الرد مستشعرًا إحساسه قبل أن يضغط من فوق مكتبه الزر الذي أصدر أزيزًا خارج المكان، انفتح على أثره الباب مرةً أخرى مفصّحًا عن وجه أحد العاملين.

– كبايتين مية للأساتذة يا محمد معلش، وهاتلي علبة مناديل خليها عندي هنا في المكتب لو سمحت.

قالها، فسارع الرجل بتنفيذ الأمر قبل أن يعاود هو محادثتهم بصوت خفيض:

– تحبوا نأجل الجلسة شوية أو نخليها يوم ثاني لحد ما تبقوا في وضع نفسي أحسن من كدا؟

بملامحها المهمومة صممت هي في حين حاول الآخر أن يبدو متماسكًا وهو يمسح بكفه وجنتيه المبللتين مجيبًا:

– لأ يا دكتور، اتفضل كمل احنا معاك.

تهد الطبيب مقدرًا ما يتكبده الرجل أمامه، وانتظر لحظات عاد خلالها العامل بعلبة المناديل وزجاجة مياه معدنية مع كوين، أشار له بوضعهم على مقربة منهما قبل انصرافه مرة ثانية.

– جايز مقولتوهاش بس اللي فهمته من الكلام كدا انكوا منفصلين.

تمتم بها مراقبا ردة الفعل المتبادلة بينهما في انتظار التأكيد، هو أطرق برأسه، وهي سرحت بعينها بعيداً ناحية الفراغ، ردّاً كان أبلغ عنده من مئة إجابة أعاده إلى حالة التركيز، فاعتدل متخذاً وضع استعداد للمواصلة، وبحروف بطيئة سألهما:

– قبل ما أعرف انفصلتوا امتي وليه، ممكن تحكولي البداية؟
عايز أعرف اتقابلتوا من الأول ازاي؟

بديهياً يستدعي كل رسام أدواته قبل الشروع في رسم اللوحة، وأدواته كطبيب نفسي كانت الماضي المشكّل لملامح حالاته، فإلى تلك الصفحة البيضاء التي استقبلت أول رتوش الحكاية عودوا، واسترجعوا اللحظات الأولى، توقفوا على أعتاب فجر استقبلتم ذات يوم سوياً شروقه، ولتكونا رغم كل ما تلاه من غيمات الليل صريحين، كيف كان؟

من داخل سيارتها الواقفة أمام سور المصحة بشعرها الأبيض وتجاعيد الزمن التي غزت وجهها المائل للحمرة قبعت السيدة العجوز إشراق هانم متململةً بجوار سائقها الخمسيني الأسمر الذي أعاد رأسه للوراء مسترخياً وهو يضع منشفةً صغيرةً فوق عينيه ليحظى بقسط من الراحة وسط زخم اليوم المجهد الذي بدأه منذ شروق شمس اليوم.

زفرة حانقة أخرجتها وهي تمد كفها مستقبلةً فوقه بعض الهواء البارد المنبعث من فتحات التهوية الأقرب إليها فتحرك معتدلاً على

إثرها ليتساءل وهو يقاوم التثاؤب بصعوبة:

– معلىش يا ست هانم، بايني نعست شوية، التكييف معقول
وللا أزود هولك حبة كمان؟

رمقته صامته كمن انْتزعت من خواطر كانت تشاركها لحظات
السكوت، بعدها تمتمت:

– كمل نوم يا نعيم، معلىش قلقتك.

هز كتفيه مجاوبًا في إرهاق وهو يرفع يده نحو ثغره المنفتح على
تثاؤبٍ ثانٍ:

– مكنتش نايم، دي تغفيلة عالسرّيع كدا.

قالها ثم أطل بعينه على الساعة فوق معصمه متهدأ فسألته:

– هي الساعة كام دلوقتي؟

دون تردد أخبرها:

– داخله على 11 ونص.

ارتفع حاجباها في استنكار وهي تمصمص شفتمها متجهةً برأسها
نحو بوابة المصححة المجاورة لنافذتها لتغمغم في توتر:

– بيعملوا إيه كل ده؟ ساعة كاملة مع الدكتور الغبي ده جوا
بيرغوا في إيه عايضة أفهم؟

أفصح بغرض تهدئتها:

– الصبر يا ست هانم، يظهر الجلسات الي مالنوع ده بتاخذ وقت.

أجابته بزفرة حارة انطلقت من أعماقها وهي تقول بعصبية:

– عارفة إن الجلسات الزفت دي بتاخذ وقت، بس أنا برضو بني أدمة وعندي أعصاب لهما تحمل طاقة محدودة.

فرك هو جفنيه المتثاقلين متحسراً على لحظات راحة كان يرجوها بينما هي تتابع بنفس حنقها:

– أنا مش فاهمة الراجل قليل الذوق ده ليه عارض وجودي معاهم في المكتب جوه؟ كان زماني فاهمة اللي بيحصل وعارفة بيقولوا إيه.

مهوناً عليها مرة أخرى، تمتم:

– بغض النظر، في كل الأحوال اطمني، شوية جلال بيه هيطلع ويفهمنا كل حاجة، متشغليش بالك.

لوحث بكفيها أمامه في استهجان وهي ترد:

– مش عارفة أطمن يا نعيم، القلق مسيطر عليا بشكل استفزازي، جلال ابني أهبل، والحرباية الي معاه جوه دي أنا متأكدة إنها قادرة تاخذ الحوار كله لصالحها دلوقتي، زي ما قدرت تاخده هو نفسه لهما زمان.

قالتها ثم سكتت مفسحة المجال لزفرة حنق أخرى استطردت

بعدها:

– هقول إيه بس؟ ما هي الغلطة من الأول عندي أنا، أنا اللي إديتها فرصة وفتحتها الباب عشان توصل لقلب ابني بمنتهى الخسة والانحطاط.

رغبة عارضة في مجادلتها راودته فأثنته النبرة المتعصبة في حديثها عنها وهي تتابع:

– جتلي الشركة عيلة صغيرة لسه متخرجة من معهد المحاسبة الزفت بتاعها ده.

كان يوم إسود لما قبلت أشغلها عندي، مش فاهمة أنا إيه اللي شدني فيها؟ البراءة الكدابة اللي كانت راسماها على وشها؟ والأذكاء اللي مكنتش فاهمة كم الخبث المتداري وراه؟

لم يرغب في مقاطعتها لكن شيئاً من الاستنكار تسلل عبر شفثيه رغماً عنه فلفظه:

– ملوش لازمة الكلام ده دلوقتي يا ست إشراق، دي حكاية فات عليها سنين.

بنفس الاحتداد وكأنها لم تسمعه واصلت الباقي من جملتها قائلة:

– خريجة معهد متوسط ملوش ذكر ولا قيمة، تبص ليه لمستوى أعلى منها؟ تقرب من ابني اللي تعبت في تربيته سنين ليه؟

كانت كلماتها تحمل قدرًا واضحًا من العنصرية أزعجه لكنه كتم رغبته في الرد وهو يتلفت فيما حوله محاولاً صرف انتباهه لشيء آخر بينما هي تستطرد محدثة نفسها:

– بس أرجع وأقول تاني برغم كل شيء إن الغلطة الأكبر كانت من عندي أنا، أنا اللي متصرفتش من الأول صح، أنا اللي وقفت أنفرج عليهم من بعيد ومخدتش قرار حاسم.

اضطره صمتها بعد العبارة وضميره المتيقظ إلى الرد بشيء من الاستنكار حاول قدر الاستطاعة إخفاءه:

– وهو إيه اللي حصل بس يعني؟ اتنين حبوا بعض واتجوزوا على سنة الله ورسوله، هما لا سرقوا حاجة من حد ولا أقدموا على فعل حرام، والفرق الاجتماعي اللي بينهم مهما كان مش دافع لتكفيرهم أو تحريم اللي عملوه، وبعدين ما هما منفصلين بقالهم سنين أهو، إيه المشكلة بقى دلوقتي أنا مش فاهم؟

لمح وسط عبارته الشرر المتطاير من عينيها تجاهه فحاول توجيه الحديث لدفة أخرى مغممًا:

– أنا غرضي بس تهدي، وخلينا مننساش إننا هنا عشان نطمئن عالولد اللي جوه، واللي معرفناش لحد الساعادي هو مين حتى.

نجح في جذب انتباهها عن الأمر بعبارته تلك فأطرقت قليلاً قبل أن تعاود هز رأسها في سخط قائلة:

– كله بسببها، كل الهيدلة اللي احنا فيها دلوقتي دي بسببها،

حسي الله ونعم الوكيل.

هز رأسه بدوره متممًا بكلمات مهمة لا معنى لها في حين عاودها هي الصمت المفعم بالزفرات الحانقة، وبنفس السكون إلى جوارها سرح بفكره، لم تكن أبدًا للتغير، لقد أمضى عمرًا طويلاً في خدمتها، سنوات كافية ليدرك قدر عنادها، هي تلك التي لا يرضيها الاعتراف بهزيمة، تجلس الآن إلى جواره محاولة التنصل من حرمة ذنب تكسوها، يعرف في قرارة نفسه أنها وبرغم كل النفوذ لا تفتأ كأنثى غير قابلة لفكرة أن أخرى استطاعت وبعنوة سلبها أهم شيء تملكه: جلال، ذاك الحلم الوحيد الذي عاشت لأجله، ورسمت لمستقبله صورة حاربت من أجل أن تتحقق، ثم خامره متسللاً من بين الخواطر سؤالٌ تردد لوهلة قبل أن يفصح لها عنه متممًا:

– عندي سؤال كدا يا ست هانم معرفش إذا كان مسموحي أسألها بعد السنين دي كلها وللا بلاش؟

التفتت نحوه بعلامة استفهام مرتسمة فوق ملامحها فأدلى:

– هو انتي كنتي بتحسي بارتباط حقيقي ناحية ولاد ابنك شريف وياسين؟ وللا كونهم ولادها هي كمان لغى عنهم الميزة دي؟

ضاققت حدقتها أمام سؤاله، مستنكرةً من صميم قلبها كأ مغازه، لم تلم يوماً فطرته الصريحة التي ألقتها منذ زمن فيه ولم يتركها هو كجزء متأصل في طبعه، لكن سؤاله هذه المرة ضايقها، وساءها فيه إغفال مشاعرها المتوارية خلف قناع من الحزم اعتادت دائماً ارتدائه، لطالما تناسى الجميع وراءه طبيعتها كجدة أمضت وقتاً ليس

بالضئيل مع حفيديهما التوأم، أولئك اللذين لم تتقبل أبدًا والدتهما، لكنها لم تنكر يومًا حقها فيهما، تزعجها النظرة السطحية التي ينظر بها الجميع إليهما، وأنهم جميعًا - برغم اقتراحهم الطويل منها - ما زالوا وبكل الأسف لا يفهمون.

انهمك الجميع داخل غرفة الاجتماعات حول المائدة المستطيلة بجمع ملفاتهم الخاصة قبل أن يستعدوا للرحيل أمام رئيسهم التي أنهت جلستها بتوصيات أخيرة قبل أن تلتفت برأسها ناحية تلك الفتاة الشابة التي جاورتها والتي نهضت بدورها استعدادًا للانصراف مع الآخرين قائلةً بلمجتها القيادية المعتادة:

- وداد، مسمعتش رأيك النهار ده في أي حاجة خلال الاجتماع، يا ترى كنتي مركزة مع اللي بنقوله وللا في حاجة تانية برة سرحانة فيها؟

ارتبكت الفتاة بعض الشيء محاولةً الابتسام وهي تقول:

- أبدًا والله يا إشراق هانم، مركزة جدًا، بس أنا زي ما حضرتك عارفة لسه جديدة هنا في الشركة، وبخاف أقول حاجة تطلع غلط أو تعطل سير الاجتماع، فبقول أقعد مستمعة وأتعلم من حضرتك والأساتذة.

رمقتها رئيستها بنظرة صامتة طويلة ثم أشارت إلى الحجاب فوق رأسها قائلة:

– لو مش ناوية تقلعي الطرحة دي لفيها اسبانيش، شكلها هيليق أكثر عليكي وعلى مود المكان.

قالتها ثم نهضت متجهة إلى الخارج وهي تشير لها أمره:

– وتعالى ورايا.

خطلت وداد خلفها في أروقة المكان نحو المكتب الذي دلفت إليه، ثم أغلقت الباب خلفها بإشارة أخرى منها وهي تلقي بجسدها فوق الأريكة الجلدية الوثيرة في ركنه مستجمعةً أفكارها لبرهة قبل أن تسأل:

– ملف حسابات مصنع اللبن أخباره إيه؟

في سرعة وبأسلوب تقريرى أسرع وتداد تجيب:

– صاحب المصنع بعتلنا بالفاكس البيانات اللي طلبوها منه في مصلحة الضرايب، وأنا صورتها ودخلتها للأستاذ محسن عشان يشتغل عليها قبل معاد المطالبة بإذن الله.

أومأت إشراق برأسها وهي ترفع حاجبها بشيء من عدم الرضا متممة:

– تمام، هايل جدًّا، متنسش بقى تحجزلي الأستاذ محسن جنبك عشان لو احتجت اسأل عن حاجة تاني.

لم تستسغ وداد النبرة التي نطقت بها الرئيسة عبارتها، فترددت بعض الشيء وهي تستفسر:

– في حاجة فكلامي ضايقتك يا مدام إشراق؟

وكأنما انتظرت سؤالها فأجابت بحدة ودون موارد:

– طبعًا يا وداد مضايقة منك.

همت ذات العشرين بإلقاء سؤال مضطرب آخر لولا أن قاطعته قبل خروجه الأخرى وهي تكمل:

– انتي امتي يا بنتي هتتجراي عالشغل وتجربي بنفسك؟ بقالك معانا هنا شهر، وقايلالك إن ملف مصنع اللبن ده أنا سيباهولك تجربي فيه، الحكاية أصلها بسيط جدًّا، وانتي شاطرة يا وداد وعندك خبرة كافية، بس القلق اللي معيشة نفسك فيه ده هو اللي لاعيلك ثقتك تمامًا، ودا مينفعش ولا هينفع تستمري بيه.

قالتها ثم نهضت واقفة أمام الفتاة مشيرة إلى ما حولها مستطردة:

– بصي لكل اللي حواليك هنا في الشركة يا وداد، تفتكري لو كان عندي ربع التردد اللي عندك ده كنت هعرف أحقق من ده كله حاجة؟

حاولت وداد استيعاب ما تحاول المرأة إيصاله لها وهي تتمتم:

– فاهمة قصد حضرتك، أنا والله بس مش عايزة أعطل الشغل وبقول مع الوقت يمكن الخبرة اللي عندي تتطور وابقى أحسن بإذن الله.

لم بيد في حديثها ما يقنع أمام الأخيرة التي رفعت كفها نحوها

مشيرة بقطع العبارة وهي تقول:

– الخبرة مبتجيش من غير تجربة، افهبي ده كويس، لازم تجربي، لازم يكون في غلط عشان يبقى في تصليح، ولازم تاخدي قرار بالمخاطرة في مراحل مختلفة من حياتك عشان تعدي من سلمة للتانية، فاهماني؟

أومأت وداد برأسها متفهمةً في نفس اللحظة التي دلف فيها دون استئذان ذلك الشاب الأنيق وسيم الطلة إلى المكان فاستدارت نحوه مع رئيسها التي نهضت فاردة ذراعها لهفة لاستقبال عناق منحها إياه قبل أن ينحني مقبلاً كَفَّها وهو يقول بطريقة تمثيلية:

– صباح الخير يا سعادة المستشارة، يومك جميل يا ست الكل.
بابتسامة حنون استقبلت هي طريقته قائلة:

– صباحك جميل يا بو البكش كله، أية رياح حلوة دي اللي ألفت بيك عالشركة زي ما بيقولوا؟ والأأ أقولها لك بالبلدي، إيه اللي رماك عليا وعايز إيه؟

أطلق في المكان ضحكةً مرحة ثم التفت نحو وداد أمراً:

– فنجان قهوة زيادة الأول، عايزك يا أمورة إذا سمحتي تروحي تعملهولي أروق بيه دماغي بس من دوشة المحاضرات اللي لسه راجع منها دي، وبعد كدا نشوف مع سيادة المستشارة أنا عايز إيه.

أمام كلماته توقفت وداد ذاهلة، أخرجتها إشارته التلقائية وما

ألقاه لها من أمر دون تفكير أو قصد، لم يكن يعرفها، ولم تكن تعرفه، ملامحها البسيطة ربما وقوامها الضئيل هما ما منحاهما عمراً أصغر من عمرها الحقيقي، وقدراً أقل من قدرها في المكان، أهانها بطلبه فلم تستدرك حنقها إلا بعد الانفجار به في وجهه محتدة:

– القهوة دي تروح تعملها لنفسك، أنا مش الشغالة اللي جابوها لسيادتك هنا في الشركة.

صاحت بالعبارة دون وعي وبشكل مفاجئ اتسعت له عيناه اندهاشاً في حين اتسعت ابتسامته فوق وجه إشراق هانم التي مدت يدها مرتبة على كتف جلال ابنها وهي تقول بنبرة ضاحكة:

– أخيراً يا وداد شفت حاجة استفزتك وطلعت من جواكي العفريت؟ لا ده أنا أشكر الصدفه بقى!

استشعرت وداد شيئاً من الحرج بعد اندفاعها أمام نظرات الشاب المعلقة بها ورئيستها تتابع:

– معرفتكوش ببعض، ده جلال يا وداد، ابني اللمض اللي مش مسموحله أبداً يقوللي يا ماما قدام الناس، زي مانتي شايفة أنا لسه صغيرة ومينفعش تطلع مني الأحجام دي.

كانت تتحدث بوجه مبتهج التفتت به نحو جلال مكملة:

– وودي وداد يا جلال، السكرتيرة الجديدة بتاعتي، بنوتة شاطرة زي ماننت شايف كدا بس محتاجة لسه تاخذ على جو الشغل.

تمت الفتاة بعين مطرقة في شكل اعتذار على الرغم من بعض

الحنق المتبقي داخلها:

– تشرفنا يا أستاذ جلال، وآسفة بجد لو كنت انفعلت على حضرتك.

تمتم:

– الشرف ليا يا أستاذة وداد، أنا اللي آسف، متزعليش مني واعتبريها مجرد لماضة بس زي ما المستشارة قالت.

منحت الثالثة النظرة المعلقة بينهما بعضًا من الوقت، قبل أن تنهيا بتصفيقة من كفيها وهي تقول:

– طيب، يلا عشان ورانا شغل، روعي انتي بقي يا وداد لأستاذ محسن استلني منه ملف مصنع اللبن زي ما اتفقنا، وسيبيني أنا وجلجل أشوف سر زيارته الغير متوقعة دي إيه.

ألقت عبارتها وهي تمسح بيدها على رأسه بينما هو عيناه لا تزالان معلقتين بالفتاة أثناء رحيلها حتى خارج الغرفة قبل أن تسأله:

– قوللي بقي، مكانش عندك محاضرات في الجامعة النهار ده والأ إيه؟

بدا الشرود على ملامحه في التفاتته نحوها، فكررت على مسامعه السؤال مرة أخرى ليجيها بنظرة استفهامٍ سارحة قبل أن ينفجر ثغره عن عبارة لا علاقة لها بسؤالها البتة:

– تفتكري هتروح تجيب القهوة؟

رفعت إحدى حاجبيها وهي تنظر إلى عينيه المعلقتين تجاه الباب
قبل أن يلوح شيخ ابتسامة فوق شفثيه: ابتسامة معجب.

– صدفة، أول مرة اتقابلنا كانت صدفة، تقدر تقول إنها أحلى
صدفة حصلتلي في عمري وحسيت بيها.

بشيء من الحنين تسيد نبراته رغم الحزن نطق بها جلال وهو
يفرغ آخر ما تبقى من زجاجة الماء البارد في الكوب المستقر على
المنضدة الصغيرة أمامه قبل أن يكمل:

– كانت مختلفة، طللت عليا بسحر غريب مش عارف أو صفلك
تأثيره، وأخاف وصفي يفقده معناه.

قالها وهو يمسك بالكوب دون أن يرفعه سارحاً في شفافيته التي
باتت شبيهةً بذكرياته المستطردة:

– بمجرد ما شفثها حبيتها، حب حقيقي يا دكتور، حاجة كدازي
اللي بتسمع عنها في الأفلام وبيسموها حب النظرة الأولى.

لمح إبراهيم بطرف عينيه اختلاجتها، هل أفلتت يدها المنديل
عمداً أم أنه انفلتت بغير قصد من بين الأصابع المرتعشة؟ وهل شعرت
هي بذلك أم أنها اندمجت بعينها المحدقتين وكيانها كله مع ذلك الذي
واصل حديثه:

– بغض النظر عن كل حاجة وصلنالها النهار ده، بس الحقيقة
إني زمان لما عرفت وداد، حسيت باللي كان ناقص في تكويني،

كأني حد ولقي بقيته.

مهتمًا أنصت إبراهيم لكلماته، هو يدرك تحديدًا أي وضع نفسي يخامره، يتفهم علميًا ذلك الصراع الدائر في رأسه هربًا من الانسياق في دوامة حزن تسحبه لالاكتئاب، كان يحاول التشبث بشطآن النجاة في عقله الباطن، وقد وجد برًا هنالك دُفِنَتْ فيه مشاعره القديمة.

املاً قلب أحدهم بحزن جم، ثم امنحه تربيته، وتأمل تحوله أمامك لوعاء احتياج، هذا تمامًا ما كانه جلال، قلب ضاق من الألم في احتياج ماس لثغرة تنفيس ألقاها إليه سؤاله، فتشبث بها مطلقًا إحساسه وعواطفه المكبوتة لسنوات عبرها.

– بيقولوا الحب مببصنعوش غير اكتمال قلوبين، بس الحقيقة إن اللي بيخلق الحب فعلاً، هو قلب اكتمل باتنين.

ما زال يحدث الكوب، يبتسم له وسط كلامه، تفصح شفثاه أمامه عن ابتسامات قصيرة كان يرسمها في لحظات صمته بين الحين والآخر وهو يتابع:

– وداد بالنسبالي يا دكتور مكانتش مجرد زوجة، كانت الجزء اللي ناقصني عشان أعرف أعيش.

– إنت كداب!

بنبرة متهدجة صاحت بها وداد في حنق مرير تقاطعه مقاومةً رغبة عارمة أمام الرجلين في البكاء، استدار الدكتور إبراهيم يهدوء نحوها، وتركها بفيض مشاعرها المستنكرة تصيح:

– أنا عايزة أفهم إيه لازمة كل الكلام اللي بيتقال ده؟ هيفيدنا
بياه باب الكذب اللي بيتفتح ده يا دكتور؟

لم يحرك جلال من وضعه قيد أنملة، فقط أطرق برأسه أمام
الكوب نحو أرضية المكان، بينما رفع الأول رأسه عن راحته ليحجبهما
وهو يحك ذقنه بكفه قائلاً:

– لازمته كبيرة جداً يا أستاذة وداد، التاريخ المرضي لأي حالة
مرتبط حتمياً بتاريخ أقرب الناس ليه، إحنا كلنا نتايح لتراكمات
نفسية حوشها القريبين فينا وصنعوهالنا، وعشان أنا أفهم
شريف صح، لازم أفهمكوا إنتوا الأول، لازم أدور في حكايتكوا
على طرف الخيط اللي اتخلقت منه العقدة، كان وارد أسألکوا
الأول عن سبب الطلاق، بس ده مش هيكونله أثر محدد وأنا
معرفش في الأصل إنتوا قبلها كنتوا عايشين إزاي، فاهماني؟

لم تجبه، فقط صمتت وهي تمط شفطها معتصرةً دمعاً تقاتل
للخروج، كلمات جلال ما زالت تعلق في سماء الحجرة من حولها،
يتردد صداها في الأرجاء مخلفة في عقلها ضحيجاً صريحاً نظرت به
ناحية طليقها الجالس في صمت أمامها قائلةً بمرارة الدنيا:

– بتكذب ليه؟ إيه فايده إنك تدعي حب دلوقتي أنا وانت عارفين
إنه مكانش حقيقي؟

تهند الآخر أمامها محافظاً على إطراقة رأسه، لم يجاوبها، لم
يمنحها ردّاً فالتفتت محددةً توجه سخطها للآخر:

– خلي اللي حبني أوي ده يا دكتور يقولك على سبب الطلاق.

بين أعينهم تبادل الرجل نظرته ينتظر ردًا خرج من حلق متحشرج مختنق بصوت جلال:

– لو هو ده السؤال اللي محتاجة فعلاً إجابتي عليه، ف أنا هريحك يا وداد.

قالها ثم التفت نحو إبراهيم مصرحًا بلسان نادم:

– اتطلقنا عشان خنتها يا دكتور.

هنا انسلت من عينها الدموع، مع رده الذي ألحت لسماعه بكت، أرادته أن يعترف، ولم ترغب في اعترافه، بين الشعورين المناقضين لبعضهما اختل توازن عباراتها فذُرِفَتْ، جزء مختبئ من أنوثتها كان يتوق لإنكاره، كانت تعرف الحقيقة لكنها خشيت فظاظة إفصاحه عنها، ليته استكمل كذباته، ولعلها وجدت في كذبه المفضوح أمامها بعض راحة، حالة نفسية معقدة أدركها الدكتور إبراهيم في عينها فتهدد ساعيًا لتجاوزها وهو يوجه لها سؤاله:

– طب هو قال إنه حبك يا أستاذة وداد، ممكن يكون بيكذب زي ما قولتي، بس المرادي أنا سؤالي ليكي إنتي.

ثم التقط من هواء المكان المفعم بأحزانهم نفسًا عميقًا أكمل به:

– حبيتيه؟

مكث الرد حبيسًا بين شففتها لثوان اقشعر خلالها جسدها، وبصعوبة انسحاب الروح من نفس متألّمة تمتمت:

– حبیته یا دکتور،

للأسف،

حبیته.

الفصل الثالث

«سيؤلمك الواقع حتمًا كلما حاولت بأحلامك رصده»

قال لي أنه لا يفهم، ما الذي منع حبًا صادقًا كالذي رآه في أعينهم من الاستمرار؟ ناولني وسط الحديث صورةً كانت طي ملف وضعه في ركن من أركان المكتب.

– أبوك وسط الكلام اداني الصورة دي، نسيتها يمكن، بس أنا شيلتها لك هنا في الملف.

صورة مصفرة مهترئة الحواف، بهت التاريخ المسجل على ظهرها بخط يده، وبات القدم فيها بادٍ بفعل الزمن، أمسكت بها متأملًا ما فيها من تفاصيل: النظرة الممتلئة بالسعادة في عين أمي، تلك الانكماشة حول عينها من ضحكة صادقة كانت تضحكها، نضارة وجنتها الملامستين لوجهي ووجه أخي، تضم كلينا إليها ومن خلفها البحر هادئًا يترقب، ساكنًا سكون القدر كأنما يحوي في قلبه أسرار الغد، وكأن أمواجه المتوالدة تحذرنا بلغة لا نفهمها، فتنحسر خالٍ وفاضها إلا من حسرة المحاولات عائدة إليه، ليتهاكم هو من خلف ظهورنا وفي قلبه الأمواج يمنحها أسرارًا جديدة تتلاشى فور ارتطامها بالشاطئ وراءنا

من جديد...

كان أثر السعادة فوق وجوهنا واضحًا حينها، واضحًا حد استحالة أن يدوم.

قصص الحب جميعها تواجهها على أرض الواقع بعضٌ من العقبات، قد يمنحنا الحظ أحيانًا قدرةً على مواجهتها، وقد تجربنا الظروف في أحيان أخرى على الاستسلام، نظلّم الحب كثيرًا إن وضعناه مقررًا ووحيدًا لنجاح تجاربنا، أو لمناه وحده على الفشل مغفلين كل ما صاحب الأمر من عوامل قدرية وظروف.

علينا تفهم الأمور جميعها قبل أن نحكم، علينا أن نضع نصب أعيننا الكثير من التعريفات، والأكثر من المفاهيم، هناك تضحية لكل منا فيها قدر، وقدرة احتمال تختلف نسبتها من شخص لآخر، مبادئ وأحكام وظروف لا يشبه أحدنا فيها أحدا، نفس المشاهد لا يراها الجميع من زاوية واحدة، ونفس الحكايات لا تُقرأ بذات العين.

– بتقول إن قصة الحب اللي ابتدت بينكم واجهتها شوية مشاكل، ممكن توضحها؟

ألقي عليه الدكتور إبراهيم السؤال، فغاص في أريكته الجلدية أكثر محاولًا استمداد ثقة لنفسه في أحضانها، وباعتماد على قرار اتخذه بأقصى حد للصراحة في حديثه تكلم:

– أمي يا دكتور، أمي كانت هي المشكلة الظاهرة الوحيدة في

بداية حكايتنا.

قاطعته هي معترضة:

– لأ يا جلال، أمك مكانتش هي العائق الحقيقي قدامنا، انت بس اللي مغمض عينيك أو عايز تعلق شموعات غلطك عليها.

رفع عينيه نحوها، ومط شفتيه في استنكار لما قالت، ثم تابع كأنه لم يسمع شيئاً:

– هي نفسها يا دكتور عارفة اني مش بكذب المرادي.

هي نفسها شافت أكثر من مرة محاولات أمي المستميتة عشان نبعد عن بعض ونلغي القصة من أولها، شافتها أكثر من مرة وهي بترشحي ناس غيرها، وحكيولي كتير عن الضغوط اللي كانت بتحاول تعرضها لها، وعن أسلوبها اللي اتغير معاها تمامًا من يوم ما لاحظت إننا ممكن نحب بعض.

قالت تحدته وكأن لا ثالث في الغرفة معهم، لم تعد تشعر بوجود الدكتور الذي حشد اهتمامه كله في مراقبتهم:

– أنا أمك لما جاتلي في يوم يا جلال تعرض عليا فلوس عشان أبعد عنك رفضت، مع إني فترتها كان أكثر شيء ممكن أكون محتاجاه هو الفلوس، وأما خيرتني بينك وبين استمرار شغلي في الشركة معاها اخترتك إنت، عارف ليه يا جلال؟ عشان كنت محددة اختياري، وعارفة إن الحاجة الوحيدة اللي أنا محتاجاها فعلاً هي راجل يحسسي بالأمان، الأمان الحقيقي اللي يستمر

وميتغيرش مع الوقت، إحنا اللي بنختار يا جلال مش الناس هما اللي بيختارولنا، الناس دي بتبقى حجج، أسباب، وأمك كانت مجرد سبب؛ حيي ليك كان أقوى بكتير أوي منه، بس إنت لأ، فما تجيش تقوللي دلوقتي إنك أجبرت عشان مش هصدقك ولا هلاقي لكلامك جوايا صدى مقنع، أمك كانت اختبار من القدر عرفت أنا بيه حجم تمسكك الفعلي بيا.

سألها لائماً إنكارها لكل ما فعل:

– وأنا متمسكتش بيكي يا وداد؟ إنتي شايقة فعلاً إنني معملتش أي حاجة في حياتي تكون دليل على حب حقيقي شيلتهولك واختصيتك بيه من دون كل الناس؟

أجابته والدموع المنهمرة من عينها تهديج صوتها المنسل إلى أذنيه:

– الحب مش كلام مرسل يا جلال، الحب تضحية، وإنت اللي اخترت لوحذك في نهاية الطريق تضحي بيا، مش عشاني.

– أنا كل اللي عملته يا وداد كان عشانك، إنتي ليه مش مقدرة إنني محيت كل خطوط المستقبل اللي كانت مرسومالي بسببك؟ ليه مش شايقة إنني مفكرتش في حاجة غير فيكي، وف إنني أفضل جنبك؟ كل الحكاية إنني استغلّيت آخر طاقة ليا في التحمل والاستيعاب عشان نبقي لبعض، وأما وصلت لنقطة كل اللي محتاجه منك فيها مجرد فرصة تانية، لقيتك رافضة تدميالي، لقيتك واخدة قرار نهائي بسحب الثقة من غير حتى ما تشاوري قلبك جواكي اللي كنت براهن عليه، واللي وعدتيني

من أول يوم جمعنا فيه بيت واحد إنك هتخليه دايماً أساس لكل قرار هناخده، ولكل أزمة هنتعرضلها، فافكرة إنتي إيه من كل ده يا ووداد؟

– فافكرة إيه؟

– شكلي معقول كده يا أبيه؟

انبثق السؤال عبر شفتي أصغر شقيقاته التي انهمكت أمام المرأة في ضبط الطرحة على رأسها مدققةً في مدى تناسقها مع المكياج الذي تضعه، بشرود ودون تدقيق أجابها مع هزة رأس بسيطة:

– حلو يا بثينة، شكلك حلو.

اتسعت ابتسامتها أمام المرأة، ثم شرعت في إضافة بعض الحمرة لوجنتها في حين انشغلت أكبرهن في رسم حاجبها باحترافية بعد انتهاء الأخرى التي انحنت لتلميع حذائها الخاص بينما وقفت الوسطى بكامل جاهزيتها إلى جوار الباب في انتظارهم مشيرةً إلى بيجامته المنزلية التي ما زال واقفاً بها تتساءل:

– إيه يا أبو علي، إنت مجهزتش كل ده لسه؟

لم يسمعها، لم يكن معهن على الإطلاق، كان بكل كيانه ومشاعره هناك، مع الزفة التي تعالَى صوتها من الشارع بالأسفل، يتخيل فرحة حبيبة عمره ووداد بفستانها الأبيض وسط حشود المهنئين، تحتضن بكفها الرقيق كف شريكٍ تمنى لسنين أن يحتل مكانه، بصعوبة أخفى

من عينيه حسرة دفينية، دائرًا في أرجاء المكان بين شقيقاته كالتائه
ممثلًا الانشغال بشيء لا وجود له، ذلك الجرح العميق في روحه كيف
له كشقيقهم الأكبر أن يبديه؟

كررت شقيقته الوسطى على مسامعه السؤال فتمتم:

– خلصوا إنتوا عشان تلحقوا الزفة ومتسيبوش بنت عمكو
لوحدها، خلوني أنا جسعي مكسر من الشغل النهار ده مش
عارف ليه، تقريبًا كده خدت دور برد.

كانت حجةً واهيةً حاول بها تبرير اضطرابه، لم تتفهمها سوى
أكبرهن التي أخرت خطواتها في النزول وراءهما بعض الشيء لتتوقف
ممسكةً بالباب قبل انغلاقه خلفها ملتفتة نحوه وهي تقول بلهجة
حانية:

– أنا عارفة إن اللي عندك مش برد زي ما بتقول، إنت سبب
تعبك باين على فكرة.

ارتعشت شفتاه أمام كلماتها محاولًا الإنكار لكنها لم تمنحه
الفرصة.

– تعالى على نفسك وانزل يا حسن، لازم تنزل، مش عشان زي
ما قلت منبقاش سبنا بنت عمنا لوحدها، بس عشان إنت النهار
ده اللي مش تكون لوحذك.

لم يحاول الاعتراض هذه المرة، ولم يستنكر قولها، التوت
شفتاه فقط مقاومة عبرات وليدة التمتع بها مقلتاه فسارعت هي

بإشاحة وجهها عنه لتمنحه حرية البكاء قائلة:

– اوعى فتفكر إن حبك كان ضعف يا حسن، إنت عمرك ما كنت ضعيف يا خويا، واحد زيك شايل هم ثلاث بنات زينا مش غريب أبدًا عليه إنه يحب، ومش ضعف منه أبدًا إنه يحس بوجع خسارة الحب ده، بس أنا هقولك كلمة إنت بنفسك قلتها لي يوم ما فسخت خطوبتي من سنتين: «مش مهم تعجبنا ريحة الورد، المهم يكون مقطوف لنا».

ارتفع في تلك اللحظة صوت نداءات الأخریات لها من الخارج يستعجلنها فاستدركت ببعض العجل:

– مش هطول عليك، بس أنا محتاجة كمان شوية أشوف أخويا الكبير اللي بحترمه واقف رافع راسه قصاد الناس كلها تحت، عايزة أشوفك بتباركها بنفسك، وإنت مؤمن بالنصيب اللي شايلك حاجة أحسن.

قالتها وهي تستعد لإغلاق الباب خلفها والرحيل دون إضافة فاستوقفها مقتربًا منها ثم فرد ذراعيه ليضمها بهما إلى صدره قائلاً بصوت تهدج إمتنانًا وعاطفة:

– ربنا يخليكي ليا يا نعمة، أنا متشكر أوي.

دفنت رأسها بين ضلوعه مقاومًا رغبة في البكاء للحظة قبل أن ترفع عينها تجاهه وهي تقول بلهجة مرحة:

– مش عايزة المكياج يبوظ، هستناك تحت، إوعى تتأخر.

جاوبها بإيماءة من رأسه ثم أفلتها لتلحق بهم مغلقاً الباب وراها
ليفسح المجال أمام دموعه المحبسة، بكى بحرية أطفأت بعضاً من
النار المستعرة بداخله... يحتاج ألمانا المشتعل أحياناً لبعض من
العبرات كي يهدأ.

لم تنسل الدموع لأكثر من دقيقة فوق وجنتيه، مسحها بكف
أزالت رعشاته كلمات شقيقته منذ لحظات، ثم انتظر حتى هدأت
أنفاسه برغم ارتفاع صوت الضجيج بالأسفل قبل أن يدلف إلى
حجرته ملتقطاً قميصه الأبيض الذي أعده لمثل تلك المناسبات.

أصوات الزغاريد من الشارع تتعالى، هاهي ذي وداد تزوج، وردته
التي أمضى عمرًا في مراقبة مراحل تفتحها، ولم تُقَطَّف في النهاية له.

«أغمضي عينيك»... قالها وهو يلثم الخاتم المختوم بأول حرف
من اسميهما حول إصبعها، ثم همس: «واذكري دومًا أن لي هنا فوق
خنصرك قلبًا نابضًا بالحب، إن أبلته يومًا خطايا ترفقي، فلا سبيل
له في الحياة إلا صفحك».

ارتشف الدكتور إبراهيم رشفته الأخيرة من الفنجان البارد في
يده، ثم أغمض عينيه قليلاً محاولاً الاستمتاع بمذاق البن الذي فقد
ببرودته الكثير، وضعه أمامه فوق المكتب مرة أخرى، مد يده من
جديد لالتقاط القلم مسجلًا به ما تم سرده.

– اتجوزتوا في الآخر، قررتي إنتي تسيبي شغلك، وقررت إنت تسيب الفيلا بتاعة الوالدة وتروح تقعد معاها في شقة بولاق القديمة اللي سابوهاها أهلها.

هز كلاهما رأسيمها، فاستمر في الكتابة لحظة أخرى قبل أن يسأل:

– الكلام ده استمر لفترة قد إيه؟ وهل قاطعت والدتك تمامًا أيامها وللا كان في بينكم برضو منافذ اتصال؟

انشغلت عينا جلال الشاردتين بمتابعة سقف المكان الخالي أمامه وهو يجيب:

– مفيش حد بينفصل تمامًا عن أهله يا دكتور، قلتك في الأول إنني فضلت كتير أوي في محاولات لإقناع أمي بالموضوع، كنت عايزها تشوفنا زي ما احنا شايفين بعض، أو تقدر تقول إنني كنت بتمنى حقيقي إن ده يحصل.

سأله الرجل بعد هزة تفهم من رأسه:

– وعشتوا إزاي الفترة الأولانية دي من حياتكم؟ يعني لأي درجة قدرتوا مع بعض تواجهوا الظروف الجديدة اللي فرضتها عليكم الحياة؟

قلب كفيه على بعضهما مبتسمًا وهو يستعيد بذاكرته تفاصيل فترة بدت وكأنه لم ينسها مستفيضًا:

– عافرنا كتير أوي يا دكتور.

سرح مع جزء في الفراغ أمامه ثم أكمل:

– بالنسبالي إنت عادي تتخيل، الشاب المدلل اللي كانت كل حاجة متسخراله ومتيسرة، فجأة لقي نفسه مضطر يشيل مسؤولية بيت بتشاركه فيه إنسانة هو بيحها في منطقة شعبية مش متعود على حاجة واحدة من كل تفاصيل الزحمة اللي فيها، وعلى قد ما الموضوع كان صعب بس منكش إنه كان ممتع، كل يوم كنت برجع فيه نقعد أنا وهيا سوا، كان بيفكرني بحلمنا الجميل اللي بنبنيه مع بعض لحظة بلحظة...

أنا كنت مهندس حديث التخرج ساعتها، ومكنتش اشتغلت قبلها غير في شوية شركات خاصة مع ناس من معارف الوالدة، طبعا قبل ما يتم الجواز قفلتلي هي كوسيلة من وسایل الضغط بعض الأبواب اللي كانت مفتوحة قدامي للشغل... يعني، عمو إياه اللي كان بيديني فلوس نظير تدريبي في شركته لقيته بيقولي إن الشركة حاليا بتصفي عمالة وانهم هيكلموني في وقت تاني لو احتاجولي، والحاج صديق والدي الله يرحمه اللي كان متفق معايا على مشروع أمسكهوله رجع في كلامه فجأة بدون أسباب، طريقة استخدمتها للوي الدراع، كانت بتحاول تعجزني، بس كل ده ممنعنيش من إني أستمر في تحمل مسؤولية القرار اللي خدته...

ووداد كمان؛ صراحة ما اقدرش أنكر إنها برضو شالت معايا جزء كبير من الحمل، هيا بعد ما سابت شغلها نزلت تشتغل في مجموعة من المكاتب، تطول في واحد شوية ومتستمرش كتير

في الثاني، تعمل شغل كتابة في وقت فراغها من البيت، تترجم أبحاث، تطبع ورق...

نسيت أقولك صحيح إننا حوشنا وجبنا جهاز كمبيوتر ومكنة طباعة ألوان صغيرة عندنا في الشقة؛ كانت بتسندنا شوية لما الدنيا تزنق... اشتغلت في أكثر من مشروع، كلهم صغيرين لأن واسطتي مش معايا، بس بعضهم كان بيجيلي منه عائد كويس، وبعضهم كان يدوب بيسد خانة... خلال سنة قدرنا نجيب عربية صغيرة، هيا صحيح كانت مستعملة وطالع عين أبوها، وصحيح عرضتنا كتير لمواقف محرجة، بس أهو، اتفسحنا بيها وشفنا أيام حلوة أعتقد إنها فاكرها.

نظر لها وسط حديثه المتصل وابتسامة اشتياق أطلت من عينيه همس:

– فاكرة رحلة راس البر؟

منعها كبرياؤها من إجابته بهزة رأس، وإن لم يمنعها بعض الحنين من التمتمة:

– مش فاكرة غير إن شريف ساعتها سخن مننا ودخنالها على دكتور هناك ينزله الحرارة، وفاكرة برضو إن أمك مهنيتناش وقتها على ساعة واحدة نقعدها مع بعض باتصالاتها الكثير.

تدخل وسط حديثهم إبراهيم قائلاً يحاول تنظيم الحوار:

– نقطة نظام يا سادة، هو احنا موصلناش أعتقد لمرحلة ولادة

ياسين وشريف، فاخلونا بعد إذنكم نمشي بترتيب الأحداث.

التفت نحوه جلال بنفس الشroud معتذراً:

– آسف يا دكتور، بس أصل اليومين دول من الأيام اللي مبنسأهاش.

قالها وهو يخرج من طيات بذلته السوداء صورةً مد يده بها نحو الرجل قائلاً:

– الصورة دي ليهما التلاثة هناك عالبحر، وداد مع شريف وياسين، أنا اللي مصورها، كان عندهم فيها سنتين وأربع شهور بالضبط، مكتوب تاريخ اليوم عليها من ورا.

التقط منه الدكتور إبراهيم الصورة متأملاً ما فيها للحظة قبل أن يضعها إلى جنب الأوراق أمامه قائلاً:

– من الكلام دلوقتي فهمت إنك رجعت تتواصل مع الست الوالدة تاني، وإنها كانت مشاركاكو بشكل ما في تفاصيل حياتكم.

رد جلال وهو يعتدل في جلسته أمامه:

– ما أنا قلتك يا دكتور، محدش بينعزل عن أهله بشكل تام أو نهائي، بس طالما حضرتك طالب التفاصيل بترتيبها ف أنا هحكبك.

قالها ثم تابع مسترجعاً ترتيب الأحداث:

– في الشهور الأولانية بعد الجواز كنت بحاول اتواصل معاها، رحلتها الفيلا أكثر من مرة، وعديت عليها كتير في الشركة، كانت بتتهرب من إنها تشوفني ساعات، وساعات تانية كانت مقابلتنا لبعض مبتعداش النص ساعة، كلها عبارة عن لوم منها، ومحاولات التبرير والإقناع مني.

هي كانت زعلانة إني عصيت لأول مرة في حياتي أمرها، لأول مرة ابنها الوحيد يقف ضد رغبتها، يمكن وسيلة الوصل الوحيدة فترتها بيني وبينها كانت عم نعيم: السواق الخصوصي بتاعها من زمان، الراجل الأسمر ده اللي حضرتك ممكن تكون لمحتة الصبح معانا.

صحيح هو سواق عندنا من أيام ما كنت أنا لسه عيل صغير، بس العشرة خلطنا نعتبره جزء من العيلة، عن نفسي أنا كنت بعتبره برغم إنه مش كبير للدرجة في مقام والدي اللي ملحقتش أوعى عليه.

عم نعيم كان متعاطف لدرجة كبيرة مع موضوع جوازي أنا ووداد، هو راجل أسواني بيفكر بطريقة مختلفة تمامًا عن الطريقة اللي بتفكر بيها أمي، معندوش طبعًا حق فرض أفكاره واعتقاداته على المكان، بس كان معاه دايمًا المفتاح اللي يقرب بيه العقول ووجهات النظر من بعض.

ساعدني مثلاً في فترة من الفترات بعد ما خلاها تطلب –بشكل أقنعها فيه إنه من ورايا– من صاحب شركة هندسية كبيرة تعرفه إنه يشغلني عنده لفترة، وبمرتب كويس جدًا كمان،

تقدر تقول إننا كنا متواصلين بشكل أقرب للانفصال، فاهم قصدي؟

زي اتنين متخصصين في الفصل وقاعدين على نفس الدكة، لا منهم بيكلموا بعض، ولا فيهم واحد عايز يغير مكانه ويبعد عن الثاني، هيا كانت بتمثل دور اللي بيكره ومش قادرة تنفذه بحذافيره، وأنا كنت بتمثل دور اللي استغنى عنها وهو أصلاً عمره ما فكر في كدا ولا يقدر عليه.

كنت أفوت شهور مروحلهاش فيهم عشان أوحشها، وارجع بعدها أكثف محاولات اتصالي عشان تعرف إني لسه هنا، وإني لسه محتاجها، لعبة قط وفار فضلت أنا وهيا لفترة بنلعبها مع بعض لحد ما نبتة حبي أنا ووداد طلعت للنور، ورزقنا ربنا منها بشريف وياسين.

قالها مستعيداً شعور اللحظة الروحانية العظيمة تلك حين احتوى طفليه لأول مرة، فابتسم ابتسامة امتنان رmqتها وداد بنظرة مستنكرة في حين بادلته الدكتور إبراهيم مثلها وهو يدرك أثر الماضي العميق عليه، لم تتفهم هي ذلك، ولم تعترض أيضاً عليه، فقط التقطت جزءاً من حديثه في النهاية وهي تقول ببعض سخط:

- بتتكلم على إنك كنت لوحدك اللي بيضحى عشان المركب تمشي، مقلتش ليه للدكتور إني حاولت معاك أكثر من مرة نروحها ونطيب خاطرها؟ مقولتلوش ليه إني اتصلت بيها كتير من وراك عشان تيجي تشوفك أيام تعبك في البيت؟ محكيتش إني رضيت بالعيشة معاها في الفيلا احتراماً لطلها وراحتك بعد

ما خلفنا العيال؟ وإني في مقابل ده استحملت المرار لسنين؟
كل الحجات دي إنت ليه مقلتهاش؟

بددت بعباراتها الاعتراضية ابتسامته، أو أن طيف ذكراه كيفما
حل رحل، فنظر نحوها للحظة مستنشقا من هواء الحجرة كميةً
كبيرة من الهواء البارد حاول بها استيعاب الواقع قبل أن يومئ برأسه
المكدود أمامها مشيرًا بيديه نحو ممتما:

– زي ما قالتك بالضبط يا دكتور، هيا فعلاً عملت كل ده.

ثم تابع الحكى.

فتح الباب بعد الطرقات فوجدها أمامه، أمه، تلك التي عاندها هو
في زواجه وعاندته هي في القبول، على مدى عام كامل مر عليهم في بيت
الزوجية المتواضع بقلب تلك المنطقة الشعبية لم تزره، كمفاجأة
على عتبة الباب كما عهدها وقفت قوية، ثابتة، يغطي الجمود قدرًا
من مشاعرها، ارتباك أصابه ودفعه لتطويقها فرحًا بكلتا ذراعيه وهو
يهتف:

– أنا مش مصدق إنك أخيرًا هنا.

شعر بضغط ذراعيها حنواً للحظة على ظهره، قبل أن تدفعه
بعيداً عنها وهي تقول بصوت هادئ شابه نظرتها إليه:

– عرفت من نعيم امبارح إنك جيت توأم.

أفصحت لها عيناه عن فرحة لا مثيل لها وهو يفسح أمامها المجال لتدلف إلى الداخل بخطواتها البطيئة قائلاً:

– أيوة يا أمي الحمد لله، جالنا شريف وياسين، اتصلت كثير بيكي وكان نفسي تكوني حاضرة فلحظة وصولهم، شعور مش قادر أوصفها لك والله.

تبادر إلى ذهنها أن تخبره بمدى إدراكها لهذا الشعور، لكنها استعاضت عن ذلك بقولها الجاف المقتضب وهي تدور بعينها في أركان المكان البسيط:

– أديني جيت.

ثم استطرقت وهي ترمقه بنظرة ذات مغزى:

– ده لو الست مراتك سمحت طبعًا.

لم يتوقف عند إشارتها وهو يفتح ستائر المكان المعتم ليمتلئ بنور شمس الظهيرة الآتي من الخارج قائلاً بحماسة:

– دي هتطير من الفرحة بجد أما تعرف إنك هنا.

كان يتحدث وهو يحاول حمل حاجياته وملابسه الملقية في الأرجاء بإهمال كملاً:

– معلش الدنيا مكركبة شويتين، وداد أصلها آخر شهور الحمل مكانتش بتقدر على شغل البيت، وأنا زي مانتي عارفة، خايب في عمایل البيت ومبعرفش أحط حاجة في مكانها.

أكملت جولتها الاستكشافية في المكان بعينها، تأملت جهاز الكمبيوتر القديم الموضوع فوق منضدة خشبية متهاكة أمام كرسي بلاستيكي غطته الحاجيات المتراكمة عليه، وتلك الأسلاك المعقدة فوق الأرض وعلى الحائط هنا وهناك، ثم عادت لترمقه بنظرة استهجان ساخرة وهي تقول:

– مطلعتش عمایل البيت بس اللي إنت خایب فیها.

التقط ما تقصده فسارع بالتهرب وهو يخبرها:

– ثواني معلش بس هدخل أصحیها عشان نایمة فی الأوضة مع العیال وأقولها إنك هنا.

ثم توقف في منتصف المسافة مرتبكًا من فرط انفعاله ليسألها:

– قوليلي الأول بس أجيبلك إيه تشربيه؟ شاي؟ وللا أندع عالكشك اللي تحت يطلعنا كازوتين حاجة ساقعة؟

– كازوتين؟ لا ما شاء الله واضح إنها أثرت عليك بزيادة.

قالتها بنفس ذات النبرة التي حاول مرارًا التهرب منها، ثم استطردت بغير اكتراث:

– متجيش حاجة، روح صحي اللي هتصحيه، أنا مش جاية أشرب كدا كدا، نعيم واقف مستنيني تحت ومش ناوية أطول عشان ورايا اجتماع في المكتب.

من عشرتهم كان يتفهم أسلوبها، يدرك أيضًا مدى عنادها،

وقدرتها على ترويض كل مشاعر الضعف بداخلها وقتما لزم الأمر، لذلك وفر على نفسه جهد الاعتراض، ولم يطالبها بمزيد من الوقت للبقاء، فقط هز رأسه متفهمًا ما أعلنت عنه وهو يتجه مع ارتبائه أمامها نحو باب إحدى الغرفتين المنغلقتين في المكان مكرّرًا عبارته:

– دي هتفرح أوي بجد أما تشوفك، مش هتصدق نفسها والله أنا واثق.

قالها وهو يقبض بيديه على مقبض الباب ويفتحه بهدوء حاول أن يتناسب والنائمين في الحجرة من خلفه، فاستوقفته هي بعبارة أخرى قائلة:

– وشك خاسس أوي يا جلال، واخذ بالك إنت وللا محدش بيقولك دلوقتي الكلام ده؟

استدار نحوها يرمقها بنظرة حملت دفقة حب، ثم هز كتفيه بلا معنى مبتسمًا قبل أن يعاود مرة أخرى تسلله إلى داخل الغرفة المعتمة، لحظات أمضاها بالداخل، استرقت السمع خلالها لبعض المهممات الخافتة وهي تقف منتظرةً بالخارج كاتمةً الاضطراب الذي اختلج به صدرها، لحظات بدت لها طويلةً أطل برأسه بعدها من الداخل يشير إليها أن تعالي، فتقدمت ملتقطة أنفاسها وبخطوات اختفى وسط تباطئها الارتباك خطت إلى داخل الغرفة بعد أن أشعل هو زر إنارتها لتستقبل أمامها كل شيء.

فراش يحتل المساحة الأكبر من المكان، ترقد وداد فوقه بعين نصف مفتوحة، وتلتصق خصيلات من شعرها فوق جبهتها المتعركة

تمامًا كاللتصاق منامتها الصيفية الخفيفة بجسدها، تلك التي مدت يدها لتعديلها من فوق رأسي الجسدين الصغيرين المجاورين لها، كالملائكة كانا، طفلان نائمان تتحرك أجسادهما بأنفاس نقية طاهرة لا دنس فيها، لم تجد وصفًا حقيقيًا وافيًا لذلك الإحساس الذي بادرها حين رأتهما، أقل ما شعرت به حينها لم يكن أبدًا ليوصف، لم تسمع عبارة وداد الوحمة التي قالتها بصوت ناعس ترحيبًا بها، ولم يسترع انتباهها لقول ابنتها: كم هما جميلان.

بأصابع لم تفقد بعد حنوها تحسست وجنتهما الناعمتين، وبانفصال تام عما حولها مدت يدها ترفع أحدهما وتضمه لصدرها الدافئ مرتبة على رأسه الصغير الذي اضطرب لجزء من الثانية قبل أن تعاود أنفاسه رتابتها من جديد بين ذراعيها أمام عيني والديه الذين تبادلوا نظرة مختلسة مترقبة قطعتها هي وهي تسأل:

– ودا ياسين بقى وللا شريف؟

تردد الأب قبل إجابتها وهو ينقل بصره سريعًا بين الرضيعين في حين جاوبتها الأم دون تفكير:

– شريف اللي في حضنك ده يا طنط، ودا ياسين؛ أخوه الكبير، سبقه للعالم بتلات دقائق.

قالتها وهي تشير إلى ذلك الآخر الذي جاورها والذي تحرك جفناه قلقًا بفعل الأصوات المحيطة به قبل أن ينفجر في صراخ اعتادته فمدت يدها تحمله مهددة قبل أن تكشف صدرها وتلقمه إياه لهدأ من جديد.

– شفتي يا تيته بقى أحفادك حلويين ازاي؟

قالها جلال محدثاً أمه وهو ينقل بصره بينها وبين زوجته المترقبة معه لردّها، فرفعت عينها نحوهم، ثم دارت ببصرها في أنحاء المكان متمتمة وكأنها لم تسمعه:

– بس المكان هنا حر عليهم أوي، معندكوش تكييف في المكان ده؟ العيال يا حبة عيني كدا تفتّس.

تحفزت ملامح وداد في حين ابتلع جلال ريقه وهو ينهض باتجاه المروحة المنطفئة في ركن المكان قائلاً:

– هنجيب تكييف بإذن الله، احنا متفقين مع بعض على كده من فلوس الجمعية اللي هنتبضها كمان كام شهر، حالياً ساعات بنشغل المروحة دي لما الحر بيزيد.

لوحث له بكفها وهي تقول:

– لا، مروحة إيه اللي هتشغلها وهما عرقانين كدا؟ إنت بتستهبل؟ خلمها مطفية زي ما هي، العيال لسه ضُعفا ومش ناقصة ياخدوا دور برد في السن ده.

مال طرف شفتيه بحمل ابتسامه لاهتمامها الواضح بهما وهي تتابع:

– التكييف أنسلهم من المروحة، حاجة تضبط حرارة المكان اللي قاعدين فيه عشان يناموا نوم مستقر عن كدا شوية.

حرك كتفيه متممًا:

– قريب إن شاء الله، ربنا يكرم بس لحد ما نعدي الكام شهر الجايين دول.

بلهجة رسمتها أمره لتمجي عنها صفة الرجاء قالت:

– لا كام شهر ولا كام يوم، إنتوا تلموا حاجتكووا الفترة دي وتيجوا تقعدوا عندي في الفيلا، أوضتك هناك فاضية محدش في المكان بيستعملها، والتكليف أهو مركون جواها مبيعملش حاجة، وأهو العيال يكبروا في جو مناسب وأهدى بعيد عن صوت الزحمة والتخبيط اللي طالع من الورش اللي حولين المكان دي.

حينها، وبعد عبارتها الأخيرة صمت الاثنان، فقد كان كلامها إيدانًا ببدء مرحلة جديدة من علاقتهما ببعض، مرحلة مختلفة.

الفصل الرابع

«بقدر التوقعات الحاملة تكسونا الخيبات»

طرقات خجلى على الباب الموارد قطعت أمامه طريق السرد وأمام خواطري رحلة استرسالها، فالتفت كلانا على إثرها نحوه مراقبين أزيز انفتاحه البيطى الذي كشف لنا عن الوجه الواقف وراءه؛ يطالعنا بعينين لم يزل أثر النعاس منهم بعد، مترددًا وقف أمامنا برأسه الأقرع وذلك الجرح القطعي من أعلى الجبهة حتى منبت حاجبه الأيسر؛ يستأذننا بنظراته الدخول: عسلية، صاحب الملامح التي لم تحمل نصيبًا من اسمه، وأول من لاقيت يوم استرداد وعيي في هذا المكان، لا أعرف أكنية كان الاسم؟ أم لقبًا لعائلته؟ لكن الجميع هنا اعتاد دعوته بذلك.

– صباح الخير يا عسلية، مش عوايدك الصحيان بدري كدا،
في حاجة؟

استقبله الدكتور إبراهيم بسؤاله، فبدا عليه للحظة الارتباك
متمتمًا بلسان ثقيل:

– سمعت صوتكم من ورا الباب فقلت يعني!

بحث عن كلمات يكمل بها عبارته لم يجدها إلا في نظرتي المتأملّة
لملامحه، فتمتم وهو يبادلني مثلها بصوت خفيض:

– إنت خارج النهار ده خلاص يا زميلي؟

لم ينادني يومًا بغير تلك الصفة، هذا الذي شاركني في المكان أيامًا
سيصعب عليّ حقًا نسيانها، بادٍ أنه سيشاركني شعورًا بالفقد إبان
الرحيل، أمضينا هنا وقتًا لن تستهين به الذكرى، أو مات له بالإجابة
أن نعم، فلوى شفّتيه ضاغطًا على أسنانه من خلفها وكأنما يحاصر
شعورًا ألم به قبل أن يلفظه بكلمة واحدة:

– هتوحشنا.

قالها بصدق فطري استرجع معه عقلي ذكرى مشهد اليوم الذي
تخلّى فيه الموت عني حين استعدت الواقع من جديد، ورأيت.

ها أنذا، الناجي من موت تمناه بكل أسف وحسرة، اليوم بكل
الخيبة أستفيق، عدت برغم رهاني على الرحيل، ما زلت هنا، ما زلت
أتجرع الواقع الدميم حد الشمال، لا أدرك كم أمضيت من وقتٍ في
غيوبتي، لكنه انتهى الآن بعينين تمارسان وظيفتهما الطبيعية في
الانفتاح، وعقل يستعيد قدرة الإدراك شيئًا فشيئًا.

لم تزعجني رائحة العطن المحيطة بي في المكان قدر انزعاجي
من البقاء حيًّا قادرًا على تمييزها، سخطي من تلك الأنفاس في صدري
يفوق كل سخط يجانبه، ها هو ذا الواقع يبث في رأسي كبدائية سموم

أسئلته التلقائية المأفونة.

أين أنا؟ وما هذا المكان؟ أرقد على فراش مغطى بملاءة بيضاء مائل للصفرة لونها، عتمة المكان تسيطر، لكنني أستطيع بشيء من الجهد تمييز حواف جدران رمادية اللون، وتلك الكتابات العشوائية المنتشرة فوقها، جدران صماء بدون نوافذ؛ أوحى لي من عقلي الباطن بصورة رسمتها للقبور وسرعان ما تلاشت، لا تتسع القبور لشيء إلا الموت.

حاولت التدقيق في الظلمة قارئاً بعض المكتوب، كلمات جميعها مألوفة تحمل سمياً واضحاً للحياة: «للذكرى الخالدة»، «ليس لدينا ما نخشاه»، وعدة أسماء مع خواطر شوق حفرها أصحابها في الأركان بأيديهم، ولا يحمل عقلي فيما بينها أي رابط.

أين أنا؟ تلك الهمهمات والأحاديث المتنامية إلى أذني من مكان ما لا أحدد مصدرها، ولا أميز منها شيئاً، كأنها تحدث داخلي، حاولت بصعوبة تحريك يدي مستنداً على الحائط الرطب مقزز الملمس بجاني للنهوض لأدرك وجود ذلك الخرطوم المتصل بوريدي والذي علق المحلول الشفاف في نهايته على قائم الفراش المعدني.

أجزاء متفرقة من جسدي تحيط بها الضمادات، في إحدى الأماكن العلاجية أنا إذاً؟ ربما، لكن أي نوع من المشافي هذا الذي يحوي غرفاً لا نوافذ فيها؟ أشعر بالاختناق، وبرغبة عارمة في الصراخ كتلك التي تخالج كل جنين يستقبل العالم لأول مرة، أجبرني الألم في جسدي على العودة إلى وضع السكون، وعقلي المبتئس يعمل جاهداً لاستيعاب المشاهد كلها.

ببعض ومضات متداخلة لا أفهمها حاولت ذاكرتي المساعدة...
مبضع فارغ، وبعض قطرات دم، وهج نيران حول سيارة منقلبة
وسط صرخات وحالة من الهرج، عصفور أزرق يلتقط شيئاً من فوق
الأرض ويحلق، زجاج متسخ تصنع أنفاسي الساخنة فوقه مساحات
من البخار؛ أرسم بإصبعي عليها أشكالاً مبهمه كتلك المقيد بها عقلي
ولا يجد من بينها لوعيه الكامل مفراً.

متاهة تكتفني وأفامها من دون جدوى، انتشلي من برائتها ذلك
الظل المتسرب عبر باب أدركت وجوده لتوي في ركن من الأركان
المحيطة، يتسلل متمدداً فوق الأرض باتجاهي سابقاً صاحبه الذي
لحقه حتى عتبة الباب لتكتمل هيئته الخارجية في النهاية أمامي، هزياً
يمسك عصاً ممسحة طويلة بين يديه، ويمنع الضوء المنبعث من
خلفه تبيني لكامل تفاصيله.

تراجع إلى الورا قليلاً حين رأني، بدا وكأن وجودي يفاجئه،
ولربما توجس خيفة كتلك التي توجستها مع اقترابه واتضح ملامحه
أكثر لعيني، قمعي البشرية كان برأس حليق ووجه يحمل جرحاً قطعياً
بطول الجمجمة وحتى منبت الحاجب الأيسر، قسما لا تمنحك شيئاً
من راحة، كشفت لي العتمة المنقشة ببطء عن ابتسامه استقبلي بها
صاحبها، وأظهرت صف أسنانه الصفراء قبل أن يهتف:

– حمدلله عالسلامة يا زميلي، إيه يا عم كل ده؟ خمس أيام
مغيب؟ إنت كنت رافع صيدلية قبل ما يجيبوك على هنا وللا
إيه؟

تسببت جملته في ازدياد لحالة التشتت الذهني التي أعاني منها مذ

صحوت، فانعقد حاجباي بشيء من الحيرة وعلق لساني في الجوف الجاف قبل أن تخرج منه الكلمات متحشجةً وبصوت واهن:

– أنا فين؟

بدا الاستنكار على ملامحه واضحا وهو ينحي ممسحته إلى الجدار قائلاً:

– إنت في المصحة هنا يا زميلي.

مصحة؟ ما الذي تعنيه الكلمة تحديداً؟

– مصحة إيه؟ ومين إنت؟

سألته وأنا أصارع مرةً أخرى للاعتدال أمامه، فسارع يحاول معاونتي وهو يمد يده تجاهي مصافحاً مع رده:

– أنا زميلك هنا في المكان، تقدر تقولي يا عسلية، ده اسم الشهرة بتاعي.

ببعض جهد رفعت يدي لمصافحته دون أدنى شعور داخلي بالألفة نحوه، فشد عليها بكفه المتعرق مستدرگاً:

– إنت بقى إسمك إيه؟ وإيه حكايتك بالضبط؟

خامرني الاضطراب بسؤاله، حقيقةً لم أملك لحظتها الإجابة، بدت غربتي وكأنما امتدت من جهلي بالمكان إلى نفسي، بكل الصدق لم أكن أعرف حقاً من أنا، ولا علم لدي عن كيف أتيت.

بجوار السيارة التي تصاعد منها الدخان الكثيف وقفت، تراقب
نعيم الذي انحنى برأسه على مقدمتها المفتوحة يحاول مد يده لفتح
غطاء المياه الملتهب من فرط السخونة قبل أن يتراجع ملسوعاً
بحركة حادة وهو يزفر في حنق:

– يادي الهم، العربية مولعة.

سألته:

– معرفتش لسه الدخان ده طالع مين؟ مكانت لسه كويسة
ومفهاش حاجة.

أشار لها بالصبر وهو يتتبع ببصره الأسلاك والخراطيم المعقدة
أمامه لاستيعاب الأمر قبل أن يتراجع معتدلاً للوراء باحثاً فيما حوله
عن قطعة قماش مسح بها يديه مغمغماً:

– مش حاجة كبيرة إن شاء الله، الظاهر بس إني مبصيتش على
المية الصبح قبل ما نتحرك، الأيام دي حر زيادة واحنا برضو
فضلنا مشغلين التكييف زيادة عن اللزوم.

ثم دار حول السيارة ليفتح حقيبتها الخلفية ملتقطاً منها وعاءً
بلاستيكياً فارغاً حمله في يده موضحاً:

– هنسيها تبرد حبة على ما أجيب ميه من عند الجماعة هنا؛
أملى بيها الريداتير بدل ما ندخل في وش سلندر وتبيتنا جنبها،
ربنا يستر.

هزت رأسها بنصف فهم لما قاله وهي تلوح بالمروحة الخشبية

فوق وجهها مسترجية من الرطوبة المحيطة بعض الهواء مع تمتتها:

– طيب، روح شوف هتعمل ايه.

قالتها وتابعته ببصرها وهو يرحل باتجاه ذلك العجوز الجالس إلى جوار البوابة شارحاً له الأمر قبل أن يدلف عبر البوابة الحديدية معه إلى الداخل، وتخطى البوابة خلف العجوز الذي أشار له ناحية صنبور مثبت في منتصف الحديقة دائراً ببصره في المكان الرطب متحرراً فوق العشب باتجاه غايته، مساحة خضراء يحتل مقدمتها ذلك المبنى ذو الطابقين الذي يبدو ظاهراً للمارة من الخارج، وعلى بعد منه في نهايتها ذلك المبنى العريض المكون من طابق أرضي واحد لا تحتل النوافذ كثيراً من مساحة جدرانها الطوبية المطلية بدهان أبيض.

انحنى بظهره لفتح الصنبور واضعاً الدلو أسفل فوهته التي تدفقت خلالها المياه منشغلاً بمواصلة التأمل في تفاصيل المكان، لفت انتباهه ذلك الأشعث الجالس وحيداً على مقعد الانتظار في الشرفة الخارجية للمبنى القريب، هو يعرفه، الأسطى حسن، لاقاه أكثر من مرة في تلك المنطقة الشعبية أسفل منزل وداد، لاحظ البيوس المرتسم على هيئته ووضع جلوسه، لكنه لم يتفهم حقاً أسبابه، أيضاً هو – ذلك الحزين البائس – من موضعه البعيد رآه.

– نهارك فل يا أسطى حسن.

هتف بها نعيم ملوحاً له بيديه في محاولة لتبديد التوتر المحيط وهو يتابع بطرف عينه امتلاء وعائه بالماء، بادله حسن التحية دون النبس بكلمة، وعيناه الشاردتان تحملان نظرة متسائلة رفع الأخير

أمامها الوعاء الممتلئ لتوه وهو يهتف:

– العربية محتاجة شوية ميه.

حرك حسن رأسه في صمت مرة أخرى، ثم تابع من مكانه الرجل الذي اتخذ طريقه مع حملة بعد إغلاق صنبور المياه إلى الخارج، مستعيدًا مع رحيله أمامه ذكرى كان يبحر بين تفاصيلها، وشعورًا بالأسى.

لطالما واصل خداع نفسه، لطالما استمر في ادعاء الثبات بعد زواجها على الآخرين وهو لا يدرك أنه وحده المخدوع بين الجميع، لشهور بعد ارتباطها خاصم الشارع، خاصم عمله وورشته المقابلة لعش زواجها جاعلاً أكبر هم له التهرب من أسئلة شقيقاته المتكررة حول حقيقة ما به وأسباب ذلك البؤس الذي أصابه.

رسم الحزن خطوطاً على وجهه، وأضاف هالات من السواد أسفل عينيه التي فقدتا بريق الرغبة في الحياة، مرارًا سألوه عن السبب، مرارًا حاولوا تسليط الضوء على ما يحاول بكفٍّ إنكاره، لكنه كان عنيدًا لدرجة يصعب اختراقها، وحدها أكبرهن كانت تفهم، وتحاول لأحيان احتواء حزنه، لم تشعره يومًا بالشفقة، بيد أن شعورًا تملّك منها تجاهه، دعمته دومًا بحديثها عن تحمل القدر وتقبل النصيب، وعن أهمية أن يعاود عمله من أجل نفسه، ولأجلهن.

– أنا مش بهون من خسارتك، بس حاول متخسرش أكثر.

كانت تلك كلماتها التي انصاع بعد شهور لها، وافقها في النهاية ليس اقتناعاً قدر شعوره بالمسؤولية تجاههن، عليه أن يعاود الحياة وعمله من جديد، عليه أن يستمر محاولاً نسيان كل ما عاش في الماضي آملاً تحقيقه، عليه أن يتقبل كل يوم رؤيتها مع من اختارت، وأن يخفي حقيقة مشاعره التي لم يصرح يوماً في السابق عنها رغم كونها واضحة جلية في كل تصرفاته، شهور مرت كادت نفسه فيها أن تصدق أمر النسيان الزائف، ذلك الشعور القائم على أساس واه من الحنق بداخله.

«كما تركتني سأتركها، كما نسيته سأنساها، وكما اختارت لنفسها طريقاً جديداً سأختار لنفسني طريقاً لأجله أستم، لم تتوقف الحياة يوماً على أحد، ولن يحدث»، حدث نفسه مراراً بذلك، «لدي مسؤوليات عليّ مواصلة تحملها، في عنقي من الشقيقات ثلاثة، لكل منهن متطلبات، ولكل منهن أحلام عليّ السعي لتحقيقها»، بتلك الأساسات البائسة أعان نفسه على النهوض مرة أخرى، وشد بها أزر خيط ضعيف من رغبة النسيان فيه، لكنها لم تكن بأي من الأحوال كافيةً لشد أشرعة سفينته المكدودة أمام ريح جديدة هبت عليه مع خبر ولادتها.

ذلك الخبر الذي اجتث قلبه من تربة وهم غرس فيها قدميه ليلقي به مرة أخرى بين برائن التيه، كان يدعي النسيان، ويمثل التقبل أمام حقيقة يعجز عن تقبلها، لكنه في الواقع لا يفعل، ليس صلباً كما ظنوا، وليس أقسى صلابة على نفسه غير حقيقة تتجدد كل يوم أمامه وتخبره بأنها ضاعت.

ولادتها استعادت ألمه مرة أخرى، لكنه في تلك المرة لم يستسغ فكرة الانهيار أمام شقيقاته، قسى على نفسه بمواصلة التمثيل واصطناع التماسك، ها هو ذا مرة أخرى يقف بين أخوته وصفوف المهنئين على ولديها التوأم، يلامس وجنتي الطفلين كما لامس وهو صغير بكفه الصغير وجنتها، نفس الكف، لكنه لم يكن أبداً نفس الشعور.

في صباحه التالي صحا، وكألة عودها الروتين على التكرار أشعل سيجارة من علبته تمنى أن تكون الأخيرة، تلقى صباحات أخواته بنصف ابتسامة، ثم ترك الفطور المعدّ له مشعلاً سيجارة أخرى قطع معها الطريق إلى ورشته.

الهواء ملبد حوله في الشارع بلون أساه، والمارة من حوله كلهم كأشباح، لا يعنيه منهم أحد، يرفع بين التارة والأخرى أحدهم يداً له بتحية لا يملك بالأ للرد عليها، وصل لورشته ككل صباح ففتحها بعقل وجيع لا يحمل بين طياته إلاها، خائضاً في صراعاته المعتادة مع ضميره اللاتم، ما الذي ينقصه لنسيانها؟ تلك الصورة التي صنعها لحب تغيرت صاحبتة، في عقله كيف لا تتغير؟ كيف؟ لقد شهدت عيناه زواجها، شهدت مشاعره التقاء كفها في عشق بكف شريك تمنى أن يكون مكانه، وشهد بنفسه ذلك الانتفاخ المتنامي في بطنها يوماً بعد يوم إيداناً بوصول دليلٍ جديدٍ على خسارته الواقعة بالفعل منذ عام كامل.

حين رآها تعود أمامه من المستشفى بطفلها لماذا تألم؟ لِمَ استعاد قلبه الوجد القديم كأنما لم يشف أبداً منه؟ وكأن الأيام

تمضي فقط لتنميه، يا لهذا العشق في قلب ضير، بات سُمًا ما كان في الماضي دواه.

استعادت ذاكرته مشهد السيارة الفارهة التي توقف بها سائقها أمام ورشته في ذلك اليوم، يهبط من مقدمتها بلباس السائق رجل أسمر في أواخر الثلاثينيات من العمر سارع بفتح بابها الخلفي لهبوط تلك السيدة ذات الشعر الرمادي المصقّف بعناية تناسبت مع ملابسها الأنيقة، استرعى المشهد حينها انتباهه، فتابعها وهي تشير لسائقها بإشارة ما قبل أن تتركه متجهً نحو البناية المقابلة له، تلك التي تقطنها وداد، مكمّن حبه الضائع، واختفت السيدة في مدخل البناية المعتم بينما أضاء هو الفضول دواخله.

بشيء من الجراءة اقترب في اتجاه السائق بنية فتح حوار معه قائلاً:

– معلش ياباشا بعد إذنك إنت راكن كدا قدام محل أكل عيش.

رفع الأخير كفه نحو صدره معتذرًا وهو يقول:

– معلش يا اسطى إنت شايف الشارع هنا ضيق ومفيش مكان ثاني أقف فيه، استحملني بالكثير ربع ساعة بس لحد الست هانم ما تخلص زيارتها فوق وتزل.

تردد حسن محاولاً صبغ استفساره بتلقائية بات ساذجًا في اصطناعها وهو يغغم:

– والله إنت كدا بتخرجني، بس هيا لا مؤاخذه الست هانم طالعة العمارة دي تزور مين؟

حمل استفهامه تدخلًا سافرًا لم يجد السائق داعيًا حينها
لاعتراضه فأتاه منه الرد المتوقع وهو يقول:

– بتزور ابنها المهندس جلال، الراجل اللي ساكن في الدور
التاني هنا لو تعرفه.

ارتعشت شفتاه برغم التوقع وهو يتمتم:
– عارفه، أه.

أنى له ألا يعرف ذاك الذي اغتصب منه حلمًا وحيدًا؟ أنى له
إنكار اسم بات يجاور دومًا اسمها؟ تغاضى عن خواطره محاولاً نفذ
السخط الوليد بداخله وهو يواصل أسئلته للرجل الذي بدا ودودًا
بشكل مشجع:

– غريبة، أنا أول مرة أشوف حد من عيلة الباشمهندس جلال
جي يزوره هنا.

وبتلقائية متأصلة في طبعه رد الأخير:

– لا عادي مش غريبة ولا حاجة، الموضوع كله خصومة
أسرية بينهم خدت وقتها مش أكثر، وإنت عارف في الآخر زي
مابيقولوا الدم بيحن، الست هانم أول ما عرفت أن ابنها خلف
جت جري عشان تشوف أحفادها.

لم يكن حسن على دراية بشيء من تفاصيل الخصومة تلك،
فاستحثه نهمه لمعرفة المزيد إلى دعوة الرجل لكوب من الشاي وهو
يشير له قائلاً:

– اتفضل طب يا باشا، ميصحش تفضل واقف جنب العربية
كدا، تعالى اقعد معايا هنا في الطرواة نشرلنا كبايتين شاي.

قالها وهو يجلب من داخل ورشته كرسياً وضعه أمام الأخير قبل
أن يعرفه بنفسه قائلاً:

– أنا حسن، محسوبك حسن، أسطى سمكري هنا زي ما
حضرتك شاييف، وابن عم الست وداد مرات الباشمهندس
جلال على فكرة، يعني مش غريب.

قالها محاولاً بث نبرة الود فمها رغماً عنه لتشجيع الرجل على
الحديث وهو يمد له يده بالسلام مستطرداً:

– متشرفتش باسم حضرتك.

صافحه الأخير بدوره رافعاً إحدى حاجبيه قبل أن يتخذ مقعده
إلى جواره مجيباً:

– تشرفنا يا أسطى حسن، أنا نعيم.

برغم من أن سنيماً مرت على لقاءهما هذا إلا أنه لم يفتأ يذكر
تفاصيله، لم يزل يذكر حوارهما القصير في هذا اليوم جيداً، ذلك
الذي تلاه بأيام حضورهما بالسيارة من جديد، دون أن يهبط منها أحد
فيهما، فقط توقفا أمامه، بادله نعيم من داخلها التحية، ليظهر بعد
دقائق من مدخل البناية المقابلة لجلال حاملاً في يده حقيبة كبيرة،
وتجاوره بحملها الصغيرين وداد، وبصمته المكتوم في هذا اليوم
راقبهم يستقلون السيارة التي انطلقت بهم على فورها مبتعدة في الأفق.

انتظر ليلتها عودتهم من جديد، وطال انتظاره لليال أخرى، لكنه أدرك في النهاية أنها الأقدار، تمنحه وداعها الصارم من جديد.

«على كذا سبتوا البيت اللي اتجوزتوا فيه، ورحتوا تعيشوا مع الست الوالدة اللي كانت رافضة جوازتكوا دي من الأول». تمتم بها الدكتور إبراهيم أمامهم محدثاً نفسه في بطاء وهو يعدل من وضع عويناته فوق أنفه متأملاً ملامحهما المتوجمة بعد انتهاء جلال من حديثه قبل أن يتابع:

– في اعتقادي إنها كانت فرصة لبداية جديدة تقدرؤا خلالها تتخلصوا من كل المشاكل النفسية اللي بين حضرتك والست إشراق.

ألقى عبارته المجزأة على مسامعهما ملتقطاً قلمه من جديد ليدون فوق الأوراق أمامه بعض الملاحظات، بينما ندت من بين شفتي وداد التي قصدها بالعبارة ضحكة ساخرة مريرة وهي تغغم:

– قصدك بداية لفصل جديد من المشاكل.

التفت الرجل نحوها مانحاً إيها دعوة لم تكن بحاجة إليها لاستكمال عبارتها، كان القهر المتأصل في روحها هو دافعها الأقوى في مواصلة الكلام، نظرت إليه متجاهلة تماماً وعن قصد هذه المرة وجود طليقها معها في المكان، حاولت رسم ابتسامة متهمكة فوق شفيتها لم تكن بالقدر الكافي من التوازن وهي تستطرد حاكية:

– لو في حد أقصى للكرهية تعرفه يا دكتور مش هيجي جنب كراهيتي للرجال اللي قاعد قدامك ده هو وأمه ف شيء.

لم يحاول جلال إبداء أي تعليق على عبارتها، لم يبد عليه العجب أصلاً لسماعها، ولم يرغب الدكتور إبراهيم في مقاطعة حديثها الذي أكملته بعد تنهيدة صمت.

– أنا عشت عشان خاطر البني آدم ده هو وعيالي سبع سنين من الذل في بيت صاحبتة، متقبلتش ولو للحظة وجودي، كنت بمني نفسي كل يوم بالأمل، بصبر نفسي وأقول معلش استحملي، الوقت ببيغير القلوب ويحننها، كانت كل يوم الصبح تبعت الشغالة تصحيه ينزل يفطر معاها تحت وأنا أنزل لوحدي أجيب فطاري بنفسي من المطبخ.

حتى في أعياد ميلاد العيال كنت أقف دايمًا وراهم في آخر الصف عشان مضايقش حضرتها بوجودي، وكان هو كل اللي بيديهولي طبطبة رخيصة في آخر اليوم مع كام كلمة، معلش، عشان خاطري استحملي.

لما العيال كبروا شوية وقتلته يسيبني أنزل أدور على شغل يشغلني ويبعدني شوية عن القفص اللي حبست نفسي عشانهم فيه رفض، قاللي إن الظروف اتحسننت، وإن شغلي مش هيفيد فائدة وجودي مع العيال في البيت.

كل يوم كان قلبي بيتحرق ألف مرة مع كل كلمة مسمومة بسمعها، وكل نظرة احتقار بتتبصلي.

كان بكاؤها يؤلمها، أمسى هذا واضحًا في سكتاتها المتكررة وسط الحديث لالتقاط الأنفاس.

– لعلمك أنا عمري ما حاولت أربي الكره في قلب ولادي ناحيتها، حتى أما كانوا ييزعلوا من زعيقها فيهم أو تعنيفها لواحد منهم كنت بقولهم لازم تحبوها، لازم تسمعوا كلامها، دي جدتكم، كنت عبيطة يا دكتور ومفهمتش إن ده يوم عن يوم كان بيقلل مني وبيضغط على كل الحاجات الحلوة الي جوايا.

منحته نظرة غل أثناء حديثها وهي تكمل:

– وهو برضو مكانش شايف فعليًا إن ده شيء صعب، كان مصدق أن كلمتينه الخايبانين فعلاً بيريحوني، مفهمش إن سكوتي كان سكوت اضطرار بس عشان الدنيا تمشي، وطول ما هي ماشية كان بيقول خلاص مفيش شيء هينغير، ولا في داعي أصلًا نغير شيء.

سكتت لالتقاط أنفاسها التي خرجت ثقيلة ثقل جبال الكبت الراسخة فوق صدرها وبصوت خالطه البكاء تابعت:

– أنا تعبت أوي يا دكتور... حقيقي تعبت.

قاتلها ثم دفنت رأسها بين راحتها مستقبلية عليهم فيض الدموع، بكت كثيرًا، كثيرًا جدًا، وهي تواصل الحكى.

ارتفع صراخ ياسين الطفل ذي الأعوام الثلاثة عاليًا أمام رصة

مكعبات هدمها بقصد شقيقه شريف وهو يركض متقافراً في أنحاء الغرفة الواسعة في فيلا جدته، عابراً من خلف أمه التي انتشلت من صمتها المتحفز مع صوت الصراخ قبل أن تلتفت قابضةً على ذراعه بقسوة صنعتها العصبية المفرطة التي تكتنفها، اعتصرت أصابعها ذراعه جاذبةً جسده نحوها قبل أن تهبط على وجهه الصغير بصفعة من كفها الحار؛ تردد صداها في أرجاء المكان مع صوتها العالي وهي تصرخ:

– احرص يا حيوان مش عايزة دوشة، بتضايق أخوك ليه؟ هه؟
بتضايقه ليه؟

توجم الوجه الصغير من الضربة واحمرت وجنتاه وبدا موشكاً على الانفجار في بكاء هيسيتيري كتمه خوفاً أمام نظراتها النارية وهي تشير بسبابتها أمامه أن حاذر صائحة:

– ولا نفس، مش عايزة أسمع حس واحد فيكوا دلوقتي، انتوا
فاهمين وللا لأ؟

توتر جو المكان مع صياحها، واحتبست الصرخات في حلق الصغيرين، كانت تصب جام انفعالها وحنقها في وجهيهما اللذين اختنقت كل المشاعر بداخلهما فصمتا يرتعش جسدهما خوفاً من تلك التي حملت قدرًا من الثورة في لحظتها؛ بدا كافيًا لحرق الجميع.

ثلاث سنوات لها في هذا المكان، ثلاث سنوات ظنت في بدايتها كل خير بمرحلة جديدة أملت فيها بشائر التغيير، لكن شيئاً من المشاعر المتحفزة تجاهها حقاً لم يتغير، حقاً أحببت إشراق ولديها، أحببتها

كأحفاد، يربطها بهما خيط دم مصدره ابنها جلال، لكنها يوماً لم تغفل كراهيتها لزوجته، لم تمنح من رأسها أبداً ذلك الاقتناع التام بصورة في مخيلتها لخبيثة اقتحمت مسار حياتهما وغيرته لطريق غير الذي رسمته هي كأم له، فداومت على معاملتها كغريبة، كمهمَل محتَقَر؛ وُضِعَ لتتراكم فوقه الأتربة ويُنظَر له بامتعاض، كل حديثٍ لها لا يُسمَع، وكل فكرة تدلي بها لا تُنفَّذ، وأي اقتراح أو مشاركة لا يُلقَى لها بال أو اعتبار؛ حتى في مناسبات الاحتفال بأعياد مولدهما، عزلتها، ولم تترك لها الحق يوماً في أبسط حقوقها كاختيار هداياهما أو ما شابه.

تحت وطأة تحكيمات لأقصى الحدود عاشت يعزيها حبها لجلال وطفلها، وتربيتته فوق كتفها بين الحين والآخر، ورجاؤه المتكرر أن اصبري قليلاً، ولأجلي تحملي، تحملت كيلاً فاض بها حملة، فباتت أكثر تحفراً مع طفلها في كل شيء، وطالبت بالرحيل مراراً ورفض، طالبت بالعودة سويّاً إلى البيت الضيق القديم، فتهرب وتغافل واصطنع التناسي.

«ياوداد، احنا لما اتجوزنا اتفقنا إننا هناخد بعض على عيوبنا، ولو أمي عيب وحمل عليكي استحمليه، متدسيش إنها الجزء اللي مقدرش انفصل عنه، حاولي معلش، افعلها لأجلي، لأجلنا، ولأجل كل ما حققناه وسنستمر إلى الأبد في تحقيقه».

عبارات معتادة دأبت على استعادتها في لحظات القهر وهي تقبع حبيسة غرفتها مع طفلين باتا يهاها ثورتها أكثر من أي شيء آخر في فترات استقبال المكان لضيوف حماتها السيدة الأرستقراطية ومعارفها.

اليوم هو يوم احتفالها الصغير الذي أقامته بحضور ليف

من القيادات الحكومية وأصحاب المناصب العليا إعلانا عن عزمها كسيدة من سيدات المجتمع المدني الترشح لمجلس النواب، نوع من استثمار العلاقات؛ كانت ناجحة جداً في تأديته، راحت تسير في بهو المكان بالأسفل متأبطة ذراع ابنها جلال الذي ارتدى حلة سوداء أنيقة اختارتها كالعادة له، مبتسمة بين الحين والآخر لهذا وذاك، داعية الجمع بالاستمتاع وتقضية سهرة ممتعة.

– مش كنتي سمحتي لوداد تنزل تقعد معنا شوية في الحفلة هي والعيال بدل حبستهم فوق دي يا أمي؟

همس جلال بالعبارة لها وسط ضجيج الكعوب المتداخل مع قرع الكؤوس ونغمات الموسيقى المنبعثة في قلب المكان، فرمقته بنظرة عابرة، ثم التفتت ملوحة لأحد القادمين من بعيد وهي تجيبه ضاغطة خلف ابتسامتها على أسنانها:

– وبعدين معاك يا جِلْجِل؟ قاصد يعني إنت تحرق دمي في يوم زي ده؟ ما قلتك مش عايزة أشوفها النهار ده يا أخي.

توقفا عن السير ملتفتاً نحوها قائلاً بصوت لم يرغب لدونهما سماعه:

– يا أمي زيادة أوي اللي بتعمله معاها، أنا نفسي أفهم لحد امتي هتفضلي تعاملها كده؟ وداد أصيلة ومتستاهلش منك كل الكره ده.

استمرت في مبادلة الابتسام لجميع المحيطين وهي تشير له في هدوء متممة:

– وإنت ليه مفسر تصرفاتي على أنها كره؟ أنا عمري أصلاً ما كرهت حد زي ما أنت شايف قدامك أهو، بحب الناس وكل الناس بتحبني.

في استنكار لردها رفع إحدى حاجبيه وهو يتمتم:

– يا أمي!

ضربت هي على ظهر يده بكفها تمنعه من مواصلة الحديث، وتستحثة على متابعة السير معها قائلة:

– جلال، مش وقته الكلام ده دلوقتي، مش هنسيب الحفلة والناس ونفضل نتكلم في مشاعر الغندورة.

بامتعاضٍ يخفيه واصل السير معها في اتجاه ذلك السبعيني المتأنق الذي احتشد حوله عددٌ من الأشخاص كان بينهم اثنان من حرس التأمين؛ بدت أسلحتهم بارزةً أسفل سترتهما، وإلى جواره وقفت تلك الشقراء التي ابتسمت لجلال تحييه مع انحناءة بسيطة من رأسها في حين صافح العجوز المتأنق والدته مقبلاً يدها وهو يقول:

– متشكرين على السهرة اللطيفة دي يا مدام إشراق.

أطلقت ضحكةً قصيرة وهي تجيبه بحفاوة مبالغة:

– معالي الوزير متقولش كدا، ده شرف لنا، هي الحفلة برضو تكون حفلة من غير حضور معاليك؟

ترجع الرجل بابتسامته الوقور مشيراً لتلك الشقراء التي تجاوره

قائلاً:

– أقدملك سيادة المستشارية إشراق هانم يا جيبي، صاحبة الدعوة والفيلا وكل اللي حواليلي هنا.

ثم استطرد محدثاً السيدة أمامه:

– ودي جيبي يا إشراق، بنتي، خريجة إعلام القاهرة بتقدير امتياز، إنتي فاهمة بقى يا ستي فيرس الإعلام منتشر إزاي عندنا في العيلة.

قالها ثم أطلق لضحكته العنان مهتئراً معها جسده فمنحته هي ابتسامة مجاملة قبل أن تشير بدورها ناحية جلال الذي وقف مرتباً قائلة:

– ده بقى الباشمهندس جلال، ابني.

حياهم بدوره في حين سألت الفتاة بلكنة مهتمة:

– ويا ترى تخصصك في الهندسة إيه يا باشمهندس؟

جاوبها في الوقت الذي انغمست فيه والدته في حوارات جانبية مع السيد الوزير:

– عمارة، تخصصي في الهندسة عمارة.

قالها بعقل شارذ عج بصخب وضحكات المصطنعين من حوله، لا شيء من هذا حقيقي، وجوه وضحكات بلاستيكية لا يشعر بالراحة بينها، لا شيء بتاتاً يشغله سواها، تلك التي وقفت في ركن مستتر بالأعلى

خلف سور الدَرَج غير مسموح لها بالنزول؛ ترمق الجمع المحتشد حول
مأدبة المصالح بعين من قهر، وتحاول التقبل.

الفصل الخامس

«إنه قدرك؛ ذلك المجهول دومًا في النهاية ينتظر»

تلك امرأة تحملت الكثير، همست بها لحظات الصمت بين حروفه وهو يواصل الحكى واصلاً لي أركان القصة ببعضها، كالذي صُقِل من الوجع في نظره كانت، أخبرني أن العبرات في عينها لم تَنَمُّ بتأتًا عن ضعف، كانت دموعًا لا تقبل التريبت، ولم تُذَرَف لاستجداء شفقة.

تطرق في حكيه ليوم رأني أول مرة راقداً تتصل محاليل الإعاشة بجسدي الساكن المثخن بجروح الحادث، صرّح لي بأنه تساءل وقتها أي نوع من النساء هي؟ أي أم تلك التي تجد في قلبها القدرة على نقل ولدها في مثل هذا الوضع والحال لمصحة علاج نفسي؟ قرأت التساؤل في عينيه، ولمحت الإجابة فيهما: «نحن ننمو من خلال الألم».

عبارة نطقها وسط الحوار مفسراً بها من وجهة نظره مشاعرها.

– لك أم يا فتى بحقٍ نحتتها الآلام، فأضحت على شاكلتها قاسية.

ما زال عسلية يشاركنا المكان، يجلس على المقعد الجلدي الوثير إلى جوارى متأملاً وجه إبراهيم كأنما يستحثه على متابعة الحديث،

سألته أنا:

– سرحت فأيه يا دكتور؟

لاح شبح ابتسامته على شفتيه وأخبرني:

– مفيش، بس اللقطات الأولى بيقالها دايمًا شجنها الخاص.

قالها فانكمشت ملامح ذاك الذي بجواري وهو يهتف:

– اليوم ده أنا كمان فاكراه.

ثم اعتدل نحوي ضاربًا بكفه فوق فخذي ليستطرد:

– ساعتها الدكتور كان جي من أول اليوم فاصل تمامًا، سمعته وهو يزعق برة لعم راضي على المية اللي مغرقة الجنية، وبيتلكك على أي حاجة مش مضبوطة قدامه، دخل هو وكابتن معتز اللي كان جايبه الديتوكس معاه عشان يشوفوك بعد ما وصلت بيوم.

ثم التفت نحو الدكتور إبراهيم الذي اتسعت ابتسامته مكملًا:

– ساعتها أنا جيت أطلب منك تطلعني التأهيل عشان زهقت، وقلتلك إني مخلص أعراض انسحابي، بس إنت رفضت ووصيت الكابتن يضغطني أكثر ويشيلني واجبات التنضيف والمسح بتاعة المكان كلها لوحدي.

لم يتمالك الرجل نفسه أمام الحنق في نبرة الأخير فانبعثت منه ضحكة قصيرة وهو يشير بيديه نحوه قائلاً:

– تستاهل، محدش قالك تنتكس للمرة الرابعة.

ثم قال يشهدني:

– وللا انت إيه رأيك يا شريف؟ واحد حضر معنا جلسات علاج وتأهيل أكثر من مرة، ومع ذلك كل فترة نلاقه داخل علينا متمهدل تاني، بدمتك؟ مش الضغط ممكن يكون وسيلة علاج سلوكي ناجحة معاه؟

بادلته والفتى إلى جوارى النظرات ولم أجب، لم يكن يعنيني بين ما قال كليهما شيء غير الفهم. سألته محاولاً العودة به لإطار الموضوع:

– كانت حالتي عاملة ازاي لما شففتني ساعتها يا دكتور؟

أجاب:

– كنت في عالم غير اللي احنا عايشين فيه، وكأنك على خط يفصل بين الحياة والموت، ومش مقرر لسه هتروح لمين فيهم. كنت داخل لسه قبلها بليلة، قالولي إنك وصلت في عربية إسعاف ناقلاك من مستشفى مع أم متهارة تمامًا؛ معرفوش يوصلوا منها لأي معلومة عنك، ولا حتى الاسم.

كل اللي عرفوه من الشخص اللي كان معاكو ساعتها إنك طالع من حادثة جامدة، وإنهم لقوا في دمك نسبة عالية من المخدر، كانت مثبتوة في تحليل المستشفى اللي جابوه معاهم.

معتز قاللي إن جملتها اللي منطقتش بغيرها في وش كل الموجودين هيا الحقوه، الحقوا ابني، كانت في انهيار تام،

كفقيبر بائس يبيحث في أطلال مهجورة عن كسرة خبز.

تصورت المشهد راسمًا له في مخيلتي صورة لم أرها متحسسًا مواضع الجروح الملتئمة فوق جسدي قبل زفرة استسلام أطلقتها مع نظرة أطلبه فيها بالمتابعة: «دعنا نواصل ما بدأناه... لحظة صمت لنسترجع الأحداث... أين انهيينا؟»

هنا تكلم جلال، لم يدفعه حقيقة للحديث غير نظراتها، وذلك الماضي الجاثم خانقًا فوق صدره.

– احنا ليه محاولناش تاني يا وداد؟ ليه مقدرناش نسمع بعض ونندي لنفسنا فرصة؟

كان يسألها السؤال المتأخر كعادتنا بعد فوات الأوان مدرغًا انعدام جدواه: «أنا غلطت، معترف إن أنا غلطت، بس غلطي مكانش بدافع خيانتك».

قال أن لقاءه الأول بجيمان جر وراءه لقاءات أخرى... الفتاة المدللة ابنه صاحب المعالي لاقته في نفسها انجذابًا نحوه، انجذاب لم يشجعها عليه، ولم يرغب أبدًا في تأكيده، على العكس تمامًا واجبه، رفضه، وحذرهما مرارًا من الخوض فيه، برغم سعيها فعل، برغم شباكها المنسوجة حوله وضغوط أمه عليه فعل، حاول إثناء الجميع عما يجول بخاطرهم.

يتذكر جلسة جمعتهما تلت لقاءهما الأول بعام أو أكثر بعد

مصارحتها له بحبها، كانا في مكان هادئ قَبْلَ اضطرارًا دعوتها إليه، تنبعث من جنباته الموسيقى التي اختيرت خصيصًا لجو أرادت هي أن تصنعه، وكان هو يقبع مرتبًا أمامها محملاً بكم من الحيرة والتردد والخرج.

قال لها:

– جيهان أنا مقدر بجد مشاعرك ناحيتي بس فعلا دي قصة محكوم عليها بالفشل من قبل حتى ما تبتدي.

– ليه بتقول كدا يا جلال؟ أنا واحدة بتقولك بحبك.

– بصي، إنتي يمكن تكوني إنسانة مثالية، فيكي كل المواصفات اللي ممكن أي واحد عاقل في الدنيا يتمناها، بنت ناس، مثقفة، غنية، وفوق ده كله جميلة جدًا. إنتي العرض اللي صعب فعلاً على أي واحد في الدنيا يرفضه، لكن...

– لكن إيه؟

قاطعته بالجملة فتردد محاولاً إيصال المعلومة لها بشكل لا يحمل صلافة أو قسوة:

– لكن العرض ده مش بتاعي للأسف، مش ليا، أنا إنسان خد نصيبه من الحب مع إنسانة تانية واكتفى بيه.

صمتت أمام كلماته تلوك بفمها قطعه من اللادن؛ انهمكت في إفراغ عصبيتها فيها وهي تتابعه بنظرها الحاد الذي اخترق كيانه وهو يتحدث:

– أنا راجل متجوز يا جيهان، واللي متجوزها بني أدمة فعلاً بحبها، ليا منها ولدين دلوقتي؛ معنديش في الدنيا أغلى منهم، وعشان كذا بقولك العرض ده برغم إنه مش سهل يكون لأني حد أنا مينفعش أقبله، هبقى بظلمك لأني مش هديكي أبداً الحب اللي إنتي فعلاً تستاهليه، إنتي يا جيهان تستاهلي واحد قلبه مدقش لحد قبلك، تستاهلي ح..

قطعت عبارته مرة أخرى بطريقة انفعالية وهي تقول:

– متشغليش بالك باللي أنا أستاهله، ممكن تخيلينا في اللي بنتكلم فيه وتجيب من الآخر؟

قالتها وهي تخرج من علبة سجنائها الفاخرة سيجارة طويلة دستها بين شفتيها نافثة دخانها في وجه ضعفه وارتبাকে الشديدين، قالتها وهي تحمله بين ثناياها اللوم على فترة أضعائها في محاولات التقرب إليه، لم تنبس بلومها ولكنه تلقاه، كان يستوعب أيضاً مصدر قوتها المكتسب من تأييد أمه للأمر، هي الأخرى كانت تشجع تلك العلاقة، كانت تتحين كل فرصة بينهما ليلتقيا، بدافع رغبة داخلها في الانتقام من وداد فعلت ذلك، جاءت الفرصة على طبق من الذهب، ستحرمها منه كما فعلت هي... حاولت مراراً إقناعه بترغيبه في السلطة تارة وبمزايا إرضائه لها تارات أخرى، طمأنته أن أحداً لن يعلم بالأمر إذا ما تم.

وكذلك تلك الجالسة أمامه، برغم محاولاته للابتعاد في تلك الجلسة مع آخر أنفاس لها تبقّت من لفافة التبغ بصوت هامس حنون أضافت له أصابعها المداعبة لكفيه الموضوعتين فوق الطاولة الصغيرة بينهما لمسة دفاء؛ صارحته خلالها:

– أنا مهمنيش كل اللي بتقوله ده يا جلال، بتحب مراتك؟ معنديش مانع، خليك بتحبها، مش هتعرف تديني حاجة؟ مش مشكلة، أنا مطلبتش ولا هطلب منك حاجة تديها لي، كل اللي أعرفه إني بحبك، بحبك وبس، ومش عايزة من الوجود أو منك غير حاجة واحدة بس: إنك تبقى معايا، وإني أفضل في المكان اللي يكون مسموحلي فيه بس أقولها لك من غير ما يفصل بيني وبينك شيء أو حد، فاهمني يا جلال؟ أنا بحبك.

بهذا أخبرته، وبهذا علق لسانه أمامها، وتاهت في رأسه كل حلول التهرب.

تراجعت الشقيقة الصغرى برأسها للوراء محتمية من الأغبرة التي تصاعدت بفعل ضربات المنفضة في يدها فوق السجادة الموضوعة على حافة النافذة داخل منزل شقيقها؛ الذي جلس على الأريكة خلفها بفانلة صيفية أمام التلفاز يحاول تثبيت الهوائي فوقه لضبط الصورة المهتزة على شاشته، ثم سعلت مرتين متتاليتين وهي تبدد الهواء بيديها قائلة:

– إيه يا أبيه، إنت قاعد في العفرة دي كلها ازاى؟ هي الشقة متنفضتش بقالها قد إيه؟

أجابها دون اكتراث متابعًا ما يفعل:

– متعبيش نفسك يا حبيبة، الدنيا مكركبة وأنا اتعودت عليها كده، سببي كل حاجة وتعالى اقعدى معايا شوية قبل ما تنزلي.

مطت شفتيها وهي تضع يدها في وسط جلبابها المشمر لتعاود من جديد تنفيض السجادة قائلة:

– تعب إيه بس يا أبيه؟ إنت بتهمز كدا باين عليك.

رمقها من الخلف بنظرة ممتنة قصيرة دون حديث، ثم أغلق التلفاز ملأاً ونهض متجهًا نحو المطبخ وهو يقول:

– هعمل لنفسي كباية شاي، تشربي معايا؟

أنته إجابتها بالنفي وهو يدلف إلى المطبخ ملقيًا نظرة على علب الطعام التي أعدتها هي للتخزين، ثم أشعل الموقد الصديء واضعًا فوقه البراد منتظرًا غليانه قبل أن يأتيه من الخارج صوتها وهي تخبره:

– على فكرة بثينة أختك مش هتعرف تيجي الشهر الحجي، ماشية في التامن خلاص، إدعيها.

أخذ يراقب فقاقيع الماء المتكونة فوق النار من فتحة الغطاء المكسور للبراد متمتمًا بصوت مرتفع:

– يلا؛ ربنا يقومها بالسلامة، معرفوش لسه اللي جي ولد وللا بنت؟

كانت تتحرك داخل المكان ملتقطه ملابسها الملقاة هنا وهناك في إهمال لإعادة ترتيبها مجيبة:

– بنت بإذن الله، راحت مع جوزها عملوا سونار من فترة وقاللهم الدكتور إنها قمرية صغيرة.

هز رأسه في صمت مأخوذاً بالصفير المتصاعد من البراد مع غليان المياه بداخله، ثم مد يده بمنشفة لالتقاطه من فوق الموقد وصب كوب الشاي الذي تساقط بعض من الماء حوله مع ارتعاشة يده لحظة دخولها خلفه لتستطرد:

– عقبالك يا حسن.

أعاد ضبط يده لملء الكوب، ثم نعى البراد إلى جنب ملتقطاً ملعقة من داخل الحوض مسحها في ملابسه وقلب بها السائل الأحمر داخل الكوب قبل أن يحملها ملتفتاً بها نحوها بابتسامة بسيطة وغمغمة:

– في حياتك.

اعترضت طريق خروجه من المطبخ الذي وقفت على عتبته وهي تواجهه قائلة بشكل مباشر:

– أنا بتكلم جد يا أبيه، مش ناوي بقى؟

أوماً برأسه محاولاً تحاشي النظر إليها وهو يعبر بجنبه من جوارها متجهاً نحو الأريكة في الصالة مرة أخرى متمتماً:

– بإذن الله، ربنا يسهل.

تابعته إلى الخارج مواصلة حديثها باهتمام حقيقي:

– ما هو ربنا يسهل لما إنت تنوي، كفاية العمر اللي عمال يضيع من إيدك ده يا أخويا، إحنا كلنا عايزين نطمئن عليك ونشوفك ماشي في حياتك زي ما بفضل ربنا وقفت جمبنا في

جوازاتنا إحنا الثلاثة.

لم تلمح من ظهره ابتسامة اليأس التي نمت على ركن شفتيه وهو ينحني لوضع الكوب على الأرض أمامه بينما هي تكمل:

– إيه اللي ناقصك دلوقتي بس؟ الشقة واهي فضيتك خلاص،
والورشة بتاعتك الحمد لله شغالة وربنا هيكرمك برزق البني
أدمة اللي هتختارها، فيبقى ليه التأجيل بقي؟

لم يجد حقًا ما يجاوبها به، كان يشعر بالاختناق دومًا كلما تطرقت
إحداهن للحديث في هذا الشأن، شيء دفين بداخله يدرك أنهن على
حق، وشيء أكبر يمنعه من التقبل، هي، صورتها المعلقة في خياله لم
تتغير، ينفذ عنها الغبار كل حين ليراها كما يود خياله، سبع سنوات
مرت منذ رحيلها مع طفلها عن المنطقة، تعتقها روحه كعطر يزداد
سحرًا بمرور الزمن، سبع سنوات أضيفت لعقود انتظاره من دون
أمل.

كانت نصائحهم له دومًا بمثابة هراء لا يتخطى سطح عقله، بينما
في القلب هي مستقرة ومسيطرة، حتى وإن كان الأمل في عودتها واهيًّا،
فالبقاء لأجلها يكفيه.

يعيش وحيدًا كظل بلا كيان، يمضي معظم الوقت في ورشته
سارحًا ينتظر سيارة كتلك التي رحلت بها لعوده، وفي الليل بجوار
نافذته الصغيرة يجلس متسامرًا مع نجوم السماء ونسائم الشارع
الهادئ الخالي تقريبًا من المارة حتى يغالبه النعاس، فتمد شمس
الفجر أشعتها لتغطيته.

تبادل أخواته فيما بينهن كل شهر مهمة زيارته وترتيب المكان كحدث مختلف كان ينتظره لتبديد الوحدة بعض الشيء ليس إلا، كل واحدة منهن تزوجت وصارت لها حياة مستقلة بعيداً عنه وعن كل همومه، يحاولن تعويضه بالقدر المتاح لهن من الاهتمام، والكبير لديهن من الحب والوفاء. تأتي إحداهن تكلمه عن الأمر، فتجدد أسي الحنين بداخله من جديد، ثم ترحل ليبقى هو على حاله البائس مع أماله ينتظر، مؤكدة له التطلعات الحالمة خيالاته، ستعود في يوم ما، حتماً في يومٍ ستعود.

طالما حدثته نفسه بذلك إلا أن شيئاً من الذهول برغم هذا في تلك الليلة أصابه، كان في ورشته حينها بهم بالرحيل موصياً الفتى الصغير مساعده بالحضور مبكراً في الغد.

يتلقت مفاتيحه من فوق المنضدة الحديدية الممتلئة بالشحم ويمد يده إلى مقبض الباب المعدني الجرار لهيبط بثقله إلى الأسفل قبل أن ينحني معلقاً به قفلاً من الصلب تمم على انغلاقه، بجسده المكدود اعتدل اعتماداً على ركبتيه المجهديتين ثم استدار ليجدها أمامه، تماماً كما تمنى.

بعباءة سوداء حوت جسدها الذي اختلفت جم تفاصيله، ووجه يحمل من الحزن ما لم يلحظه حينها من فرط الاندهاش، يتشبث بعباؤها من الجنين طفلاها الصغيران، ها هي ذي ثانية، حلمه الذي عاد أخيراً:

وداد.

– مفيش فايده، العربية مش عايزة تنطق.

زفر نعيم بالكلمة في حنق وهو يعاود للمرة العاشرة محاولة تشغيل السيارة التي رفضت الاستجابة تمامًا وإلى جواره تحت ظل قريب صاحبها إشراق هانم التي وقفت ملوحة بمروحتها الخشبية أمام وجهها وقد سبق التملل البادي على ملامحها كلماتها وهي تتمتم:

– طب وبعدين إيه الحل؟ إحنا هنبيت هنا كدا وللا إيه؟ مفيش حوالينا في المنطقة أي ميكانيكي وللا كهربائي يدور هالنا؟

مسح يده بمنشفة مبتلة وهو يقول متلفتًا فيما حوله:

– واضح إن المنطقة هنا معزولة كلها بالفلل، كبيرنا نلاقي سوبر ماركت وللا مكاتب محاماة وعيادات، لكن ورش تصليح وكدا معتقدش.

قالها مشيرا لها بالانتظار، ثم اتجه نحو بوابة المصححة مناديًا حارسها بصوت مرتفع:

– بقول إيه يا ريس، مفيش قريب منكوا هنا ميكانيكي وللا أي حد بيْفهم في العربيات؟

أشار له عم راضي بكتفيه بالنفي وهو يرد:

– لا والله يا باشا، المنطقة هنا كلها سكنية، وأقرب واحد منا هيجتاج مواصلة ترواحه بيها.

تنامى إلى مسامع حسن الجالس في الشرفة بالقرب منهم صوت

الرجل فنهض محاولاً الهروب من بحور خواطره المسيطرة، اتجه نحوهم من موقعه داخل المصححة ليلقي نظرة على نعيم وسيارته التي انفتحت مقدمتها قبل أن يتساءل بصوت خفيض:

– مالها العربية؟

هز نعيم كتفيه مسرعاً بالإجابة:

– مش عارف والله، فجأة وقفت وحالفة ميت يمين ما تدور.

حدثته نفسه لوهلة بتجاوز الأمر، ولكن شيئاً في عقله المكدود أثنائه، فوجد نفسه يهبط سلالم المدخل الأربعة مقترباً من السيارة ونعيم يتابعه شارحاً وقد خالج يأسه بعض الأمل:

– سخنت فا قلت مية الريداتير، زودتها وسبتها تبرد برضو مفيش فايده، مش فاهم بقى في إيه؟

مد حسن يديه في جوفها متتبّعاً بعض الوصلات دون أن يرد عليه بشيء، في حين اقتربت منه السيدة العجوز متوكئة على عكازها الأسود المعقوف تسأل:

– بتفهم إنت في العربيات دي؟ هتعرف تشغلها يعني؟

لم يلق حسن لعبارتها بالأل بينما عرفها به سائقها قائلاً:

– الأسطى حسن جار الست و داد، صاحب ورشة السمكرة اللي قدام البيت عندها.

مع هذه الجملة رفع حسن رأسه بعيداً عن السيارة وهو يقول:

– مش جارها بس، قلتك قبل كدا وداد تبقي بنت عمي.

بدا الحرج على وجه الرجل من المعلومة التي أسقط ذكرها سهوًا على حين لوت إشراق شفقتها وهي تتمم بشيء من التحفظ:

– أه افتكرتك، لمحتك هناك مرة، تشرفنا.

عاود حسن مرة أخرى فحص السيارة بغير اكتراث لنبرتها محاولاً التغاضي عما حوله، بيد أن فضوله ألقى برأسه السؤال فصرح به دون تفكير:

– وحضرتك تبقي والدة الأستاذ جلال، حماها سابقًا، مش كده؟

أومات له برأسها تجيبه:

– بكل أسف.

شعر بضيق من عبارتها بدا واضحًا في نبرته وهو يكرر:

– بكل أسف فعلاً.

ثم تابع:

– على فكرة أنا فاكرك إنتي والأستاذ كويس، شفتكوا قبل كدا مرتين، أول مرة في زيارتك لهم بعد الخلفة، والثانية وراها بكام يوم أما جيتوا تاخدوها هيا وابنك وعيالها من المنطقة.

قالها ببساطة لم تتناسب مع قدم الموقفين اللذين ذكرهما وهو

يدق بيده على جزء ما داخل السيارة أشار بعده إلى نعيم بإدارة محركها قائلاً:

– ادخل جرب تاني كده؟

بسمل الأخير وهو يدلف إلى الداخل واضعاً المفتاح في فتحته الخاصة مديراً إياه فارتفع صوت المحرك من جديد مع تهيدة ارتياح أطلقها قبل أن يقول:

– الله أكبر، تسلم إديك ياسطى، الله ينور عليك والله، إنت عملت إيه بالضبط؟

بفتور أجاب وهو يتناول المنشفة لمسح يديه:

– في سلك كان ناظر من مكانه مش أكثر.

ثم لوح لهم بيده وهو يهيم بالعودة من حيث أتى:

– بعد إذنكم.

استوقفته وهي تخرج من حقيبتها التي التقطتها من على المقعد الخلفي بعض الأوراق المالية؛ مدت يدها بها نحوه قائلة:

– اتفضل يا بني، امسك.

تبادل النظر بينها وبين ما امتدت به يداها للحظة ثم قال:

– أمسك إيه؟ عيب كده.

حاول نعيم توضيح الأمر، لكنها لم تمنحه فرصة وهي ترد:

– هو إيه اللي عيب؟ ده حقك؟

– حقي؟

نطقها بكل الحنق المعتمل في نفسه تجاهها، لم يدرك إن كان مناسبًا ما قاله بعد ذلك أم لا، لكنه أخبرها به:

– لو عالحق فأنا حقي ابنك استحله من سنين، من يوم ما قرر يتجوز وداد.

خرجت العبارة من بين شفتيه دون استئذان أو سابق تفكير كفورة الأبخرة المتصاعدة من قلب بركان وصلت الحمم بداخله حد غليانها الأقصى، ولم يعد باستطاعة شيء كتبتها، مشدوهُا يحملق في وجهه بعد العبارة الصريحة الصادمة وقف نعيم في حين أمالت هي طرف شفتيها مفصحة عن ابتسامه أخفت وراءها مشاعرها وهي تقول:

– أنا برضو قلت من الأول أن دي حدوتة ابن العم العاشق، واضح كدا أن السن ليه نظرة مبتخبيش.

لوح بيده أمامها في حنق صائحًا وهو يبتعد متبربًا من كشف حقيقته:

– حدوتة إيه ونظرة إيه؟ خلاص من كلمتين بقينا عادي كاشفين بعض؟ بلاش كلام فارغ، بعد إذنكم.

استوقفته ثانية وهي تهتف بدورها:

– وليه ميقاش كاشفاك وانت عنيك فضّاحة؟ أنا مش جاية
أتريق عليك بالعكس، أنا أكثر واحدة قادرة تحسك هنا، عارف
ليه؟ عشان مجربة نفس اللي إنت حاسس بيه.

رمقها بنظرة تساؤل وقد اضطرب وجهه أمام عبارتها المباشرة
التي جذبت بها انتباهه قبل أن تكمل:

– من أول ماشفتك قدام مكتب الدكتور الصبح وانا عارفة
إنك بتحب وداد، مش بتحبها بس، إنت كمان راسلمها في عقلك
حلم مش قادر تتخيل أي شيء في الكون غيره.

كالمأخوذ حملق فيها مستغربًا كلماتها التي وصفت بكل دقة ما
وقر داخله من حقيقة، وكأنها تخترق بعينها دواخله، اتسعت ابتسامتها
أكثر وهي تكمل:

– متستغربش، قلتلك إني حاسه باللي إنت حاسس بيه، وعارفه
كل اللي عايز تقوله.

لم تكن ابتسامتها دليل ثقة كما شاءت لها أن تبدو، كان يتخللها
طيف من الحزن امتزج بنبرتها التي تابعت بها ما تبقى من حديث لدها:

– نفس حلمك بيها أنا رسمت شمه لابي جلال، سنين طويلة
عشتها كنت شايفاه قدامي بيكبر ويقرب من إنه يتحقق
بالضبط زي منا عايزه، بالضبط زي مانا بتمنى وبعلم كل
يوم، مستوعب أكيد إنت معايا الشعور ده، مستوعب البذرة
الصغيرة اللي غرستها بإيدك في أرض وفضلت ترومها وتراقبها
يوم بعد يوم وسنة ورا سنة، متخيل معنى إنك تحلم لدرجة

تصديق الحلم أكثر من كل حقيقة حوالبك، وفجأة تصحى في يوم تلاقيه ببطرح شيء مختلف، حاجة غير كل اللي رسمته في خيالك وبنيتله قصور من وهم.

كان حديثها صادقًا إلى حد مخيف، كانت تضرب كبد مشاعره في دقة ليس لها مثيل، لم تكن تكذب، هي بحق تفهمه. تركها بكل استسلام وضعف تتابع:

– لو بتقول إننا استحلينا حقك زمان لما ابني اتجوز البني أدمة اللي بتحبها، طب ليه متبقاش شايف الزاوية الثانية من الموضوع؟ ليه متفكرش في حبيبتهك نفسها اللي استحلته حقي في ابني، وسرقته من كيان تعبت أنا العمر كله عشان أحافظله عليه هو وولاده من بعده؟

بلسان علق في جوف الحيرة وقف أمامها لا يقوى على النطق بشيء شاخص البصر في وجهها الذي حمل الكثير من حكمة الزمن، كانت تكشف له عن زاوية جديدة من الرؤية، لكل العملات حقًا وجهان، هذا ما تعلمه من الحياة، وهذا ما تحاول هي إخباره به، قالتها له بوضوح أكبر وهي تعيد يدها بالمال إلى حبيبته:

– الفلوس دي مثلاً كانت بتاعتك، حقك في مجهود إنت بذلتة، بس إنت اللي اخترت تتنازل عنها، محدش أجبرك تعمل كدا، ولو هتعمل كدا برضو مع حقك في ودااد محدش هيقدر يمنعك، بس الممنوع إنك تلوم على حد ثاني مستسلمش زيك وقرر إنه ميتنازلس عن حقه في حاجة عارف إنها بتاعته.

تسربت كلماتها في عقله كالحمم، كان كالمنوم مغناطيسيًا أمام حديثها الذي لوحث له ببديها في نهايته وهي تتمه:

– صدقني أنا عمري ما كرهت وداد، أنا بس كرهت الطريق اللي اختارته واتعارضت فيه مع طريقي، كرهت وجودها زي العقدة في مسار كان من حقي كأني أمهده لابني، وداد مش وحشة أصلاً، هي بس لبست فستان مكانش لايق عليها... فاهمني يا اسطى حسن؟ متلومش اللي زيي، أنا واحدة مرضيتش إنها تتنازل عن حقها في ابنها ولا عن حلم رسمتهوله، متلومنيش أنا، لوم نفسك، لوم مشاعرك اللي كانت أضعف من قرار كان لازم تاخده لما جتلك ألفت فرصة لده.

سكتت قليلاً بعد انتهاء عبارتها الطويلة، كان يحملق في وجهها مغرغرة عيناه، لا يقوى على النطق لسانه المعقود أسفل دقة كلامها، وكانت هي تجول بخاطرها لمحة من الماضي استقطبتها للحظات تمتت له بعدها ببطء:

– أطيّب الزهور روايح هي اللي أغصانها مليانة شوك.

لم يتفهم مغزى الجملة فور سماعها فأوضحت:

– واجهها بحبك يا اسطى حسن طالما شايله جواك، متخافش من اللي ممكن يحصل، ولا من أي ظروف تمنعه، مد إديك وحارب عشان اللي عايزه مهما شفته يبيعد، وساعتها بس ممكن يرجعلك.

في الشرفة الملحقة بغرفتها الخاصة المطلة على حديقة الفيلا وقفت وداد تراقب الطريق الخالي في الأفق، وتتابع قلقة بين الحين والآخر عقارب ساعتها التي أشارت إلى الواحدة والنصف بعد منتصف الليل. لفحات الهواء البارد تتسلل عبر فتحات الروب الذي أحكمت إغلاقه حول جسدها وتتجاوزها مرتطمة بدرفتي الباب الزجاجي وراءها ليخلف باهتزازه صوت أزيزٍ مرتفع.

برد قارس أجبرها على العودة إلى الداخل محكمة غلق الدرفتين الزجاجيتين خلفها قبل أن تسدل فوقهما الستائر متممة بصوت كالهمس:

– إيه التأخير ده كله يا جلال؟ يا ترى بتعمل إيه كل ده؟

شاركها قلقها في الغرفة صوت أنفاس صغيريها الراقدين في سبات عميق لا رغبة لدهما في إيقاظهما منه... على أطراف أصابعها خطت كاتمة أنفاسها حتى باب الحجرة تفتحه، ثم خرجت لتعيد إقفاله وراءها عليهما من جديد... صوت منبعث من التلفاز في بهو المكان بالأسفل يعلن عن بقاء أحدهم في الفيلا مستيقظاً.

اتخذت درجات السلم هبوطاً نحوه لتجدها متمددة في استرخاء على كرسيها الهزاز أمام شاشته الكبيرة تتابع فيلماً من الأفلام الكلاسيكية القديمة على ضوء المكان الخافت، ولما شعرت بالأنفاس وراءها استدارت لترآها عند نهاية السلم واقفة:

– واقفة عندك بتعملي إيه الساعادي؟

لم تشغلها النبرة الحادة التي اعتادتها في السؤال وأجابت:

- الساعة داخله على 2، وجلال لسه مرجعش لغاية دلوقتي.
بغير اكتر اترات عادت إشراق هانم إلى سابق وضعها وهي تعلن:
– ومش هيرجع الليلا دي، اعتبريه بايت برة يوم من نفسه.
عقدت وداد حاجبها في عدم فهم قائلة وهي تقرب منها:
– ببات برة ازاي مش فاهمة؟ جلال عمره ما سهر في شغله برة
البيت من غير ما يكون قايللي.
رمقتها الأم بنظرة جانبية رفعت خلالها حاجبًا قبل أن تقول في
تهكم:
– تصوري ولا عمره برضو عمل حاجة أنا مش راضية عنها؟
قبل طبعًا ما سيادتك تشرفينا، بس عادي بقى دي سنة حياة.
حملت عبارتها لمحة سخرية خاصة استوعبتها الأخيرة منها وهي
تقرب ناحيتها أكثر قائلة بصوت حافظت على خفوته:
– إنتي ليه شايفاني كده؟ ليه مصرة طول الوقت تعامليني على
إني عدوتك؟ مش فاهمة بجد أنا عملتك إيه لكل ده؟
مرة أخرى رمقتها بنفس النظرة المتهمكة ثم سألت:
– ياسين وشريف نايمين فوق؟
لم تكن عبارتها ردًا مناسبًا للسؤال، ولكن وداد ردت:
– عشيتهم وناموا من أربع ساعات، الحضانة بتاخذ ثلاث تربع

طاقاتهم طول اليوم.

بعدها استطرقت:

– برضو مرديتيش عليا يا حماتي، إنتي ليه بتعملي معايا كده؟

متابعة رد السؤال بمثله قالت محدثتها:

– عملي إيه لو طلعتي كمان شوية لقيتي واحد فيهم ناقص مش نايم عالسرير جنب أخوه؟

بغير فهم لمغزى الرسالة في حديث المرأة عقدت حاجبها وهي تسأل:

– مش فاهمة؟ تقصدي إيه؟

وموضحة لمقصدها تابعت إشراق وهي تلوح بكفيها في الفراغ:

– لو واحد فيهم رافض المكان اللي إنتي عايزاه يفضل قدامك فيه؟ تخيلي شعورك كأّم وقتها وحاولي تعرفيهولي بكلمة واحدة مش أكثر.

بغير تفكير أسرع وداد تجاوبها:

– مش عارفة أتخيل، بس أكيد شعور مش مريح بالمرة، قلق يمكن، خوف، أو...

قطعت عبارتها للحظة تبحث عن تعبير مناسب سبقتها السيدة إليه وهي تصرح:

– أو موت.

نطقت بالكلمة في اقتضاب قبل أن تلتفت نحوها مكملة:

– عرفتي دلوقتي بقى إنتي عملتيلي إيه؟ ولا حاجة زيادة عن إنك
سرفتي مني ابني الوحيد، بس كده، شفتي بقى اللي عملتياه سهل
إزاي؟

أدركت وداد في تلك اللحظة ما ترمي إليه والدة زوجها فارتفع
حاجبها في استنكار وهي تقول مدافعة عن نفسها:

– بس الحكاية عمرها ما كانت أبدًا بالجرم ده.

– أنا وابنك جلال حبيننا بعض، قدر واتكتبلي أنا وهو، ليه
مصرة إنتي تعاندينا فيه؟ ليه منقبلوش مع بعض كلنا ونعيش
سوا على أساسه؟

هزت إشراق هانم كتفها ببساطة وهي تخبرها:

– أديني قبلته، وأديكوا عايشين معايا إنتوا وعيالكو هنا من
سنين، الدور والباقي عليكي إنتي بقى في قبول القدر الجديد،
بالظبط زي ما نصحتيني دلوقتي.

لم تستوعب ثانية وداد معنى عبارتها فارتسمت علامات التساؤل
فوق وجهها والأخيرة تكمل:

– اطلعي نامي إنتي بقى ومتستنيش جوزك الليلاذي، عشان هو
بايت عند قدرك الجديد.

وصمت للحظة قبل أن تكمل بابتسامة كيد:

– مراته الثانية.

في البداية اعتقدت أن أذنها لم تلتقط بوضوح العبارة، اضطربت دقات قلبها وهي تحاول التأكد من صحة ما سمعته، بينما السيدة تتابع بكل هدوء وبحروف واضحة حادة كرؤوس الأسهم:

– أيوه يا وداد، إنتي سمعتي صح، ودانك مخانتكيش ولا حاجة، جلال ابني اتجوز عليكي، خد واحدة زيك بيحبها برضو، والزيادة أن أمه المرادي راضية عنها.

قالتها بتلذذ واضح النبرات، سرى مفعوله السام في جسد وداد الواقفة أمامها، وبكل عنف.

كان الذنب شعورًا أطل من نظراته نحوها، وكانت هي بعد انتهاء الحديث دامية كرامتها تشعر بوخزات الماضي في قلبها، من وجهة نظرها البحتة: خانها جلال، لم تر الأمر يومًا كما رآه، ولم تكن الخيانة دافعه، حين تزوج جيهان لم يكن الحب محررًا لقراره، كان زواجًا بمحض اضطرار فرضته عليه الظروف، كفأر اختبار تحت الضغوط وضع بين احترام للحب وإلحاح الآخرين، بات معلقًا يقف على الخيط الفاصل بين رغبته الحقيقية من ناحية، وأن يكون حجر عائق في تحقيق حلم والدته بالمجلس والسلطة التي ستصب حتمًا في مصلحته ومصلحة مستقبل أبنائه من ناحية أخرى.

لم يستسلم بسهولة ولم يتنازل، قاوم حتى الرمق الأخير حتى خارت قواه فسقط، تزوجها بدافع من مصلحة المضطر وإشفاق المخدوع، يعترف بخطئه، لكنه وبكل إصرار ينكر عن نفسه صفة الخيانة.

لست بخائن يا وداد! لقد فعلت ما فعلت وإن بدا بعكس ما سأقول لأحافظ على استمراريتنا، فعلته لأجلك مضطراً، لأجل طفلينا، فعلته بكل الغباء ولم أكن أعلم حينها سوى مدى حيي الصادق الحقيقي لك ولهما، فعلتها رضوخاً للمصلحة، واستسلاماً لضغط الأقدار.

نفوذ والدها وتوسلات أمه كانا أقوى من أن يفرض أمامهما رغبتة، لا ينكر جرم استسلامه، ويعلم أنه مخطئ، لم يسامح نفسه يوماً بعد انفصالهما، لكنه لم يتقبل أبداً وصم نفسه بوصف الخائن.

لكم تمنى طيلة الوقت أن يعود به الزمن إلى الوراء قليلاً لتصحيح الأمر، لكم تمنى أن تعذره، وأن تنسى، بيد أنه كان يدرك رغم أمنياته صعوبة الأمر.

يذكر طلبها الطلاق منه، ويذكر تنفيذه صاغراً فاقداً لكل حجة دفاع عن نفسه، كانا في السيارة القديمة؛ تلك التي امتلاكها معاً وقت أن كانت الأحلام بريئة، جلسا متجاورين وكلاهما في عالم يبعد آلاف الأميال عن الآخر.

يا فطة المأذون الشرعي المعلقة على واجهة البناية المقابلة تطل منتظرة كليهما لإنهاء الأمر، وعلى الأريكة الخلفية استقر توأمان لم يتجاوزا السابعة من عمرهما بعد، يتصاعد نحيب أحدهما مغطياً على

صوت طرقات إبهامه الرتبية فوق المقود أمامه، بينما الآخر من خلفه
يرسم فوق الزجاج المغلق بجواره خطوطاً بأصبعه مراقباً الأفق.

– تلك هي النهاية إذًا؟

تساءلت عيناه بالأمر، فتسللت من عينها إليه الإجابة:

– النهاية دي إنت اللي قررتها يا جلال.

هل زال بيننا كل ما يستحق لأجله أن نبقي؟

لقد قطعت بيدك كل شيء يربطنا!

ألا يستحق الحب تضحية أخيرة؟

الحب تضحية لأجل الأشياء، لا بها!

– إنت ضحيت بيا يا جلال.

خرجت من بين شفيتها العبارة بصوت خنقه القهر بالألم المرير
كانت تشعر حينها، فلم تلتفت لتوسلاته، ولم تجد بين ثنايا قلبها
الموجوع فرصة تمنحه إياها، طلاقهما هو الحل الوحيد، هو الإطار
المناسب لصورة كتب القدر عليهما التقاطها... بنظرة حانية أطل على
طفليه وتمتم:

– بلاش يا وداد نكمل عالغلط بغلطة أكبر منه، مش إحنا

لوحدنا اللي هندفع التمن، بصي شوية لعيالك، قوليلي هما

إيه الذنب اللي جنوه؟

أشاحت عنهما نظراتها وهي تقول:

– متحملنيش دلوقتي ذنب اختيار مفكرتش يوم ما اختارته إلا في نفسك، أنا مفيش حاجة هتغير رأيي يا جلال، طلقني.

راصدًا للماضي الكئيب في أعينهما داخل مكتبه مكث إبراهيم على صمته لبرهة قبل أن يتدخل قائلاً:

– وبكدا انفصلتوا وخدتني إنتي شريف وياسين الي كان عندهم 7 سنين، ساعتها رجعتي بهم لشقة بولاق القديمة.

كانت جملته تقريرية لا تتطلب منها الرد، فقط مالت نحو المنضدة أمامها ملتقطاً منديلاً من العلبه التي شارفت على الانتهاء ماسحة به بعض ما أذابته الدموع من كحل أسفل عينها في حين التفت هو نحو جلال الذي زفر بجوابه قبل حتى أن يسأل:

– أصعب شيء إنك تفوق فجأة على خسارة بمقاش في إيدك تعويضها، إنك تبقى واقف بتراقب حياتك وهي بتضيع منك قدام عنيك، وعيالك وهما بيكبروا بعيد عنك بسبب غلطة محدش رضي يسامحك عليها، علاقتي بهم بعد كدا اتحددت في إطار زيارات كل فين وفين بتتم، كتير كانوا بيوحشوني ومكانش بيبقى مسموحلي إني أشوفهم، مكانش قدامي حل ثاني غير إني أسافر وأسيب كل حاجة هنا في البلد، قلت ده اللي يمكن يخرجني برا اللي أنا عايش فيه: الهروب...

قدمت على شغل في شركة طالبة تخصصي في الكويت، وسافرت أنا وجهان مش رغبة في بداية جديدة على قدم ما كان

غرضي إني أبعد عن ماضي ضيعت كل حاجة فيه.

انتهى من عبارته ملتقطاً سؤالاً آخر أطل من عيني الدكتور إبراهيم نحوه فاستطرد:

– أكيد عايز تعرف أنا ليه مطلقتش جيهان؟! بلاش تسألني السؤال ده عشان مش هتلاقي عندي رد محدد... يجوز خوفي كان هو السبب، ويجوز لأن أي حاجة بعد اللي حصل بالنسبالي مكانتش هتعمل فرق، ولا كانت هتصلح حاجة، متسألش عن دوافع أي شيء عند حد فقد من حياته الهدف، وخسر ثقته حتى في نفسه.

وللمرة الألف تقريباً بعد رده سكت إبراهيم، منطقياً فالاثنان أمامه بحاجة لعلاج نفسي ربما أكثر من ابهما ذاك الراقد لديه بالداخل، لكنه أهمهم الآن، عملياً هو مسؤوليته الوحيدة، لا بد وأن يركز على ذلك.

قطع فترة الصمت المتاحة ليبدأ من جديد:

– أنا آسف لو بضغط عليكو بأسئلتني، بس هفكر كوا تاني إحنا بنحاول نستكشف مع بعض التاريخ النفسي لحالة شريف.

كفكفت وداد دموعها بيديها وهي تتمتم أن لا مشكلة بتأتا، في حين دفن جلال رأسه بين كفيه في صمت ولم يحرك ساكناً، وأكمل الرجل:

– واضح من النقطة اللي وصلناها مع بعض دلوقتي أن مدام وداد أصرت على الطلاق، وإن ده تم فعلياً في سن أعتقد إنه

كان مبكر أوي بالنسبة لشريف وأخوه، حصل وهما عندهم
كام سنة تقريياً؟

ردت هي:

– سبع سنين.

حك الدكتور ذقنه بسبابته للحظة مفكراً وهو يسأل:

– طيب ممكن توضيحي حضرتك إيه اللي تم بعد كدا؟

دارت بعينها في المكان بشرود مستعيدة مخيلتها صوراً من
الماضي أفصحت عنها:

– اتطلقنا، خدت الولدين معايا، ورجعت البيت القديم.

أوما برأسه متفهماً ثم استدرك بسؤال آخر:

– هما اللي اختاروا كده؟ قصدي يعني إنهم يسيبوا بيت أبوهم
ويجوا معاكي؟

لم تجبه على الفور، أخذت وقتاً استنشقت فيه من هواء المكان
ما يكفيها لتبقى هادئة قبل أن تفصح:

– كانوا صغيرين لسه يا دكتور، بقولك سبع سنين بس، أكيد
مكانوش مستوعبين لسه فكرة اتخاذ القرار.

أوما برأسه أمامها متفهماً وهو يطرق بظهر القلم بين أصابعه
على سطح المكتب في رتابة بدت موترة لهما، وأشبهه بدقات عقارب

الثواني في ساعة عملاقة، لم يباشرها بسؤال جديد، ترك للحظات الارتباك النفسي فرصتها في محاورتهما، كلاهما يقبع منحنيًا أسفل كم من الأوجاع كانت تتزايد وطأة مع تسارع طرقات القلم الذي توقف في النهاية مع سؤاله:

– أستاذة وداد، ممكن تكلميني عنهم شوية؟

رفعت رأسها نحوه تتساءل ما قصده بعين تغيبت للحظات عن الواقع فتمتم:

– شريف وياسين، عايز أعرفهم أكثر.

صدرت منها تهيدة طويلة في بادئ الأمر، ثم تكلمت.

الفصل السادس

«لا شيء مطلق، للحقيقة ذاتها أكثر من وجه»

– كنت عيل شقي إنت يا شريف ومصاييك كثير!

انتزعتني جملة الدكتور إبراهيم من الشرود فتنهت لوجوده، عن شعوري في تلك الساعة التي تلت استفاقتي كنت أفكر، علامة استفهام تحتل المساحة الأكبر من عقلي، عدد من الوجوه الغريبة يحيط بي، أحدهم هذا الغريب الأقرع الذي استقبل عودتي، حاولت مرارًا تذكر اسمه دون جدوى.

لكم تمنيت أن تنطفئ الصورة من حولي ثانية، يقيني المؤكد والوحيد هو أنني لم أرغب حقًا في العودة، على رأسي غشاوة تمنعني من تمييز الأشياء، كفأر تجارب في قفصه كنت أرقب وجلًا تصرفاتهم، تفاصيل كثيرة، وأصوات متداخلة.

– سيبوه يرتاح يا جماعة شوية.

– مفروض نبلغ دكتور إبراهيم.

فرحين بعودتي ولا أدرك دواعيمهم، بجسده الرياضي اقترب

مني أحدهم يساعدي على الاعتدال، يبدو مسؤولاً في هذا المكان، ألقى علي بعضاً من الأسئلة محاولاً قياس مدى استيعابي، ولم أجد لمعظمها إجابة.

اختبر بضغوطات بسيطة فيما يشبه العلاج الطبيعي جسدي فتأوهت بوجع تردد صداه في عظامي كلها، بينما هو مستمر فيما يؤديه قائلاً:

– معلش استحمل شوية، عارف أن جسمك واجعك بس استحمل، كل ده طبيعي انت لسه طالع من حادثة وعضلاتك بقالها أيام مبدتلش مجهود، واحدة واحدة الألم والتشتت الذهني ده كله هيروح.

عن أي حادثة يتكلم؟

لا أذكر غير احتفال لاستقبال الموت ولم يكتمل.

غيمة تحيط بعقلي وتفكيري وتفصلي عن كل ما يحيط باستثناء الألم الذي أشعر به، سمعت صوت ذلك الذي تواجد معنا برغم رحيل آخرين؛ يفترش أرضية المكان بالقرب منا وبلكنة فضولية يسأل ذات سؤال:

– حادثة إيه دي يا كابتن؟

أشار له الأخير بالصمت قائلاً:

– اسكت يا زفت، إنت ملكش دعوة، وبعدين إنت إيه اللي مقعدك هنا؟ اطلع يلا كامل التنضيف اللي وراك.

لوح الفتى عسلية - نعم، أعتقد بأنه اسمه - بذراعيه في سرعة وهو يقول:

- لا ما أنا خلصته الحمد لله، مسحت الحمامات كلها ورتبت الأوض.

رمقه الأخير بنظرة متشككة ثم قال:

- طيب، روح اغسل مواعين الغدا في المطبخ على ما أخلص اللي أنا بعمله، عايز أجي وراك ألاقي الحاجة بتبرق.

صمت الفتى وقد بدا على وجهه الضيق قبل أن يسأل مشيرًا نحو في محاولة منه للمماطلة في تنفيذ الأمر:

- هو اسمه إيه صحيح؟ أصل من ساعة ما فاق وأنا بسأله ومش عارف أطلع منه برد.

جاوبه باقتضاب وهو يحرك ركبتي متممًا على مرور الدم خلالهما:

- روح يا عسلية اعمل اللي قلتك عليه، ملكش دعوة إنت بحاجة.

لم يسرع الأخير بتنفيذ الأمر فاحتد عليه الرجل إلى جوارى مكرًا بلهجة أمرة:

- هتروح تعمل المطبخ زي ما قلتك وللا أخليك تعيد نضافة عالمكان كله تاني؟

هب الأخير واقفًا ليتدارك الأمر وهو يقول:

– لا، خلاص هروح، بلاش تهور الله يرضى عنك.

شبح ابتسامة لاح على وجه محدثه وهو يلوح له:

– طب روح يلا يا زفت... بسرعة.

هز رأسه واندفع إلى خارج المكان قبل أن يتوقف محاولاً
استغلال ابتسامة المشرف بشيء من رجاء:

– مفيش سيجارة تشجيع طب يا كابتن؟

قالها ثم عدا خارجاً مع صيخته التهديدية:

– عسلية، اختفي من قدامي فوراً، يلا!

بات المكان خالياً بعد رحيله باستثنائي أنا والمشرف الذي مد
يده متحسساً حرارتي ثم قال محدثاً نفسه:

– عمال تصب إنت فعرق من كل حته.

قالها وهو يفتح أزرار قميصي سامحاً لمزيد من الهواء بلفح
جسدي قبل أن يتوقف لحظة مشيراً إلى أثر احتراق قديم فوق صدري
احتل الجزء الأعلى منه وهو يتساءل:

– دي ايه البلاوي اللي في جسمك دي كلها؟ قديمة العلامة دي
وللا برضو من الحادثة؟

أربكتني أسئلته مرة أخرى وأنا أبحث لها عن إجابات محاولاً إمالة
رأسي لوضع يسمح لي برؤية الحرق، أحاول التذكر، فلربما تسلل عبر

وعبي أي شيء... عجيب كان هذا الشعور، أن تجهل في لحظة عن نفسك ما يعرفه آخرون، هذا ما كان الوضع عليه لحظتها.

من داخل المكتب الذي أقبع فيه الآن أمام رجل يحكي لي عني؛ كان مستمرًا في سرده الدكتور إبراهيم، ما زال يصفني بأعينهم بعد عبارته التقريرية في بادئ الأمر استطرد:

– اللي وضحي من كلامها إنك من صغرك شخص رافض للمألوف، عنيد، اندفاعي، بتحب تجرب حتى وانت مش عارف حسابات التجربة دي ممكن توصلك لإيه.

تداركت ابتسامة إشفاق انحسرت فوق شفتي قبل أن ترسم، وانهمكت في مواصلة الاستماع إليه بمنتهى التركيز.

بشيء من الألم تأوه ياسين الطفل ابن الثمانية أعوام وهو يستقبل قطعة ثلج كبيرة ضغطت بها فوق صدره وداد التي بدا على وجهها المحمر انفعال رهيب خالطته بقايا الدخان المتكاثف من حولهم والذي وجد لنفسه مآلا عبر النوافذ المفتوحة للخروج.

كانت الشقة تعج برائحته الخانقة التي تبدد معظمها، وبكم من الجيران الذين هرعوا إلى المكان فور رؤية ألسنة اللهب وسماع صيحاتها، وفي ركن بعيد وقف شريف مرتعشًا يستند إلى إحدى الأركان ويترقب كاتمًا أنفاسه يتمنى أن لا تقع عينها عليه.

في ثورة عبرت عنها نبرتها مع صدرها الذي اتخذ ارتفاعه وهبوطه

سرعة أعلى من الطبيعية صرخت تناديه:

– شريف!

ربت إحدى الجارات على كتفها مهدئة، بينما الصغير الخائف يقاوم رغبة داخلية عارمة في بل سرواله وهو يحاول النفاذ بجسده عبر جدران الحائط التي انطلت أغلب أركانه بلون فحفي، كان غضبها أكبر من أن يتم احتواؤه، هي أم شهدت من لحظات واقعة كانت أكبر من أن تتحملها: نيران تصاعدت فجأة من داخل حجرة الطفلين يتبعها دخان كثيف، لوهلة لا ترحم عاودها شعور الفقد من جديد، وبرغم خطورة الأمر اقتحمت عليهما الغرفة محتمية بصرخاتها الملتاعة، كارثة كانت، نجا منها الجميع بأعجوبة، لكن قلبها لا يسعه استيعاب المشهد حتى الآن.

مرة أخرى كررت نداءها الصارخ له:

– محدش يحاول يهديني، تعالى هنا يا شريف؛ بقولك.

بأقدامه المرتعدة اقترب الفتى منها لتنقذه يد حسن التي امتدت جاذبة إياه وصاحبها يتمتم:

– خلاص يا بت عمي، خلاص محصلش حاجة، مفيش داعي نخوف الولد أكثر من كدا.

أجابته مواصلة صياحها وهي تهب من مقعدها نحو الأخير:

– هو إيه اللي محصلش حاجة؟ الأوضة كلها ولعت وهو وأخوه كانوا هيروحوا وتقولي إنت بلاش نخوفه؟

ثم امتدت يداها تحاول انتشارال الفتى الذي تشبث بالرجل قائلة
في عصبية:

– إيه اللي إنت عملته ده؟ هه؟ قوللي مين قاللك تلعب بالنار؟

كرر عليها حسن كلماته وهو يتراجع مبتعدًا بالفتى عنها:

– يا ستي قلنا إهدي شوية، الولد صغير مش كدا.

ارتفع في تلك اللحظة تأوه آخر من بين شفتي ياسين، فالتفتت هي
بنظرها نحوه قبل أن تعض شفتيها في غيظ وهي تردد محدثة الصغير:

– كلمني هنا ورد عليا، جبت الولاة دي منين؟

مرتجفًا بصوته الخافت همس:

– من المطبخ.

ارتفعت يداها لتهبط فوق وجهه بصفعة ساعده حسن على
تحاشيها، فانفجر في البكاء دفعة واحدة بينما ذلك الأخير يفصل بينها
وبينه وهو يقول:

– الله الله الله، مش هينفع كدا يا وداد، بالله عليكي لا تقعدى
إنتي وسببيني أنا هتكلم معاه.

ثم اتجه خارجًا معه الفتى عابرًا من بين جرادل المياه الملقية
أرضًا هنا وهناك قبل أن يشير لإحدى الموجودات في المكان:

– حاولي تهديها شوية يا ست اعتماد، وافتحوا باقي شبابيك

المكان عشان ريحة الدخان لسه زاعقة.

هزت له المرأة رأسها بينما تبعته وداد ببصرها وهو يتجه مع صغيرها نحو الخارج ليتخذ مجلساً أمام الباب بجواره على إحدى عتبات السلم... شعر شريف على الرغم من صغره بامتنان نحو حسن؛ منقذه الذي انتشله من براثن غضبها الهادر... سأله الرجل بعد هينة من الصمت بنبرة هادئة وهو يربت على ظهره مهدئاً:

– قوللي بقى يا شريف، إيه اللي إنت عملته بالضبط؟

انبعث زفير الفتى مع انتحابه ثم أجاب بصوت باك متقطع:

– م... معرفش، أنا ك... كنت بلعب بالو... لاعة... بتاعت ما... ما اللي بتشيلها في المطبخ، وياسين كان نايم في الأوضة، النار هيا اللي مسكت في الملاية فجأة وعملت كده، أنا معملتش حاجة يا عمو والله، والله ما عملت حاجة.

قالها ثم انهار مرة أخرى في البكاء أمام حسن، فأحاطه الأخير بذراعيه يحتضنه ويكفكف عن وجنتيه الدموع بكم قميصه مغمغماً:

– خلاص، إهدى طيب، إهدى مفيش راجل بيعيط.

ظل على وضعه هذا قليلاً حتى شعر بأنفاسه تهدأ، فأعاد رأسه للوراء ناظراً في عينيه وهو يقول:

– طب إنت مش عارف يا حبيبي إن اللي إنت عملته ده خطر؟
ماما مش قاصدة تخوفك، ماما بس خافت عليك إنت وياسين
لنتأذوا.

تمتم الفتى بنفس النبرة المتهدجة:

– أنا كمان يا عمو برضو كنت خايف، ومعرفش هو حصل كدا
إزاي.

ابتسم له حسن وهو يربت على ظهره ثانية قائلاً له:

– النار يا شريف يا حبيبي، النار مش لعبة، في لحظة المكان ده
كله كان ممكن يولع ومحدث يعرف يلحقكم.

اتسعت عينا الفتى في ذعر وهو يسأل:

– يعني أنا كنت ممكن أموت؟

شاركه حسن اهتمامه بنظرة عين متسعة ليضفي على الأمر
أهمية وهو يقول:

– طبعًا، إنت وياسين وماما كمان، كان ممكن النار بعد
الشر تمسك فيكوا كلكوا وتحرقكوا زي ما حرقت الحيطه
والملايات كدا، إنت تحب ده يحصل يا شريف؟

بدا الذعر في عين الفتى مع تخيله للوضع وتمتم:

– لأ، أنا والله بحب ماما وياسين.

لكزه حسن في صدره مازحًا مع قوله:

– ماما وياسين بس يا ندل؟ طب وعمك حسن اللي بيخليك
تلعب بالكورة مع صحابك قدام الورشة بتاعته تحت؟ إيه؟

ملوش نصيب مالحب ده؟

أخفض الفتى عينيه خجلاً وهو يرد:

– لا بحبك والله، وبحب كمان بابا عشان بيحبيلنا لعب معاه
وهدوم جديدة وهو جي من السفر.

كانت كلمات بريئة خرجت من بين شفتي الصغير، لكنها بدت
أشبه بلطمة تلقاها حسن في مشاعره فكتمها للحظة قبل أن يحمله
على النهوض مانحاً إياه تربيئة أخيرة وقبله فوق وجنته:

– يلا طيب، روح بقى ادخل اعتذر لماما واوعدها إنك مش
هتعمل كدا تاني.

أمسك شريف بيديه قائلاً:

– طب تعالى إنت معايا عشان متضربنيش.

– لا خلاص أنا مش هضربك.

أتاهم صوتها من خلفها وهي تقف على عتبة باب الشقة، فالتفت
كلاهما نحوه، عاودها الهدوء، وباتت أنفاسها منتظمة هادئة برغم
الدمعات التي جفت تحت عينها، تحسست رأس شريف في حنان وهي
تحدث الآخر:

– أنا أسفة على العصبية يا حسن، بس المنظر أصله كـ...

منعها من استكمال العبارة وهو يشير لها بقوله:

– طبعي يا وداد، أنا مقدر أكيد فمتعتذريش.

انسلت يداها من فوق رأس الصغير إلى أذنه لتقرصها برفق قائلة:

– بس إنت إياك بقى تعمل كدا تاني وللا تلعب في حاجة من الحاجات بتاعة الكبار.

هز شريف رأسه متفهّمًا في حين تههد حسن وهو ينهض ليقف أمامها قبل أن يقول:

– حصل خير الحمد لله، جات سليمة.

ثم أطل برأسه إلى داخل المكان متسائلًا:

– ياسين أحسن دلوقتي؟

أمالت رأسها أمامه واضعة كفها في وضع مواز لهذا الميل مفصحة:

– نام شوية، هخلي اعتماد تاخده عندها الساعتين الجاين
دول بس لحد ما الريحة دي تهدي عشان صدره ميتعيش وهو
نايم.

سألها مرة أخرى:

– طب، إنتي دلوقتي مش هتحتاجي مني حاجة؟ تيجي تقعدني
إنتي وشريف معايا تحت في الهوا قدام الورشة عشان الريحة
دي غلط برضو عليكم؟

هزت رأسها بهدوء معتذرة:

– خد معاك شريف شوية بعيد فعلاً، أنا لازم أرتب الدنيا اللي اتهدلت دي وأشوف بقى كم الخسائر اللي حصلت.

تواردت على عقله ألف جملة وجملة قبل أن يتمتم:

– تمام، بس لو يعني احتجتي مني حاجة برضو قوليلي، أنا تحت.

قالها مرتبًا وهو يسحب الفتى نحوه أمامها فرشقته عينها بنظرة امتنان... لكم تمنى قولاً غير الذي قاله، لكم تمنى احتضانها في تلك اللحظة مفصّحًا لها عن فيض ما يكن لها من مشاعر، لكم تاق لمجرد لمسة من يدها في سلام عابر تلقائي، ولكنه لم يفعل، قالها مكثفياً بعينيه اللاتي تفضحانه كالعادة، ولا أكثر من ذلك.

امرأة وحيدة كانت، تتحمل وحدها عناء الاعتناء بصغيرين في بداية العمر، يزورهم كل عام في أجازته القصيرة طليقها محملاً بالهدايا، كان يعود حاملاً لها معه الماضي، وشعورا بألم لم يفارقها.

أمامها الآن يجلس هو مستمعاً لما تحكي، ومن خلف مكتبه الدكتور إبراهيم ينصت متابعًا تسجيل نقاطه الهامة فوق الورق... سنوات على هذا الحال، فترة ليست بالقصيرة حتمًا، فترة بإمكانها تغيير الكثير.

– الله يكون في عونك يا أستاذة وداد، تربية ولدين لوحدك في السن ده أكيد مكانتش حاجة سهلة.

قالها الدكتور إبراهيم محاولاً سحب الحوار لمنحى آخر قبل أن

يستفسر:

– واضح أن شريف كان من صغره نشيط زيادة عن أخوه الله
يرحمه، يعني حركته أكثر أو (مهيب) زي ما بيقولوا.

تدخل جلال موضحًا:

– بالعكس يا دكتور، شريف صحيح بيان كدا، لكن الحقيقة
إنه كان انطوائي ومنعزل أكثر من اللازم.

عقدت هي حاجبها في احتداد عليه وهي تقول:

– لا والله؟ وانت حسيت ده منين بقى إن شاء الله؟

رمقها بنظرة جانبية قبل أن يزفر معاودًا صمته، فاستحثه
إبراهيم على المتابعة بقوله:

– اتفضل يا أستاذ جلال، أنا سامعك، كمل وجهة نظرك،
حكمت على شريف منين إنه انطوائي برغم إنك فعلاً انفصلت
عنهم وقت طويل ومكنتش بتشوفهم غير على فترات متباعدة
طول السنين اللي فاتت زي منا فهمت؟

تجاهل هذه المرة نظراتها الحانقة وأسلوبها وهو يعتدل قائلاً:

– أنا أبوه يا دكتور إبراهيم، حتى لو كنت بعيد عنهم فا أنا أبوه،
يعني أكثر حد يقدر يحكم عليه أو يفسر تصرفاته، متنساش
كمان إنني حضرت أول سبع سنين معاهم، عايشتهم وشفتهم في
أوقات زعلمهم والفرح، ده غير إنه في السنيتين الأخرى دول بعد

ما خلاص دراسته الثانوية جالي الكويت عشان يكمل دراسته الجامعية عندي هناك، شريف كان من صغره طفل متميز، حساس لدرجة عالية جداً، يمكن أكثر من أخوه ياسين، واللي كان أقرب في طباعه الشخصية مي، يعني من ناحية اهتمامه بنفسه، تفوقه الملحوظ دراسياً، لباقتة الاجتماعية اللي كانت بتحب أغلب الناس فيه، حاجات من هذا القبيل.

أشار له إبراهيم بالتروي وهو يسجل فوق الورق معلومة ويتمتم:

– هو شريف سافرك الكويت؟ مذكرتوليش إنتوا المعلومة دي، جالك إمتي وعلى أي أساس؟

نطقت هي:

– في فترة الجامعة بعد ما خلاص ثانوية عامة زي ما قال لحضرتك.

منحها نظرة مهتمة دعاها بها للمتابعة فقالت:

– مكناش لسه وصلنا للنقطة دي، أنا كنت بتكلم وانتوا اللي قاطعتوني.

اعتذر لها عن المقاطعة التي لم يقصدها، فأخذت نفساً عميقاً ملأت به صدرها ثم تابعت:

– اللي بيقولك إنه عارف عياله ده ناسي إن اللي ربي خير من اللي خلف، ده غير أنو أنا أمهم اللي عاشرتهم أكثر منه بحكم الظروف.

افتتحت حديثها بتلك الجملة الاعتراضية قبل أن تكمل والدكتور إبراهيم يجاهد لمنع تناؤب صادفه معتدلاً مرة أخرى أمامها وهي تواصل:

– شريف اللي بيقول عليه انطوائي يمكن مبقاش انطوائي غير أما سافر عنده هناك في الكويت، ودا يمكن من شكل العيشة معاه هو ومراته صاحبة الصون والعفاف.

انكشف رغمًا عنها شعورها الأنثوي بالغيرة في الجملة الأخيرة، إلا أنها تجاوزته في سرعة متخذة من استمرارها في الكلام ملاذًا:

– عندي استعداد أحكي لحضرتك مواقف كتير أوي جالي فيها شريف يشاركني أمور تخص حياته وقراراته، ودا بس عشان أعكسلك مفهوم اللي اسمه أبوه عن إنه انطوائي.

لسبب ما لم يدركه أحدهم قطعت جملتها للحظة، وكأن غصة في حلقها وقفت تعاندها في الخروج، احمرت قليلاً مقلتها، ثم استطردت:

– ياسين هو اللي كان بيفضل أكثر القعاد مع نفسه، مش من منطلق انعزالية على قد ما كنت بحسبها تركيز أكثر في مستقبله الدراسي، حتى لما دخلوا ثانوية عامة؛ شريف حب يدخل أدبي في حين إن أخوه فضل القسم العلمي أكثر، هما الاتنين كان بينهم حاجات مشتركة زي حيمم للقراية، بس كل واحد فيهم كان بيقرأ في مجال غير الثاني، شريف كان موهوم بالروايات والقصص، وياسين كان بيعشق الكتب العلمية المتعلقة بمجال علم النفس.

صمتت ثانية، لحظات الحزن العابرة تغافلها، تقاومها كل حين
وأخر بتنهيدات أكملت بعد كل منها:

– كان نفسه يطلع دكتور نفسي زي حضرتك كدا، قالها لي مرة
زمان... متسألنيش مين فيهم كان أقرب لقلبي عشان ده سؤال
ميتسئلش لأم.

لوح لها رافعاً أحد حاجبيه وهو يقول:

– بس ده سؤال أنا مكنتش هسأله، اطمني، دي حاجة بديهية
أكيد.

أومات برأسها للحظة، ثم تابعت تسرد لحظة من تلك اللحظات
التي سجلت نفسها في ذاكرتها، كان عقدٌ قد مر على انفصالهما، سنوات
عشرة حاولت تناسي الأمر خلالها محتمية باهتمام صبته كله لصالح
ولديها، حاولت تجاوز شعورها بالوحدة معهما.

لم يكن الأمر سهلاً بالنسبة لها وهي امرأة فقدت شعورها بالأمان
تجاه كل شيء وشخص حولها سواهما، اكتسبت عصبية لم تكن في
طبعها، وقسوة لم تدرك من قبل وجودها فيها. كانت بقدر احتياجها
المفرط له تنكر ذلك، ترفضه، حتى في أوقات زيارته المتقطعة لهم
بين الحين والآخر كانت تشعر باضطراب شديد. للواقع أحكام نقبلها
حتى وإن كنا رافضين، فُرِضَتْ علينا ولم يعد لنا فيها حق الاختيار.

هل تأثر الولدان بذلك؟ ربما! بادرها التساؤل للمرة الأولى
يوم وقفت مصدومة أمام مصارحة شريف لها برغبته في السفر،
تلك الصدمة التي أخفتها وراء قناع من الجمود ارتدته وهي تفتعل

الانشغال بمتابعة ما تعرضه شاشة التلفاز الصغير أمامها في صالة الشقة الضيقة قائلة دونما التفات نحوه:

– مش فاهمة يا شريف؟ تقصد إيه بإنك عايز تسافر؟

أجابها ببساطة من اتخذ قراره النهائي:

– إيه اللي إنتي مش فاهماه؟ بقولك عايز أسافر أكمل دراستي الجامعية في الكويت عند بابا، حاسس إن فرصتي في الدراسة هناك هتبقى أحسن من الوضع هنا.

تماسكت لتبدو نبرتها هادئة وهي تسأل:

– وإنتي إيه بقى اللي ناقصك هنا؟

هز كتفيه متأفماً وهو يغمغم:

– بغض النظر عن إيه اللي ناقصني، أنا كبرت دلوقتي ودي مرحلة في عمري أعتقد إنني مسؤول فيها عن اختياراتي، وبعدين أنا مش شايف إنني بقول حاجة غلط، أنا مش مسافر أتغرب لوحدي، وأبويا اللي هيبقى معايا مش حد غريب.

نغزت كلماته مشاعرها كسكين حاد يداعب جرحاً قديماً في روحها، كانت قسوته التي لم تعرف بأي قدر قصدها في الحديث دافعاً لعنادها الذي ردت عليه به متهمكة:

– دلوقتي بقى أبوك؟ بعد كل السنين دي ولسه مبتعتبروش غريب؟

لم يستخلص من عبارتها غير استنكار حاول أمامه الدفاع عن نفسه وهو يسأل:

– مش هيا دي الحقيقة؟ وللا إنتي عايزانا نشوف بس اللي إنتي شايفاه؟

ثم نظر إلى ياسين شقيقه الجالس جوارهم يشهده:

– ما تقول حاجة يابني إنت، هو أنا في كلامي حاجة غلط؟

مط الأخير شفتيه باحثًا عن إجابة لم يجدها، هو الآخر ما بين إدراكه لأسباب شقيقه وتفهمه لشعورها كان محتارًا، فوجد الصمت حلًّا أفضل؛ جاوبهم به قبل أن يعاود الانهماك فيما يفعله برغم نظرة ألقاها نحوه شريف شذرًا وهو يصبح باحتداد فيه:

– تصدق بالله أنا غلطان إني بشهد عيل سلمي زيك.

لم يمنح ياسين جملة شقيقة العصبية اعتبارًا في حين نهضت هي بحركة حادة من وسطهما متجهة إلى حجرتها وهي تهتف:

– اعمل اللي عايز تعمله يا شريف، عايز تسافر لأبوك سافرله، أنا مش همسك فيك، دور بنفسك إنت على مصلحتك وشوف هتلاقها فين.

لاحقها قبل أن تغلق الباب وراءها هاتفًا:

– زعلانة ليه دلوقتي طيب؟ إحنا مش قاعدين بنتناقش مع بعض؟

أجابته وهي تسحب الباب وراءها في عنف:

– ملكش دعوة بزعلي، اعمل اللي انت شايفه يا شريف، وابقى
خلي أبوك ينفحك لما تروحله هناك.

قالتها مختمة القول بصدى انغلاق الباب على الكذبة، لقد كانت
حقًا غاضبة، ولأقصى الحدود.

– متلومنيش أنا، لوم نفسك، لوم مشاعرك اللي كانت أضعف
من قرار كان لازم تاخده لما جتلك ألف فرصة لده.

في رأسه كالدوامات دارت كلمات السيدة العجوز مرارًا وهو
يحاور خواطره: «هل أخطأت حقًا بصمتي؟ هل جانب خوفي وترددي
الصواب لأعوام طوال كما صارحتني منذ قليل؟ وهل أنا وحدي
الملام أخيرًا برغم كل هذا الأسي؟».

حفنة من التساؤلات احتشدت في عقله وهو يجلس على مقعد
الانتظار في تلك الشرفة المجاورة للباب الذي تقبع وداد منذ ساعات
مع طليقها والطبيب خلفه، تطل عيناه السارحتان على قرص الشمس
المائل للحمرة أمامه، يمضي في رحلة معتادة للمغيب، صوت مرشات
المياه المشتغلة لتوها ينبعث مضيئًا للأصوات في عقله صوتًا جديدًا:
«هل كان من الأفضل مصارحتها؟ هل وافته الفرصة مرارًا وأهملها؟
هل؟»

يذكر الآن كثيرًا من لمحات الضعف التي صادفته بها عيناها، يذكر

فترة كان فيها رجلاً وحيداً في نطاق حياتها، رجلاً اكتفى فقط بمكانه القريب، رضي بتلك المسافة التي رسمت له ولم يتجرأ أبداً على اقتحامها... كتائه بين التراجع والإقدام ظل دوماً يتساءل: أعلية حقاً الاعتراف بما يجيش في القلب نحوها من مشاعر؟ أعلية الآن كشف حقيقته؟ تساءل كيف ستتجاوب هي مع الأمر؟ كيف ستتقبله؟ ربما لم يسبق له التفكير قبلاً في تلك النقطة، كانت تلك حكايته التي عاشها ولم يكتب لها في خياله يوماً نهاية.

فاردًا أشرعته كان يبهر بلا خريطة أو هدف، فقط لأن البحر استهواه، تحمله الأمواج يوماً خلف آخر وسنة بعد سنة، وتعبه به بعيداً عن كل الشيطان، ينهل من نظراتها فقط لوجوده الاستمرارية مستزيداً من وجودها الأمل لروحه.

تلك السيدة العجوز كانت على حق، لماذا رسم لنفسه حدوداً لم يضعها أحد له؟ من أي شيء خاف؟ لعله أخبرها ذات يوم مضى، ولعلها وافقت، ولعل كل شيء حينها لم يكن ليكون كما كان، كانت لديه فرص قبل ارتباطها، وكانت لديه أحرّ بعد الانفصال، لكن خوفه من فقدانها أعماه.

أيا ويل قلوب العاشقين من خوفها، تسكنهم زنازين الصمت، ليقتضوا مع التردد فيها أعواماً لا حصر لها.

تنبه في تلك اللحظة وسط أمواج خواطره إلى ذلك الرجل صاحب الجسد الرياضي الذي اقترب عابراً من أمامه ملقياً عليه التحية، فجأوبه بإشارة من يديه مكتفياً بذلك، ثم تابع اقترابه نحو الباب وطرقه قبل أن يفتحه دالِقاً إلى حيث يجلس ثلاثتهم: الطبيب، وداد،

وطليقها.

– ووصل أخيراً شريف.

كانت تلك الجملة أمام الدكتور إبراهيم نطقها أبي، ونقلها لي الأول مواصلاً نسخ ما أفصح به ضمير محدثه، لأمسني شعور داخلي بالسعادة كنت قد افتقدته للأبد حين رأيتَه في المطار أمامي.

– أخبرتك بأني لم أعهد السعادة يوماً بعد انفصالي عنها، أمضيت الأعوام في موت بالكاد أحياء، لكن شيئاً ما حقيقياً في نفسي تجلى حين رأيتَه، انبعث شعور خجول في قلبٍ مكتئبٍ بالفرحة إن كنت تفهم ما أعنيه.

بتعبيرات كانت قريبة من ذلك حاول جلال وصف تلك اللحظة التي جاءه ابنه فيها، وكأنما استعاد لحظتها قبساً من مشاعر أبوته التي واراها تحت أكوام يأسه والثقة التي انعدمت بداخله منذ طلاقهما، لم يطل في حديثه عن تلك اللقطة، أراد أن يوضح منها فقط جزءاً مهماً يعنيه هو قبل أن يتجاوب مع السؤال الذي وجهه إليه إبراهيم:

– الفترة دي بقى اللي عاشها شريف معاك، كانت سنتين تقريباً مش كده؟

– أقل يا دكتور، سنة بس وكام شهر.

بدا شيء من عدم الاستيعاب على وجه الدكتور إبراهيم فاستمر جلال موضعاً:

– شريف كان جايلي يدرس هناك، قعد موسم دراسي أول سنة، رجع أجازة لمصر في آخره، قبل ما ييجي تاني السنة اللي بعدها وميكملش إلا كام شهر، يعني بالتحديد كدا، شريف راجع مصر تقريبًا بقاله شهرين، وأنا اللي رجعتة بنفسي أول ما خلص امتحانات الترم الأول في الكلية هناك.

سأله إبراهيم عن السبب:

– وإيه اللي حصل خلاك تعمل كده؟

رمق تلك الجالسة إلى جوارهم صامتة، ثم بنبرة أسي متمم:

– قصدك تسألني إيه اللي محصلش.

تعالت في تلك اللحظة بعد انتهاء عبارته طرقات ثلاث على باب المكتب انفتح على إثرها ليدلف عبره معتر مساعده بقوامه الرياضي الممشوق متأملًا كليهما قبل أن يتجه نحو إبراهيم منحنيًا بخبر همس به في أذنه، فانفجرت أسارير الرجل لسماعه وتراجع ينظر لمحدثه قائلاً:

– الحمد لله، ده خبر هايل جدًّا يا كابتن.

ثم واجههما مفصلاً:

– مبروك يا جماعة، شريف ابنكوا أخيرًا فاق.

تحفز كلاهما فور سماع الخبر، واندفعت وداد بمزيج جمع ما بين اللهفة والقلق تسأل:

– فاق ازاى يعنى؟ وبيتكلم فى ايه؟

أجابها الكابتن معتز قائلاً:

– اطمى حضرتك هو بخير ومفيش حاجة تقلق، جسمه بس محتاج مدة على ما يسترد تعافيه، وفي قصور فى الاستيعاب، عقله برضو مع الوقت هيتغلب عليه، هو فاق من ساعة تقريباً، مش فاكسر اسمه وكل أسئلته متعلقة بالمكان اللي فاق لقي نفسه فيه، ودا شيء إحنا كنا متوقعينه ومنطقي بالنسبة لواحد طالع من حادثة وقضى أكثر من خمس أيام غايب تقريباً عن الوعي تحت تأثير المخدر والمسكنات اللي كان بياخذها.

قاطع الدكتور إبراهيم حديثه غير أبه بسؤالها وهو يأمره:

– روح إنت يا كابتن دلوقتي فكله المحاليل اللي كنا معلقيناه، وخليهم يحضروله لقمة خفيفة ياكلها، خلوا بالكوا أن جسمه فى حالة خمول لسه، فا متحاولوش تجهدوه كثير فى الكلام، وأنا شوية وهاجى بنفسى أطمى عليه.

هز معتز رأسه مستوعباً الأوامر كلها، ثم استدار راحلاً قبل أن يغلق الباب المفتوح وراءه ليتراجع إبراهيم فى مقعده مسترخياً يتأمل ملامحهم أمامه باحثاً بلا جدوى عن الأمل المتجدد فيها.

لا تبدو على وجهيهما فرحة حقيقية، تزامم المشاعر بعضها بداخلهما، بين قلق وفرحة وتربص وترقب وحزن مع كثير من الإرهاق، كثير جداً.

نظر إلى ساعته التي أشارت عقاربها إلى السادسة ووضعت دقائق
قبل أن يستطرد:

- واضح يا جماعة إن أكثر من خمس ساعات متواصلين في
الجلسة ده شيء مجهد عليكو زيادة، أنا يمكن عشان ده شغلي
فمتعود عليه، بس عمومًا إحنا فاضل قدامنا حوالي ربع
ساعة على المغرب، خلونا نكمل لحد الأذان، وبعدها هناخد
استراحة تشموا فيها نفسكو وأروح أنا بالمرة أصلي وأعدي
أظمن على شريف في الديتوكس بنفسي عشان تبقوا مطمئنين
أكثر، اتفقنا؟

لم يجبه أحدهما، فقط تبادلنا نظرات تنم عن الموافقة بعد
عبارة، كلاهما بحاجة للراحة، وكلاهما تفضحه عيناه.

الفصل السابع

«صدق قلبك فقط، فكل ما سواه مزيف»

شيء ما تسلل إلى نبرة الدكتور إبراهيم وهو يسرد على مسامعي هذا الجزء من روايته، شيء ربما كان تعاطفًا تنامي داخليًا فيه من صدق راويها: أبي، ذلك البائس برغم ما يملك، صاحب الذنب الذي قرر تعذيبه حتى آخر العمر، لم يمس على حاله من يوم الانفصال، شيء مهم في روحه انتقص، يذكر إبراهيم كلماته جيدًا، تعبيره عن السعادة التي خامرته لحظة المعرفة بأن ابنه سيحيي، عرّفها باستعادة جزءٍ من حياته.

– لحظة ما لمحته في ساحة المنتظرين جوة المطار حسيت أن لحياتي قيمة.

كان فرحًا كطفل صغير أعادوا إليه لعبة يعشقها، بيد أنها كانت فرحة لم تتح لها الأقدار حق الاستمرار، هكذا عبّر عن شهور تلت ذلك الاستقبال الهيج، حدثه عن شعوره كأب كان يلحظ يومًا بعد يوم ذلك التغيير الذي طرأ على ابنه، عن تفاصيل عدة في تصرفاته المؤرقة: سهره الطويل الدائم في حجرته، عصبيته الملحوظة، تأخير

المستمر، عزلته التي باتت جزءًا لا يتجزأ من شخصيته والتي لم يحاول هو أن يقتحمها؛ موعرًا أسبابها لتلك الفترة التي ابتعد عنهم فيها وأضحى في نطاق حياتهم فعليًا لا وجود له.

بكلمات لخصت أفكاره قال:

– أنا أب فشل في إنه يحافظ على ولاده وهما صغيرين يا دكتور، دي الحقيقة اللي كنت بهرب منها بعد انفصالي عن وداد، واللي رجعت تطاردني يوم ما لقيت ابني بيضيع قدامي وهو كبير بعد كام شهر بس من وجوده معايا في الكويت.

لم يحك له بالطبع عن ذلك البرود الذي احتل تفاصيل علاقته بجيهان، وحدي الآن فقط أعرف، كانا كغريبين تحت سقف واحد، تجمعهما جدران منزل لا دفة فيه، هو منكب في عمله هاربًا من اليأس واحتشاد الخيبات على رأسه، وهي لا تعنمها غير حفلاتها وسهراتها التي لا تنتهي.

كان المشهد أمامي يُسرد مضافًا له من عقلي تفاصيل ترسمه عن ليلة لم ينسها أبدًا، تلكم ليلة انكشاف الحقيقة، الصورة واضحة، لا كد بالنسبة لي في تخيلها.

أمامه – في مواجهة مرآة تمحو قبالتها بقايا المساحيق التجميلية عن وجهها – جلست يراها وهي تنزع من فوق جفنها تلك الرموش الصناعية، ويراقب خلعها لعدسات عينها اللاصقة مولية له ظهرها، لا تعير لهمومه – كعادتها مؤخرًا – أدنى اهتمام، صادفته عبر المرآة إلى جوارها ملامحه، فتأمل شكله الذي غيره الزمن، ذلك البريق المثابر في

عينيهِ متى انطفأ؟ متى أمسى ككم مهمل لا يأبه بوجوده أحد؟
دقائق على عودته المنزل قد مضت، لم ينبس خلالها ببنت شفة،
قطعت خيط سكوته بسؤالها حين لاحظت وجوده وهي تتحسس
تجاعيداً وليدة على رقبتها:

– إنت هنا بقالك كثير؟

هز لها رأسه بنعم، فسألته راغبة في ملء فراغات الصمت:

– مالك؟ ساكت يعني وشكلك بتفكر في حاجة.

تمتم بصوت خافت يجيها:

– مفيش، دماغي مشغولة حبتين.

لم تلتفت، على نفس وضعها الذي اتخذته أمام المرأة استفسرت:

– مشاكل عندك في الشغل برضو؟

همس:

– في كل حاجة.

واثق أنها لم تسمعه، ومع ذلك فهي لم تسأله التكرار، مط شفتيه
في ضيق من الأمر قبل أن يتجاوزه بحكم العادة متسائلاً:

– شريف في أوضته؟

هزت كتفها معلنة عن جهلها بالأمر، ثم استدارت نحوه مشيرة

إلى جزء ما أسفل ذقنها قائلة:

– جلال بص كدا، الحباية دي باينة أوي في وشي؟

أمام رد فعلها اللامبالي زفر فقط قبل أن يجاوبها في سرعة:

– مفيش حاجة باينة.

ثم اتخذ قراره بالرحيل فخطا متجهًا إلى الخارج وهو يقول:

– هروح أبص على شريف.

لم يتلق منها جوابًا غير الصمت، لمحها فقط تشير بيديها له أن كما تشاء مواصلة تفحص بشرتها، خرج من الغرفة وأغلق بابها في هدوء خلفه، أطل على الساعة في يده التي أشارت عقاربها إلى ما بعد منتصف الليل، ثم مشى عبر الردهة الخالية إلا من بعض لوحات زيتية زينت جدرانها وسجادة أصفهانية الصنع لم يلحظ وجودها قبلاً.

لا بد وأنها ابتاعتها مؤخرًا كما ابتاعت عديدًا من الأنتيكات قبلاً بغير علمه، كانت تهوى اقتناء كل ما هو ثمين حتى وإن انتفى لديها سبب اقتنائه، لعلها اعتبرته بشخصه أحد تلك المقتنيات.

وصل إلى الحجرة المنشودة فطرق بابها وانتظر، فلم يجبه أحد، أعاد الكرة ثانية قبل أن تمتد يداه لتفتح الباب متأملًا سكون الغرفة الخالية أمامه: لم يعد فتاه بعد، برغم تأخر الوقت وخلو الشوارع تقريبًا من المارة لم يعد.

خامرته القلق – كما وصف لإبراهيم – وانقبض قلبه على خيالات

معظمها يخيف، التقط هاتفه وحاول الاتصال لأكثر من مرة بلا جدوى: لا إجابة، لم يلق قبسًا من أمان يطفئ جذوة النار التي استعرت بداخله.

– يا ترى إنت فين يا شريف؟ وإيه اللي أخرك أوي كده؟

ترددت التساؤلات في عقله وهو يعاود الاتجاه إلى غرفته منتويًا مشاركة جيهان قلقه قبل أن يثنيه الفتور، لن تكون بحال من الأحوال أكثر اهتمامًا بابنه منه، كما أنها لا تزال بكل تأكيد منشغلة كالعادة مع علب المكياج، أو بمكالماتها الخاصة التي لم يشغل باله يومًا بتفاصيلها.

لحاله وحيدًا قرر الانتظار في ركن خافت الإضاءة من الصالة في نهاية الأمر آل مآله، يجلس وبين يديه فنجان قهوة مر بلا وجه أعده ليغالب به النعاس... لعمرى كان فاشلاً في إعداد الأشياء حتى قهوته تلك التي انتهت قبل انتهاء قلقه.

مرت ساعات عليه وهو على حاله، ساعات لم تأته فيها محاولات اتصاله إلا برنين مستمر تعلقت بنهايته الخيبة... التهمته الظنون، وتزاحمت في رأسه أكثر الاحتمالات بشاعة، لون الشفق يصبغ السماء بالخارج وابنه ما زال غائبًا في هذا البلد الغريب.

– ترى أين هو الآن؟ أين؟

تنهت مسامعه في تلك اللحظة إلى صوت الأقدام المقتربة من خلف باب الشقة، ثم ذلك المفتاح المندس في فتحته المخصصة قبل أن يُدَار ليصدر تكة الانفتاح، ذلك المتسلل كلصٍ رآه، شريف، يعيد إغلاق الباب وراءه و...

– كنت فين يا شريف؟

صاح المكان بعبارته الغاضبة بغتة وهو يمد يده نحو زر الإضاءة بالمكان ليشعله، وليته لم يفعل، تمامًا كما قال، وكما ذكر على لسانه إبراهيم:

– يا ريتني ساعتها ما كنت استنيته، ولا شفته بالمنظر اللي كان راجع بيه، اللي شفته قدامي ساعتها مكانش شريف ابني اللي أنا عارفه. شكله مكانش طبيعي، كان تايه، فاجأه وجودي فوقف أمامي يترنج. متسمرة ملامحه وبصره شاخص على وجهي الغاضب وصيحتي التي اكتالت من فيض عصبية تكتنفني: «كنت فين؟ ومع مين؟ انطق! لو فاكر إنك جيت الكويت هنا عشان تقضيها من غير رقيب تبقى غلطان، حتى الحرية لو مش فاهم لها شروط».

تمنح الحرية لأي شخص بقدر احترامه لها، وهذا الكائن أمامه حينها يبدو غير أهلٍ لأقل القليل منها بتلك الزرقة أسفل عينيه، وصمته المريب... تابع واصفًا:

– قربت منه، شديته جامد من دراعه لدرجة إنه كان هيقع قدامي فعلاً، أول مرة يومها ألاحظ أن جسمه ضعيف بشكل مبالغ فيه...

سألته تاني: «يا بني ما تنطق؟ كنت فين كل ده؟ فجاوبني بلسان ثقيل ونبرات متقطعة: «كن...ت ب...ذا...كر عند ناس أص... حابي. وال...وقت ب...».

مهتميش برده، كان واضح أوي إنه بيكذب عليا، بس اللي شد انتباهي ساعتها ريحة نَفْسُه، دي اللي عرفت منها الحقيقة، وفهمت هو ليه من الأول مكانش عايز يتكلم.

– أدمنت الكحوليات لفترة كبيرة إنت يا شريف؟ وللا كانت بالنسبالك مجرد سلم للمادة العالية؟

قطع الدكتور إبراهيم الحكاية بسؤاله قاطعًا عني تسلسل المشهد، نظرت إليه، تعيق لحظة الشرود إجابتي في حين تدخل عسلية ولكنة ضاحكة:

– إيه الكلام السلي ده يا دكتور؟ إنت كدا بتوقعه خطوة أولى.

منحه الرجل ابتسامة جانبية وإن ظلت عيناه معلقة بي باحثًا عن سر ربما كنت أخفيه ولم يحن وقت بيانه بعد، لم أتحاشى نظراته، كنت أطل خلالها على بقية قصتي التي لم تكتمل لدي تفاصيلها، تحاشيت فقط سؤاله بتممتي:

– متهيألي المغرب أدن ساعتها عليكم، ووقفنوا الجلسة عشان تيجيلي حضرتك بقى الديثوكس وتشوفني، صح كدا؟

تراجع في مقعده أمامي مومئًا برأسه قبل أن يسحب من الهواء لصدره نفسًا عميقًا، ربما لم يدرك تهربي من الرد، وربما لم يجد لديه حينها رغبة للإغداق وراء تفاصيل جانبية لن تغذي الآن سوى فضوله.

سحب من الهواء نفسًا عميقًا آخر، ثم عاود حديثه من جديد.

سيخبرها اليوم بكل شيء... قرار انتصف المسافة بين التردد والإقدام سيطر على رأس حسن الجالس في ذات مكانه تفصله عن الباب المغلق خطوات، وبفرع من شجرة التوت انتزعه أخذ يفصل الأوراق عنه واحدة تلو أخرى محاولاً إمالة كفة إحدى الحيرتين، متوتراً كتلميذ في انتظار نتيجه تعبت به الاحتمالات، ولا يجد مهرباً من التفكير.

لم ينتزعه صوت أذان المغرب الذي ارتفع قدر ما انتزعه صرير الباب المنفتح بعد تمامه بلحظات كاشفاً عن وجه الدكتور إبراهيم الذي عبر خلاله ومن ورائه جلال، هذا الذي تسيد الوجود وجهه وتملكت من خطواته الهموم، خرج من الحجرة بدوره خلف الرجل مستغلاً فاصل الراحة الذي منحهما إياه.

مشى غير منتبه لذلك الذي نهض عن كرسيه متأهباً أمام خروجهما مستنداً إلى سور الشرفة الخارجية يرقب عبوره أمامه كالغيب متخطياً أمر وجوده لهبط الدرجات الأربعة القصيرة في اتجاه بوابة المكان التي التقطته على عتبها عينا والدته فهتفت بلهفة من داخل السيارة محدثة نعيم:

– ده جلال طلع أهو.

استفاق السائق إثر هتافها من غفوته، فرفع رأسه عن إطار المقود متطلعاً إلى حيث تشير، لم تنتظر منه ردّاً وهي تفتح الباب المجاور لها مشيرة لفتاها الكبير:

– جلال، خير يا حبيبي طمني، عملت إيه؟

قابلها بالصمت ردًا وهو يقترب تجاههم كمعتقل حجبت عنه الحياة لعقود، بدا مهمومًا معبًا بأكثر مما يسع، وقرأت هي ذلك في عينيه فاقتربت فاتحة له ذراعها في دعوة مباشرة لعناق لم يجد بديلًا عن قبوله.

ألقى رأسه على صدرها متمنيًا دفن كل حموله التي شعرت بلفح حرارتها في صدرها من أنفاسه، منحتة لحظات من السكون عليها تكفيه، وكفمها يمسحان من فوق ظهره العبء المغلف بإحساس من الكبت متنامٍ فيه، ها هو ذا بين ذراعها يعود كطفل صغير بلا مأوى في إطار الحصن الذي أرادته له دومًا أن يكون، لم يكبر في نظرها قط، بقي دومًا وسيبقى طفلها المدلل الوحيد، جزءًا مقتطعا من روحها به تكتمل، وله منها كل ما ينميه... بصوتٍ حانٍ تسلل عبر أذنه تمتمت:

– شكلك تعبان؟!!

وافقها الرأي بهمسه:

– أوي يا أمي، تعبان أوي.

ثم أزاح رأسه عن صدرها متراجعا لترصده هي بعينها وهي تسأل:

– انتوا خلصتوا الجلسة وللا لسه؟

– الدكتور قطع الاجتماع نص ساعة بس نريح شوية وهيرجع يكمل معنا تاني.

قالها بصوت مكدود، وعقل شارد استشعرت هي لمحة ضيق فيه، فترددت بعضًا من الوقت قبل أن تتمم بسؤالها التالي:

– ياسين وللا شريف اللي جوّه؟

خشت الرد برغم فضولها، وعاندته هو غصة في قلبه، فخرج الرد من بين شفتيه ممزوجًا بنحيب وهو يخبرها:

– شريف.

أغمضت عينها في ألم تحبس دموعًا تجمعت على حافة مقلتيها وخيالها يرسم وجه ياسين حفيدها الذي أدركت لحظتها أنها فقدته، ذلك الهادئ الوديع؛ ترى ابتسامته البريئة أمامها، عبثه، قبلة كان يطبعها على وجنتيها وهو صغير طلبًا لقطعة إضافية من الحلوى. انفلت الوجد منها على هيئة كلمات تتمم بها قلبها المختلج بفعل الذكريات وهي تضمه ثانية لها:

– آاااه يا حبيب قلبي، الله يرحمك يا ياسين، الله يرحمك يا قلب ستك.

دفعها جلال برفق مبتعدًا برأسه عن صدرها، لم يحتمل رأسه المهموم نبضات قلبها الموجوع، سيذيب أحدهما الآخر إن بقيا على وضع كهذا، التقت عيونهما المغرورقة بالدموع، وعلى الحبل الواصل بينهما من الحسرة علقت آلاف الأسئلة اللائمة.

إلى جنب منهما وقف نعيم يراقبهما في صمت منصتًا لسؤال من بين شفتي الأخير خرج بفيض من اللوم لم تنجح السنوات في كتمانها:

– ليه خليتي أتجوز جيهان يا أمي، ليه ضغطتي عليا لحد ما اضطررت أعمل كدا؟

قطبت حاجبها أمام سؤاله حد التلاقي وتراجعت يطل من عينها
التساؤل عن سببه موضحة:

– غريب، تيجي تسألني النهار ده عن حاجة فات عليها سنين؟
وأجابها:

– عشان النهار ده بس عرفت إن إنتي اللي قلتيلها، مش زي ما
كنت فاكِر إنها اكتشفت لوحدها.

قالها دون اكتر اث لوقع الكلمات عليها قبل أن يتهد من فرط الألم
مستطردًا:

– وعشان دي الحاجة اللي دمرت حياتي كلها.

كان سارحًا إلى جوار أحد مساعديه يداعب بأصابعه بعضًا من
خيوط السجادة التي تربع فوقها بعد انتهاء صلاته داخل المصلى
الصغير الملحق بالمسجدة، تتحرك شفتاه دون صوت بورد من
التسايح اعتاده في حين انتظره بعض الواقفين قبل أن يقترب منه
أحدهم مادًا إليه يده بالتحية وهو يقول:

– السلام عليكم يا دكتور، عامل إيه حضرتك؟

كان محدثه أحد نزلاء المكان الذين أتموا منذ فترة تأهيلهم
معظمها، تجرأ من بين زملائه المرتقبين خلفه بإلقاء التحية التي
بإدله إبراهيم جواها وهو يعتمد على ذراعه للنهوض قبل أن يواجههم

جميعًا بسؤاله:

– الحمد لله أنا تمام، إزيكوا إنتوا يا شباب؟

انهالت عليه إجاباتهم وهزات رؤوسهم المطمئنة، فعاجلهم
بسؤال آخر:

– أخبار التعافي إيه؟ شغالين في البرنامج كويس؟

هتف أحدهم:

– زي الفل يا دكتور، الحمد لله أحسن من الأول.

قالها الفتى قبل أن يجتاز بعضًا من التردد خامره وهو يصرح:

– هو في بس طلب جماعي كدا مش عارفين إذا كان مسموحلنا
نقوله وللا لأ.

أمال له إبراهيم رأسه مشجعًا أن أفصح، فتابع:

– كنا عايزين نعمل مكالمات لأهالينا، خاصة يعني إن العيد
لسه خلصان وحضرتك عارف إن إحنا هنا بقالنا فترة، فلو
بس مكالمة قصيرة لكل واحد يطمئن فيها على أخبار الناس برة
هتفرق معانا أوي نفسيًا.

منحه الرجل بنظراته الخبيرة ابتسامة، ثم التفت إلى ذلك المساعد
الذي يجاوره قائلاً:

– شوف الموضوع ده يا وليد، اختار أكثر ناس إيجابية عندك

في المكان واعملهم المكالمات الأسرية اللي طالبيها دي.

هز مساعده المشرف على التأهيل بالمكان رأسه ثم قال:

– ماشي يا دكتور بإذن الله، بكرة هقعد بس مع حضرتك وهنشوف مع بعض الأصلاح.

قالها ثم أشار لهم بفض الجمع هاتقًا بلهجة امرأة:

– يلا يا رجالة، روحوا جهزوا أوضة الاجتماعات، عندنا “جروب” كمان نص ساعة.

انصاع الجميع لأمره فانصرفوا وهو يتابعهم ببصره في حين تأبط إبراهيم ذراعه ليشاركه الخروج من المكان وهو يسأل:

– أخبار التأهيل إيه يا كابتن؟

رفع الرجل كتفًا وأخفضه وهو يجاوره السير قائلًا:

– الوضع جميل زي ما حضرتك شايف، معنديش حالات مستعصية، بس في نفس الوقت معنديش ما بينهم الألفا اللي أقدر أقولك إني معتمد عليه.

ثم تبع حديثه موضحًا:

– المجموعة كلها تقريبًا في سن المراهقة وخبرتهم مع المرض مش كبيرة، موصلوش حد القاع الإدماي، وبالتالي عندي شك كبير في قوة قرار التبطيل اللي واخدينه.

هز الدكتور إبراهيم رأسه متفهمًا قبل أن يسأل:

– وبالنسبة لشغلك إنت، واصل معاهم لفين؟

رد عليه:

– شغال طبيعي وفي تحسن مبقولش لأ، بنعمل اجتماعاتنا في مواعيدها ومقسلمهم الوقت طول اليوم ما بين مشاركة وقرائات، بس برضو أنا واحد قصاد تسعة، ودي دايرة ثقة نطاقها ضيق أوي بالنسبالهم، مش كله هيقدر يستفيد منها، لازم يبقى في مصدر خبرة تاني يوازن العملية.

صمت للحظة قبل أن يتابع:

– بفكر في الواد عسلية المحجوز عند كابتن معتر في الديثوكس، الولد ده برغم الجانب السلبي من تعدد انتكاساته، إلا إنه عنده خبرة كبيرة بالمرض، وأنا شايف صراحة أن وجوده في التأهيل الفترة دي مع متابعة وتحجيم مني هيميل الكفة في صالح تعافي الشباب أكثر.

زي ما بقولك هما محتاجين مصدر تاني للثقة يعايشهم ويقدرُوا إنهم يستفيدوا منه.

بنظرة جانبية أيد إبراهيم نظريته، ثم أضاف:

– أنا كدا كدا هعدي على معتر دلوقتي هناك، في حالة عنده لسه فايقة عايز أبص عليها، تعالي معايا، وبالمره نشوف موضوع عسلية ده.

بإيماءة موافقة من رأس الرجل أكملًا معًا المسير، سارا سويًا على الرصيف المحاذي للحديقة في طريقهم للمبنى الصغير الذي قبعت أنا بداخل إحدى حجراته يرافقي الكابتن معتز الذي ما إن رأهم دالفين حتى هب معتدلًا من فوق الفراش إلى جوارى مفسحًا لأولهم مساحة اقتراب مني وهو يقول:

– اتفضل يا دكتور.

ثم استطرد مشيرًا نحوي يستكمل حديثًا لم أكن أفهم من فحواه شيئًا بعد:

– جنباله أكل زي ما حضرتك أمرت وخلصه، في صعوبة عنده في البلع بس دي أعتقد هتقل أما يستعيد لياقته مع الوقت.

كنت أنفحصهم بعقل لا يزال مشوّشًا إلى حد أعجزه عن استيضاح ما أنا بحقّ فيه، المساحة الضبابية ما زالت تحتل جزءًا من تركيزي، أشعر بخليط من المشاعر، وتبدو الأشياء من حولي جميعها وكأنها جزء من حلم هادئ يُعَرِّض أمامي بالتصوير البطيء.

أشار الدكتور لمحدثه أن جيد وهو يتأمل رقودي في وضع أشبه بالجلوس فوق الفراش أمامه بنظرة متفحصة بادلته أنا الآخر إياها.

– من أنت؟ وأنا ما الذي أفعله حقًا هنا؟

أستلّة خامرتني وأنا أنظر نحوه لم تنبس بها شفتاي تبددت في سماء الغرفة الرطبة مع اقترابه بيد ربتت فوق كتفي وهو يسأل:

– أهلاً بيك على أرض الواقع يا بطل، طمني، حاسس بإيه

دلوقتي؟

تمتت وأنا أجابه مضطربًا:

– حاسس زي ما تكون ستارة على عقلي مخلياني مش عارف
أركز في أي حاجة حواليا.

طمأنني بهزة رأس وهو يقول:

– عادي، شوية وقت بس وهتستوعب كل حاجة.

ثم مد كفه ضاغظًا على ذراعي قبل أن يتساءل:

– حاسس بوجع في عضمك وللا حاجة؟

رددت سؤاله بجوابي:

– شوية، أخف كتير من الأول.

ثم أضفت:

– أنا بس موترني المكان ومش فاهم أنا فين ولا بعمل إيه هنا.

أشار لي بالهدوء موضحًا:

– إنت هنا في مصحة علاجية، والدوشة اللي في دماغك دي
كلها طبيعية لأنك كنت في غيبوبة بقالك فترة، فما تفكرش في
حاجة، وركز معايا دلوقتي عشان توريني هتعرف تقوم من
سريرك وللا لأ.

قالها وهو يعاونني بمساعدة مرافقيه على النهوض، فتأوهت لحظة ملامسة قدمي الأرض ثم تحاملت على نفسي وأكتافهم واقفًا.

أشعر بدوران الأرض من تحت قدمي، لم يكن الأمر بسيطاً كما توقعته، أغمضت عيني للحظة مقاومًا شعور الغثيان الذي اكتنفني حتى هدأ لتركني أيديهم بشيء من التدرج سيطرت خلاله بالكاد على توازني، فأشار بإبهامه محدثي قائلاً:

– هايل، ما انت زي الفل أهو.

أشرت له بسبابتي التي صنعت بها دائرة في الهواء أمام وجهي وأنا أتمتم:

– في دوخة بس وحاسس إن الأرض بتلف بيا.

تبسم قائلاً:

– الدم دلوقتي هياخد مساره الطبيعي في جسمك والشعور ده هيروح، جرب بس تمشي خطوتين لقدام مع نفسك هتلاقي الدنيا بقت أفضل.

حاولت تحريك قدمي، لكنني استشعرت بعضًا من الألم فتراجعت عن المحاولة قبل الشروع فيها وأنا أقول:

– لأ، الوجة لسه شغال وحاسس إني هقع لو حاولت.

رفع إبراهيم إصبعه يحك به أسفل ذقنه ثم التفت إلى رجليه الواقفين جواره سائلًا بلهجة عملية:

– شايفين إيه؟

بادره وليد بإجابته:

– أنا شاييف والرأي النهائي ليكو إنه كفاية عليه كدا ديتوكس، كدا كدا أعراض انساحبه خلاص خلصت، ومتهياي دلوقتي الأفضل يطلع للتأهيل مع باقي الشباب، أعتقد ده هيساعده على التعافي الذهني بشكل أسرع.

– أطلع معاه أنا كمان يا دكتور؟

صاح بالكلمة من خلفهم عسلية، ذلك الأقرع الذي وقف على عتبة الباب مطلقاً برأسه إلى الداخل فالتفتوا نحوه في حين هم معتر بنهره قائلاً:

– إنت تاني يا زفت؟ أنا مش قايلك تفضل مستنيني في المطبخ؟

رفع الفتى يديه معترراً وهو يوضح:

– عملته يا كابتن والله، أنا بس بقول لو ينفع يعني تطلعوني معاه أفيدلي من القعدة هنا، عايز أحضر اجتماعات تأهيل مع الناس.

تبادل كل من الطبيب ووليد نظرةً جانبية صامتة ذات مغزى قبل أن يغمغم لي الأول بسؤاله:

– قابلت الأخ ده قبل كدا؟

كان مقصده واضحاً مع إشارته نحو ذلك الفضولي الذي اقتحم

علينا المكان، والذي عقدت أنا حاجبي في محاولة لذكر اسمه مرة أخرى بينما سارع هو بالتدخل قائلاً:

– قابلني طبعًا، ده أنا أول وش فاق لقاءه قدامه.

لم يلتفت الدكتور إبراهيم لكلماته وعيناه ترصدني وتنتظر إجابتي التي تمتد مترددًا في النهاية بها:

– اسمه عسلية تقريبًا؟

لاحظ جميعهم تباطئي في النطق بها، وبحثت في أعينهم عن مدى صحتها متشككًا في ذاكرتي التي بالكاد تتحسس البيانات وكأنما ولدت لتوها قبل أن يتابع نفس الرجل حديثه معي وهو يقول:

– طب أنا عايز آخذ رأيك إنت؟ موافق نطلعه معاك عالتأهيل وللا نخليه قاعد هنا؟

أطل الجميع بنظراتهم بعد السؤال تجاهي، وبصعوبة حاولت أمامهم الاستيعاب.

المعلومات تتسرب ببطء في رأسي كقطرات متقطعة من صنوبر منسد، مفكرًا متسائلًا مستغربًا أرمق ابتسامةً رسمت على وجه السائل، ونظرة ترجّح في عين حليق الرأس ذي الجرح القطعي الغائر الذي وقف عند مدخل الحجره واضعًا كفاً فوق صدره أن وافق بالله عليك، وافق.

لوهلة أو أكثر ربما سكتت أبحث الأمر في رأسي جليًا دون معطيات تكفي سوى إحساسي الفطري تجاهه، لم يكن ذا قسمات تشعرك

أبدأ بالراحة، لكن شيئاً مبدئياً لأمسني من أسلوبه التلقائي في معاملة الجميع دفع رأسي لإيماءة إيجابٍ بنعم: «أنا أوافق».

يا كل أعمدة الإنارة، يا كل الأضواء المنبعثة من خلف النوافذ،
ويا كل كشافات السيارات العابرة... انطفئي، دعي للظلمة السائدة
حقها في امتلاك الأرض... كل الأصوات لتصمت، كل الضحكات لتتبدد،
وكل الأشياء لتتلاشي خلف جدار أسود من الوهم، لم يعد حسن يرى
بعينه الدامعتين سواه.

سحابة من الوجد تحلق فوقه، وتقطر على رأسه نزيحاً من أمي
صاحبه طوال طريق العودة لمنزله بعد رفضٍ قابلت وداد به عرضه،
لا يدري أيهما يلعن في نفسه، أذلك الحب الدفين لأعوام بداخله؟ أم
تلك اللحظة التي انفتحت فيها أمامه باب الافصاح؟ يتساءل كيف فجّر
هكذا بغتة حباً مكتوماً؟ وكيف طوى على الوهم لسنوات صدره؟

تبدو الشوارع في عينيه المهمومتين خالية إلا منها برغم الزحام،
يراها بديلاً للجميع، ترمقه بأعين المارين، وتوليه مع كل عابرٍ ظهرها،
كم من الوقت حقيقة مر عليه حتى وصل بقلبه الزاحف المكدود إلى
مدخل الحارة؟ بنايته القديمة المتهالكة تطل عليه جدرانها الممتلئة
بالشقوق في شماته، وتحتضن في ظلمة مدخلها ساحرته التي رآها بعين
الخيال تنتظره فاردةً ذراعها أن أقبل، تتمم باسمها مقترباً فتلاشت،
رأه الجميع يعبر كالمجذوب أمامهم، ويبكي.

لا يجروا أحدهم على مقاطعته وسؤاله عما بلاه، تركوه على حاله،

تبتلعه عتمة المدخل ساترة عنهم أحزانه، صعد درجات السلم حتى باب شقته التي فتحها ودخل ملقياً جسده على أول المقاعد التي قابلته فيها، بصعوبة تمكن من التقاط أنفاسه، فك أزرار قميصه ليس لشيء إلا أملاً في تفرغ ما يحتشد في صدره من الألم.

– هتفضل تحبها لحد إمتى يا حسن؟ فوق، وداذ مش ليك، إنساها يا حسن ومتضيعش اللي باقي من العمر، كفاية اللي راح منك، الأحلام مش رهن لرغباتنا يا حسن، الأحلام مرهونة بالقدر وبالظروف.

كلمات غرست نصال حروفها الحادة في قلبه، فسالت الأنات منه وهو يطالع كل ما حوله بوجع... صدى الضحكات الساخرة من كل ركن حوله يتردد من الحوائط، من صور شقيقاته المعلقة في براويذها على الجدران، حتى من ذلك البراد المعدني الصديء الموضوع أمامه يحوي قليلاً من بقايا الشاي المتجمع في قاعه.

تصيح المفردات جميعها بالشماتة، لماذا لم يفهم؟ لماذا لم يدرك غير الآن حقيقته؟ لماذا لم ينتبه لسنوات عمر ترجته ألا يتركها تضيع، وحين أراد اللحاق بما تبقى دفعته عنها بكل قسوة؟ أغمض عينيه في قوة وسد أذنيه محاولاً الهروب، بيد أن الأصوات تعالت، بعض الهواء المتسلل عبر باب الشقة المفتوح لن يزيل اختناقه حتمًا، يجثم ضيق المكان فوق صدره.

بصعوبة نهض، عبر الباب خارجًا مرة أخرى مهملاً إغلاقه خلفه، وهبط درجات السلم ليستقبل ظهرها مرة أخرى فتخطاه عابراً من خلاله مبددًا بعضًا من الوهم في رأسه بأمر الألم، هذا الحنق الناعس

في أعماقه أنى له أن يصحو.

يشعر به، ينتظره هناك، أمام باب الورشة الحديدي الجرار المتوج بياقطة تحمل اسمه: (الأسطى حسن، سمكرة وخدمة سيارات)، بقليل متبقٍ من طاقةٍ فيه انحنى يفتح القفل المعلق بالباب ويرفعه، ولبرهة أمام الرفوف الحديدية التي احتشدت فوقها أدواته وقطعه المعدنية المختلفة وقف.

هنا، حيث أمضى العمر كله ينتظرها أن تعود، هنا كان يطل باللهفة عليها كلما جاءت، وبالشوق مع كل رحيل، حبيسًا بمحض إرادته، مقيدًا في قفص حبس نفسه فيه، حمقًا فَعَلَ ففشلَ وضاع.

انهمرت الخواطر على رأسه ملتبهةً تكويه، ليجد نفسه ودون استيعاب لما يفعل يلتقط إحدى تلك الهراوات الحديدية المنتشرة في المكان ويحملها خارجًا تتبعه العيون، وتشهد لحظة وقوفه الأخيرة متأملًا اسمه على الياقطة المعلقة قبل أن يهبط بهرواته عليها في قوة هشمته وأسقطتها أرضًا أمامه، لتنهال ضرباته بعدها على كل شيء آخر... ضربات حملت قهر الدنيا، وكل الغضب.

أنا والدكتور إبراهيم.

لم يكن لقائنا الأول طويلًا في غرفة الحجر الصحي أو كما يطلقون عليها هنا الديتوكس، كان بالكاد لدقائق ثم افترقنا، هو لمتابعة جلسته مع من لم أكن أعرف حينها أنهم أسرتي، وأنا - بصحبة الأقرع عسلية والكابتن وليد - لمكان أيضًا لم أكن أعرفه؛ يُدعى التأهيل.

كنت أنا في طريقي أتوكأ متفاعلاً بصعوبة مع أسئلة عسلية المتواليّة، بينما هو في دخوله إلى المكتب يبتسم لجليسيه المنتظرين قبل أن يتخذ ذات مقعده أمامهما من جديد، ويشرع في استكمال ما قطعه.

– أهلاً بيكوا مرة ثانية، أرجو تكونوا شमितوا نَفَسَكوا شوية في النص ساعة اللي خدناها راحة دي.

افتتح بها حديثه معهما كما أخبرني قاطعاً ما شردت له أفكاره، ها قد عاد ليفتح مرة أخرى ذلك التقرير الطبي الموضوع أمامه ملتقطاً قلمه الخاص قبل أن يتطلع إلى المنضدة الزجاجية الخالية أمامهما إلا من علبة المناديل الورقية متسائلاً:

– جاهزين نكمل كلامنا؟

أومأ له جلال رغم الحزن برأسه في حين صمتت وداد وقد تسيدت الخواطر عقلها، كانت شاردة سارحة في عالم آخر ألقى بها بعيداً عن كل ما يدور، تشغلها لحظات فاتت، بدأت بصيرير باب الحجرة الذي انفتح ليظهر على عتبه حسن...

كان هناك يقف أمامها وكأن انفعالات الدنيا احتشدت بداخله، بينما يقاوم كيانه الخارجي انبثاقها، رفعت عينين من الخواء نحوه، فحاول رسم ابتسامة مرتبكة للقائهما ثم تمتم:

– إزيك يا بت عمي؟ شفت الدكتور خارج وعرفت انكوا واخدين استراحة فقلت أدخل لو ميدياكيكيش يعني أظمن عليك.

نظرت إليه ولم تجبه، فتردد قبل شروعه في الدخول وهو يضيف:

– أروح أجيبك لقمة تاكلها؟ إنتي على لحم بطنك من الصبح.

هزت له رأسها أن لا، وتهدت تنهيدة شكر فهم مغزاها فسكت، سكوتا خارجياً فقط لم يكن له البتة علاقة بذلك الفيضان الهائج داخله، كان يقاوم رغبة متنامية فيه، حاول التهرب منها ومن فيض أسئلة قلبه الحائر المتردد.

أخبرها الآن أم يصمت؟ ربما يخسر كل شيء إن فعل، وربما يكسب أيضاً كل شيء، مرة أخرى قاوم اندفاعه متحاملاً على التخوف لتخرج عبر شفثيه الكلمات بصوت ضعيف:

– أنا عارف إنك زعلانة مني، زعلانة عشان محافظتس عالعهد اللي بيبي وبينك، حقك يابت عمي، بس أنا عايزك تعذريني.

أشاحت بوجهها عنه فضاق بصمتها وهو يتابع:

– والله ما قلتله حاجة بقصد خيانة ولا غدر، بس أهو ده اللي حصل بقى، عارف إنك حلفتيني مقولش لحد، عارف إن ثقتك فيا كانت أغلى من أني أضيعها، بس أنا بني آدم قصاد مشاعره ضعيف يا وداد، لما جالي الأستاذ جلال لقيت في عنيه خوف حقيقي على ولاده لخبطني، ضميري مطاوعنيش أسيبه موجود، وف نفس الوقت مكنتش قادر أخلف وعدي معاكي.

عادت ترمقه مرة أخرى بنظرتها الصامتة فزفر مستطردًا يتهمك

على نفسه:

– قلت أنا همسك عصايتي من النص، مش هقوله تفاصيل، وكفاية عليه عنوان ومعاد الجلسة، سامحيني، إنتي عارفة إني عبيط زي ما أمي الله يرحمها كت بتقول.

لم يبدا عليها أي انفعال في أثناء استماعها له، الحزن نفس الحزن هو ما سيطر عليها، مكملًا هو بضحكة مريرة واصل بها قوله بعد لحظة سكوت أخرى لالتقاط الأنفاس:

– زمان واحنا عيال أما كانت تقولي الكلمة دي قدامكوا كنت أتعصب أوي وأفضل أزعق معاها، لا يامه أنا مش عبيط، إوعاكي تقوليها لي الكلمة دي تاني، الله يرحمها كت تضحك وتقول العبط يابني ماهوش عيبة، دي وصمة الطيبين في زمانا ده... مرة قالتلي إنت اللي زيك قلبه قلم رصاص، بيفضل جواه الحلو بس، والوحش أوام بيمحيه.

كأنما أشجانه في لحظة صمت تفحص خلالها كل تفصيلا من ملامحها فارتسمت على شفثيه ابتسامة شرود غمغم بها:

– عشان كدا أنا عمري ما قدرت أمحيك.

نطق بها وسط شروده قبل أن يتدارك في عجل نفسه مستدرغًا بأول ما جال بخاطره:

– فاكرة يوم ما طلبتي مني أعلمك سواقة عالعجلة الخضرا بتاعتي؟

عقدت حاجبها رغمًا عنها محاولة التذكر بينما هو بالشجن

الضاحك يكمل:

– يومها وقعتي بها تحت بيت ستك، فضلتي قبلها تقولي لي إبعد
إنت سيبي أنا هعرف، وهما يدوب مترين مشيتيم واتقلبتني،
جه جدك آخر اليوم شافك مجروحة، خلاهم ياخدوا مني
العجلة ويشحنوها في الصندرة سنة كاملة عشان بس عرضتك
للخطر، ساعتها أنا مزعلتش عالعجلة، أنا زعلت عشان
مفضلتس جنبك وسيبتك تتجرحي.

نظرت إليه برغم حزنها، كان دومًا ما يذهلها بذلك القلب النقي
الذي يحمله، كانت له قدرة عجيبة على جعلها تدرك أن ركنًا ضئيلاً من
العالم ما زال بخير، تمتمت تسأله:

– غنت ازاي بتعرف تحافظ عالذكريات بريئة وواضحة جواك
أوي كدا؟

وقبل أن تمنحه فرصة الإجابة استطردت:

– عارف؟ في ناس هلكانة تدور في ماضيها عن نقطة نور ومش
لاقيين؟

تبسم امتنانًا لكلماتها ثم قال:

– جايز، بس عشان دماغي فاضية شويتين، متمليتس زيك
يا وداد بكتب المدارس والكراريس، هي السمكرة الحاجة
الوحيدة اللي بعملها من صغري، فيعني أنا إيه اللي هملي بيه
دماغي إلا شوية الحديد وجمبيه الذكريات الحلوة دي؟

قالها قبل أن تخفت الابتسامة عن وجهه تدريجياً وهو يتمتم:

– المهم أن أُمي هيا اللي طلعت في الآخر صح، وطلعت قلبي فعلاً قلم رصاص، كل الوحش اللي فيه ممكن يتمسح.

ثم أطرق برأسه حين عاوده الواقع مغمغماً:

– معرفتش ده غير وأنا قدام جوزك، كرهته سنين طويلة عشان كان سبب في حرقه قلبي، وفلحظة ما شفته بيبيكي مديت إيدي وطبطبت عليه.

لم ينتبه لنفسه وهو يفتح بيديه فوهة البركان على الحمم الملتهية، ولم تعد له فيما تبقى بعد ذلك قدرة السيطرة على شيء وهو يتابع بغير شعور:

– أنا كرهته عشان سرقك مني يا وداد، وانتي الحاجة الوحيدة اللي فضلت طول عمري أحلم بها.

انتبه فجأة لكلماته من نظرتها التي حدقت في وجهه بها، لقد فاض بكتمانه الكيل، وانفرط العقد. لم تفاجئها الحقيقة قدر تفاجئها باعترافه. كأى أنثى كانت تفهم منذ أزل شعوره نحوها، رأت الحب كثيراً في عينيه، صادفته في خوفه عليها، ولاحقها في نظراته، لم تفكر يوماً في مبادلتة إياه، وكان الأمر يرضيها على حاله.

لطالما استكانت لصمته واعتمدت عليه، لم تتوقع يوماً أن يصارحها بشيء، وهو أيضاً لم يتوقع في يوم أن تخرج من بين شفثيه مثل تلك الكلمات، لكنه وكأمواج من نبع شلال انهمر فيضه دون

توقف أمام نظراتها المندهشة، انطلق يفيض:

– أيوه يا وداد زي ما سمعتيني، أنا بحبك، بحبك من سنين وعمرى ما حبيت إنسية غيرك، بحبك أكثر من أي حاجة في الدنيا.

رباه على ما اكتنفه لحظتها من شعور، كأن كل خلية في جسده تمددت، ولفظت عنها غبار الماضي لتتجدد، شعر بروحه تحلق مقتربة به من كل ما أحب: حضن أمه الدافئ، ضحكات شقيقاته، ورائحة البيت القديم... سألها وكيانه يعج انفعالاً لا وصف له:

– تتجوزيني يا وداد؟

ها قد أفصح، ها قد فتح لها صدره ومنحها المشروط الوحيد القادر على فقء الخراج الثقيل الرابض فوق قلبه منذ عقود، وها قد تناولته هي مرغمة منه، واحتشدت على مقلتها الدموع، واختنق الرد فوق لسانها، وتهدت، ثم أخيراً أجابته:

– مش هينفع يا حسن، أنا أسفة.

أنته إجابتها بعد التهيدة كوقع ألف جبل فوق أنفاسه، لقد شقت بمشرطها الحاد قلبه لا الصديد، شطرتة بحدة وقسوة لم يتخيل في أبشع كوابيسه ليوم أن ينشطر، لن تفارقها أبداً نظرتة: ذلك السقوط الحر الذي رآته لأمله من ارتفاع شاهق، أنين قلبه البائن في عينيه الملمعتين أمامها، في ارتعاشة يده وشفتيه وهو ينهض دون كلمة أمامها مبتعداً، لم يعلق بأي شيء، لم يصف سؤلاً حتى، رحل محملاً بذات وجع عايشته هي ذات يوم مثله.

للحظة قاسية تلك التي تأتي أحدهم فيها مقدمًا له أعلى ما ملكت فيرفضه، هل أشفقت حقًا عليه؟ أم أنه ذكرها بصدمة عاشتها يوم علمت بأمر خيانة جلال؟

– أستاذة وداد؟ وداد هانم؟

انتزعها الدكتور إبراهيم بنداءاته من خواطرها فجفلت كالمسوعة تنظر نحوه بحدة جعلته يتراجع في جلسته أمامها وهو يقول:

– أنا آسف معلش، بس حضرتك مش معنا في الكلام خالص.

نفضت عنها الأفكار مستعيدة لنفسها بعض الهدوء وهي تقول:

– أنا اللي آسفة يا دكتور، اتفضل حضرتك.

منحها نظرة اشفاق متأنية قبل أن يعتدل متابعا عمله:

– إحنا عايزينك معنا بس، الباشمهندس جلال كان بيكلمني عن فترة ما قبل انهيار شريف، عزلته اللي زادت، الغموض اللي صاحب كل تصرفاته، سهره وتأخيره لفترات طويلة برة البيت ووصولًا لمرحلة اكتشاف مشكلته مع المخدرات.

قالها ثم اعتدل مواجهًا كليهما وهو يسأل:

– بعد ما اكتشفتموا إنه بيتعاطى، ايه هي بقى الإجراءات اللي اتخذتموها معاه؟

أجابته الأخير قائلاً:

– في بداية الموضوع شريف كان بينكر حقيقة المشكلة اللي هو فيها، كان شايف إنه متخطاش مرحلة التجربة لسه، وأنا ساعتها صدقته زي أي أب مش حابب يقتنع إن ابنه فعلياً مدمن وبينهار.

قطعت أنفاسه وصلّ الحديث للحظة قبل معاودته:

– بس مع الوقت لاحظت إن الحكاية بتزداد سوء يوم عن الثاني، نتائج امتحاناته بقت غير الأول، المشاكل اللي كتير كانت بتجيلى من عنده في الجامعة، خناقاته، وساعتها أيقنت وجود خطر واجب معالجته.

كان يتكلم وكلاهما منهمك في سماعه وهو يصف فترة صعب عليه تذكرها:

– بدأت أعرضه على بعض الدكاترة الاستشاريين هناك، كتبوله علاجات مختلفة واتفكروا معاه كتير، وهو كان يلتزم أسبوع أو اتنين بالكثير بعيدين تفلت منه الأمور تاني.

بعضهم اقترحوا عليا أحجزه في مصحة علاجية بس أنا كنت أضعف من اتخاذ قرار زي ده، فاكثفيت بالنصايح وبمحاولة فرض حصار مكانش كافي عليه.

أيامها طبعاً قرئت كتير عن المرض وحاولت أجمع معلومات عنه سواء من الانترنت أو من الدكاترة اللي كنا بنتردد عليهم، وكلهم تقريباً أجمعوا على أن تغيير المحيط هو الحل الأمثل بالنسبالة واللي ممكن فعلاً يساعده.

هز الدكتور إبراهيم رأسه مؤيداً وهو يتمتم:

– مضبوط، دي فعلاً أول خطوات المساعدة لأي مدمن، حاجة إحنا بنسميها في برنامجنا العلاجي (الخطوة أولى)، ومدلولها تغيير المناخ الإدماني اللي يوفر له ابتعاد عن أشخاص وأدوات وأماكن.

أيده الأخير بهزة رأس مماثلة ثم أكمل:

– قالولي برضو على غرف مجانية بتعمل اجتماعات تأهيل للمدمنين هو لازم يحضر فيها، اسمها زمالة المدمنين المجهولين تقريباً، بس أنا معرفش بسبب خوفاً على مستقبله وللا افتقاري لثقافة المرض متحمستش للكلام ده.

زي ما قلت لحضرتك أنا اكتشافي لمشكلة شريف كان في النص الأول من سنة تانية جامعة، يعني كل اللي كان فاضله عالامتحانات وقتها كان مجرد شهر حبيت خلالهم أجازف عشان متضيعش عليه السنة، وراهننت على إن أجازته اللي هينزل فيها مصر بعدها هتكون هي فرصة التغيير اللي جايز فعلا يكون محتاجلها.

بدا وكأن الحروف جميعها تؤنبه، وتخرج بثناقل من بين شفتيه جاذبة معها أنفاس صدره المختنق، فتروده عباراته أن ائذن لي بالخروج، وهو يرمق بعينييه وداد أمامه وبذات صوته المبحوح يواصل:

– الكلام ده من شهر، استنيت لآخر يوم في امتحاناته وبعدين حجزتله الطائرة عشان يرجع بيها لمصر، وساعتها بس كلمت

وداد أحكيها عن كل حاجة، واعترفتلها أني برغم الفرصة
التانية اللي منحهاالي القدر، برضو منجحتش.

خفض رأسه بعد انتهاء العبارة ليعود الصمت، فلم يشأ الدكتور
إبراهيم إضافة حمل عليه واتجه ببصره نحو وداد قبل أن يغمغم:

– أستاذة وداد، شوفي هو سؤالي المرادي هيكون غريب، بس
أعتقد أن إجابته هيا مفتاح اللغز في شخصية شريف.

أثارت طريقته اهتمامها وفضول جلال الذي رفع رأسه نحوه
بدوره معتدلاً مثلها أمامه وهو يستطرد:

– حاجة ليها علاقة مباشرة بعقله الباطن، اللي على أساسه خد
كل القرارات.

أطلت من أعينهم نظرة عدم الفهم فتراجع في المقعد أمامهم فارغاً
عينية بكفة من فرط الإجهاد وأكمل:

– هشرحلكوا.

الفصل الثامن

«حُب!»

– إنت ليه بتعمل كده؟ ليه مستهون بمشاعر كل الناس اللي بتحبك؟

– كل الناس؟ مابلاش مبالغات يا ياسين، أنا مفيش حد بيحبني.

– إزاي يا شريف؟ إزاي مفيش حد بيحبك؟ طب أنا دلوقتي بكلمك ليه؟ ده أنا أخوك التوأم يا أخي، هو صحيح يعني أنا و انت طول عمرنا مختلفين ونازلين مديين زهرنا لبعض، بس سيبك مني أنا يا أخي، فكر في أمك، أمك اللي انت مشفتهاش زي من يوم سفرك، مشفتش الضي اللي غاب من عينها، لأنك لو شفته كنت هتفهم هيا قد إيه بتحبك.

...–

– إيه؟ مالك سكت ليه دلوقتي؟

– سكت عشان صعب أفهمك أن الحب مبیتشافش يا ياسين، الحب بيتحس، غير كدا اتأكد تمامًا إنك مخدوع.

سرت المحادثة القديمة في عقلي كارتعاشة صقيع عابرة امتزجت
بكلمات ثلاث همس بها الدكتور إبراهيم الجالس أمامي ببطء شديد:

– حب، حرية، وطير صغير.

معانٍ ثلاثة لازمتني في فترة فقدان الوعي، عنها كان سؤاله الأخير
لهما:

– شريف في فترة الغيبوبة كانت بتمر عليه لحظات اضطراب
كان يهلوس دايماً خلالها بالتلات كلمات دول.

سألهما عن مقصد كلماتي في وقت لم أكن فيه أنا أدرك عن
سابق عهدي بالحياة أي شيء، كنت أقف فعلياً حينها بأقل من نصف
استيعابٍ على عتبة الباب الزجاجي المزخرف لمدخل التأهيل؛ أتابع
ببصري وليد الذي دلف أمامنا إلى الداخل قبل أن يلكنني ذاك الواقف
بجوارى وهو يهمس بانفعال مكتوم:

– أخيراً وصلنا، هو ده التأهيل بقى يا زميلي.

ألمتني لكزته قليلاً، مضطرباً كنت، ولذلك في اعتقادي لم أرَ
ما يستحق الانجذاب حقاً لمكان كهذا، ليست مؤثرة في نظري تلك
الفوارق.

الجهو الواسع الممتد أمامي عكس ضيق المكان السابق، ذلك
التلفاز الكبير المعلق في أحد الأركان، وأولئك الموجودين يطلون
علينا بنظراتهم المختلصة لا يبدو في ملامحهم ابتئاس كالأخرين هناك،
يحدثهم معتر بصوته القيادي مشيراً نحونا.

– رحبوا يا شباب بزمايلكوا الجدد، من النهار ده هيكونوا في التأهيل معنا.

لم ينتظر الآخر بجوارى رد فعلهم، سبقني داخلًا في لهفة رافعًا يده بالتحية للجميع، بدا المكان مألوفًا بالنسبة له، بينما أنا بالحيرة والتساؤل أتبعه، الجدران نظيفة، والهواء نقي لا أثر لرائحة العطن فيه، تلك النافذة الكبيرة أيضًا، والتي احتلت نصف مساحة الجدار المقابل لي كانت إضافة ملحوظة، لماذا أشعر بالريبة حيالها؟ هل تراني اعتدت العتمة؟ أم أن شيئًا بين درفتيها المفتوحتين حمل لي ما يخشى العقل الباطن استرجاعه؟

اقتربت منها برغم خوفي، وبرغم ترحيبات الجميع التي لم تستوقفني إحداها، ملامح بالكاد تبدو واضحة في خيالي تتشكل هويئة بعد هويئة مع الاقتراب، شعر أسود حريري، وابتسامة كالبحر تجذبني لأغرق، ألامس الإطار الخشبي بيدي، وأطل بعين شاردة إلى منطقة من العدم باتت ملامحها فيها تكتمل، عيناها العسليتان، ونظرة فيهما أضفت لإحساسي قليلاً من الحنين لم أميز تمامًا حينها تفاصيله، ولكني بشيء من المجهود أعرفها، إنها تلك التي صنعت نوافذ الكون بأسرها كي تُطل.

وقفت كتمثال من الشمع...

هكذا وصفت وداد قبل أن تستطرد في سرد المشهد بأكمل تفاصيله كما كان، متسمراً بعينين اتسعتا اندهاشًا في غرفته الخاصة

أمام النافذة التي انعكس فوق وجهه منها شعاع الشمس الذي ألقى من ورائه ظلًا بامتداد الأرض، أثارت وقفته حفيظتها وهي تدلف عبر باب الشقة المفتوح بأكياس الطعام في يدها فسألته:

– مالك يا ياسين؟ واقف متخشب عندك كدا ليه؟

لم يحرك من موضعه ساكنًا، ولم يشعر حتى باقترابها من الصالة نحوه في خطوات زادها صمته فضولًا وهي تكرر متوترة:

– يا بني ما ترد عليا في إيه؟ وفين أخوك، أنا مش قلتك ميروحش في حنة لغاية ما أرجع؟

مرة ثانية لم يجها، فدفعها الأمر لنقل بصرها صوب ما يطل هو نحوه قبل أن تتراجع من فرط الدهول، فهناك على الجهة الأخرى أمامها، ومن خلف فجوة صغيرة بين ضلعتي إحدى نوافذ البناية المقابلة رآته... شريف، ذلك الذي سألت عنه لتوها...

كان هناك محتضنًا بجسده العاري في قوة تلك التي فقدت كل شعور لها بما يحيط بين ذراعيه: إيما، تلك الفتاة الآسيوية المراهقة، والتي سكنت مستقلةً وحدها منذ أعوام هذا المنزل القريب، محمر جسدها إثر اعتصاره، وشفتاه تلتهمان في شبق منها كل ما تصلان إليه، تمسح بذراعيها المرتعشتين على رأسه أن لا تتوقف، لا ينبغي للحظة كهذه أن تنتهي، وتعلن بأنات التأوه المكتومة عن احتياج للمزيد... في جنون تحركت يدها فوق حناياها بحثًا عن كل موطن للشهوة، رافعًا إياها عن الأرض يلثم رقبتها بمزيد من القبل الساخنة مع اهتزاز ضلعتي النافذة إثر احتكاكهما بها.

مشهد صادم استقبلته وداد بعينين تحجرت مقلتاها، وشفيتين
انفتحا لمناداة اسمه دون وعي منها مقروناً بنبرة استنكار حقيقية:

– شريف؟

اقترننت صيحتها بتوقف لثورة القبلات الهائجة مع التفاتة من
كليهما نحو مصدر الصوت، لحظة تجمد خلالها المشهد، انحنت بعده
الفتاة متوارية لستر جسدها العاري في حين ظل شريف بأنفاس صدره
المتلاحقة معلقاً عينيه بعيني أمه التي التهمتته صدمتها.

دقائق مرت بعدها كانت ما لزمه للوقوف برأس مطرق على عتبة
الباب أمامها وهي تسأله بكل انفعال معروف:

– إيه اللي أنا شفته ده؟

... –

– رد عليا؟ إيه اللي كنت بتبببه هناك مع الزفتة دي؟

صمت آخر جاوبها به، لم تجد أمامه بديلاً عن صفعة هبطت بها
على صدغه تردد صداها في أذن ياسين الذي ظل كما هو في غرفته
مولياً لهما ظهره بعد أن أغلق النافذة تماماً، متسللاً عبر أذنه منهم
فحوى حوار لم يطل:

– انطق قوللي، كنت بتعمل إيه؟

– عايزاني أرد أقولك إيه يعني؟ اللي انتي شفتيه؟

نطقها شريف بوقاحة لم تكن متوقعة، قبل أن يستطرد بانفعال

تعالت نبرة الاحتداد الغير مبررة فيه:

– عايزاني أقولك آسف وغلطان وللا أعترفلك بوساختي؟ أنني فهمم اللي عايزة تسمعيه؟ إني زبالة ومذنب وعمري ما هكون بالنسبالكوا الشخص المحترم اللي انتوا عايزينه؟ خلاص يا ستي، أدكي عرفتها، أنا زبالة وعمري ما هبقى الحاجة اللي انتوا عايزينها.

تمتمت شفتها المرتبكتان أمام انفعاله بشيء لم يسمعه، ولم تع نفسها معناه، بينما استمر هو في صراخه دون توقف:

– مستغربين ليه لما إنتوا بإديكوا اللي وصلتوني لكده؟ دلوقتي بس اهتميتوا وراجعين تدوروا ورايا؟ دلوقتي متضايقين أوي من تصرفاتي ومن كل اللي بعمله؟ فين إنتوا أصلاً من زمان؟ وللا أقولك إنتوا مين أصلاً؟ كنت فين أنا من تفكيركوا يوم ما قررتي إنتي وأبويا تنفصلوا وتختاروا الاختيار اللي إنتوا بس شايفينه صح من وجهة نظركم؟ وبتعارضوني في إيه دلوقتي وانا من وجهة نظري زيكم بختار؟ بختار أعيش بالشكل اللي رافض تمامًا أن حد فيكوا يشاركي فيه، بختار الحرية اللي إنتوا بأنانيتكم طول الوقت حرمتوني منها، لمجرد بس إني كنت أنا وأخويا صغيرين.

قالها ثم انهار دفعة واحدة بين أحضانها يبكي بلا توقف.

بشروود تام قبعت إشراق هانم داخل السيارة إلى جوار نعيم الذي

تساقط جفناه من الإرهاق وعلى صوت شخيره المتقطع الذي شاركها
خواطرها وحديثا في نفسها غمغمت:

– أنا مش ست وحشة للدرجادي يا نعيم، أنا عمري ما كنت
ست وحشة، أنا بس مكانش عندي مانع لو كل الناس يشوفوني
كدا، ما عدا جلال.

لم تكن تنتظر ردًا منه، كانت فقط تسترسل في إفراغ ما تحويه
مشاعرها من أنات، تتخيل كل الوجوه اللائمة أمامها، كل نظراتهم
المتربصة ترمقها بعين من لهيب.

– صحيح انتوا باصينلي كداليه؟ إيه مدى الحقارة اللي شايفينها
فيا قدامكوا عشان أبقى المذنبه الوحيدة في نهاية كل طريق؟
واحدة خايفة على ابنها، بتفكر في مستقبله ومستعدة تحارب
الدنيا كلها عشان تحافظه عليه، هي دي التهمة؟ زعلانين أوي
عشان كان ليا حق ورفضت أفرط فيه؟ جريمة إني مسكت في
حلم زرعته وكبر قدام عيني يوم بعد يوم ولما لقيت غيري جي
ياخده عالجاهز حاربتة؟ هو ده جرمي؟

كانت نبراتها تهدج بالرغم منها، والعرق المتكون في كفيها يببل
مقبض العصا التي تشبثت بها واهتزت بفعل ارتعاشة الانفعال التي
خالجتها، تؤلمها تلك النظرة التي أطلت من عين ابنها نحوها حين رأته،
يحرقها لومه، فتتعالى ألمًا من نفسها صيحات التبرير.

– أيوة أنا اللي قتلتها إنه اتجوز، فيها إيه يعني؟ ما هي كان مصيرها
هتعرف، الزمن كدا كدا كان هيقولها في يوم من الأيام، أنا بس

استعجلتها ولها مش أكثر... وبعدين مانا مضربتهاش على إديها
عشان تطلب الطلاقن هي اللي بكامل إرادتها اختارتها، هي اللي
اتنازلت عنه عشان عارفة ومتأكدة إنه أصلا من الأول مكانش
بتاعها.

حاولت الفرار بكلماتها من كل تلك الأعين المتجمعة أمامها تحمل
نفس النظرة القاسية التي رمقها بها جلال، ثم صاحت من فرط اللوعة:

– يا غبي!

اضطرب جفنا أمين الراقد جوارها مع الصيحة، وتحركت رأسه
موقفه شخيره الذي لم تعد هي مدركة له وهي تستطرد بثورة تواري
ذعرها:

– دفنت نفسك في وهم حفرة اسمها الحب، غميت عينك
ومشيت زي أعى كل ما يخبط في حيطه يلوم غيره... متبصليش
أنا البصة دي، أنا لو حقيقي أنانية ومحبكش كنت خليتك
تبصها لنفسك...

– إشراق هانم، يا إشراق هانم، حضرتك كويسة؟

انتزعتهما من خواطرها نداءات أمين السائق الذي استيقظ في تلك
اللحظة متنهبا لاحمرار وجنتيها الزائد، ولذلك العرق الغزير الذي
تصبب فوق جبينها مع يديها المرتجفتين بشكل واضح فوق العصا،
فنظرت نحوه للحظة خامرتها خلالها برودة كالثلج تسلت عبر خلاياها
العصبية مخلفة تنميلاً عجيباً اقترن بضغط دمها الذي انخفض لحد
الأدنى، قبل أن تنهار مقاومتها دفعة واحدة، ليسقط رأسها بلا قوة إلى

جواره، وبلا حراك.

– قصاد حاجة غالية شايفها بتضيع منك يا دكتور، إيه
التصرف الوحيد اللي ممكن عمله؟

ألقت عليه وداد السؤال وهي تنظر مباشرة في عينيه ففكر ملياً
إبراهيم قبل أن يجاوبها:

– هحاول أخلق لها دافع عشان تفضل.

أهدى لها بحكمة إجابة تنتظرها فمالت في جلستها نحوه وهي
تكمل السرد:

– وهو ده بالضبط اللي أنا عملته، لما عرفت أنو في علاقة
عاطفية بينه وبين البنت اللي ساكنة قصادنا في المنطقة...

برغم صدمتها في البداية، وبرغم تعارض الأمر برمته مع مبادئها
وتوقعاتها إلا أن شيئاً ما في الظروف المحيطة جعلها تتروى مع ذاتها
متسائلة: «وما الضير في ذلك؟ ما الأزمة إن حققنا له رغبة؟ ذلك
الفتى الواقع تحت سيطرة المرض المزمن ماذا لو كانت تلك الفتاة
بديلاً لاحتياجاته؟ قد تسحبه هي بعيداً عن فخ المرض، أقلها لفترة
أو ربما للأبد».

هل كانت تفكر بمنطقية حينها أم أن عاملاً آخر كان يوجه
أغراضها؟ دارت تلك الأسئلة بينها وبين صورتها المنعكسة أمامها
في المرأة المعلقة فوق حوض الحمام الصغير، بيد مرتعشة فتحت

الصنبور، ثم وضعت رأسها تحته لتتخللها مياهه الفاترة.

لأقل من دقيقة ظلت على وضعها مغمضة العينين، تترك لصوت المياه المنهمرة مهمة جرف الأفكار السلبية بعيداً عنها قبل أن تحسم الأمر مغلقة الصنبور لتعتدل من جديد، جففت رأسها بمنشفة فوق كتفها، ثم همت بالخروج ليعترض طريقها ياسين... شهقت في البداية متفاجئة وهي تهتف:

– خضيتني يا ياسين، مسمعتش صوت باب الشقة وانت بتفتحه.

لم يجيبها الأخير بغير نظرتة الجامدة وتمتمته:

– محبيتش أزعج حد، قلت إنتوا أكيد نايمين.

تهتدت وهي تكمل تجفيف رأسها قائلة:

– هيجي منين النوم؟ وشريف أخوك من ساعة اللي حصل الصبح وهو قافل على نفسه الأوضة ومش عايز يخرج منها.

منحها إيمانة رأس باهتة المعنى قبل أن تقرر مشاركتة شعورها مغممة:

– ياسين أنا قلقانة على أخوك، حاسة إنه بيضيع مني ومش عارفة أتصرف صح ولا أعمل حاجة.

تماسك لتخرج كلماته هادئة وهو يرد:

– مش هيضيع ولا حاجة اطمني، شريف واعى ويعرف ياخذ

اللي هو عايزه.

لوحت بيديها أمامه وهي تهتف:

– يا ياسين أخوك مدمن، ودا أكيد بسبب ظروف نفسية صعبة هو بيمر بيها، لازم تقف جنبه وتكلمه، حاول تنصحه.

أطلقت شفتاه ضحكة متهكمة قصيرة تتمم بعدها:

– على كدا بقى كل اللي عنده ظروف صعبة يروح ياخذ مخدرات؟ وبعدين منا كلمته كثير، بس هو مبيسمعش لحد.

أشارت له أن لا وهي تهز رأسها نافية مع قولها:

– مش قصده، أخوك دلوقتي في وضع غير مستقر.

ثم انخفضت نبرتها وهي تكمل:

– لدرجة أنني بصراحة مش عارفة، مواجتي ليه الصبح كانت تصرف صح وللا مكانش المفروض إني أعمل معاه كدا؟

ضابت حدقتها أمامها وهو يسأل بنبرة استنكار:

– مواجتهك؟

لم تستوقفها نبرته المستنكرة، تابعت متخطية تعليقه:

– أقصد إني كان المفروض أتعامل بدرجة تفهم أكبر، مكانتش ليها لازمة العصبية اللي اتعاملت بيها معاه دي... هو غلطه أيوه كبير، بس في نفس الوقت أي شاب في سنه معرض إنه

يغلط نفس الغلطة، ومفتكرش أنا أبدًا أن الزعيق والعصبية
والكبت هيبقوا هما الحل الصحيح في أمور زي دي، خصوصًا
لو مع حد في وضع شريف.

قالتها ثم رفعت عينها نحو وجهه الجامد تستطرد:

– عشان كدا أنا فكرت ووصلت لقراري، لو أخوك بيحب
البننت دي فعلاً، فأنا معنديش مانع أروح من بكرة الصبح
أخطياله.

وأمامها بعد العبارة، عقد ياسين حاجبيه تمامًا كما فعل جلال
حين انتهت من روايتها داخل المكتب أمام الدكتور إبراهيم الذي رصد
انفعاله فمال نحوه يسأله:

– خير يا أستاذ جلال؟ واضح إنك معترض في كلام مدام وداد
على كذا حاجة؟

تراجع أمامه الرجل ملوحًا بيديه أن لا وهو يغمغم:

– لا أبدًا، أنا بس أصلي أول مرة النهار ده أعرف حاجة عن
قصة البننت دي.

تمتمت وداد متهمكة:

– وانت يعني من إمتي كنت عارف أي حاجة عن حياة ولادك؟

بشيء من العصبية رد عليهما:

– مكنتش أعرف كتير فعلاً، بس أنا كنت فاكر إن حالة شريف

ساعتها، وخصوصاً بعد ما وضحتها لك في التليفون وهو نازل
أجازته الأخيرة، كانت تستدعي إني يكون عندي خلفية عن أي
تطور بيحصل في حياته.

لوت شفيتها محاولة البحث له عن حجة في حين قاطعهم إبراهيم
وهو يقول بنبرة رصينة:

– يا ريت دلوقتي نركن التفاصيل الشخصية دي على جنب،
إحنا خلاص تقريباً قربنا نخلص.

ثم التفت نحو وداد ليسألها:

– المهم مقولتيليش يا أستاذة وداد عملي إيه بعد كدا؟ هل
فعلاً خطبتيهاله؟

أومأت برأسها علامة الإيجاب قائلة:

– أيوة يا دكتور، بعدها بيومين رحنا أنا وهو لعندها في البيت،
وخطبتيهاله.

– بأي قدر أحببتها يا شريف؟

عاجلني الدكتور إبراهيم بعد لحظة سكوت بسؤاله فلم أجد غير
رد واحد مختصر حمل حقيقة ما يدور بداخلي:

– أحببتها بقدر كراهييتي الآن لكل شيء.

– ردك كدا فيه حاجة غلط، الحب عمره ما كان مرادف للكراهية.

– ده بيعتمد على مفهومك الخاص للحب والكراهية يا دكتور.

– مش فاهم.

– مش موضوعنا دلوقتي يا دكتور، كمل إنت بس بقية كلامك.

– اللي باقي عمومًا مش كتير، بس عايزك تقوللي إنت الأول، بقالك نص ساعة قدامي سرحان وباين عليك بتفكر في حاجة، إيه هيا؟

ابتسمت وأنا أبادله مع مرافقنا الثالث في الغرفة نظرة طويلة ثم أجبت:

– بفكر في أول اجتماع تأهيل حضرته هنا.

قلتها ثم سرحت لوهلة أخرى، وشرعت أحكي.

هذا ما قصدوه باجتماعات التأهيل إذًا، رأيهم من حولي يجلسون متراصين على مقاعدهم الموزعة بشكل دائري في غرفة خلت من أي تفاصيل ملفتة أخرى سوانا، أجلس كواحد منهم وإلى جوارى عسلية، ذلك الذي مال هامسًا في أذني:

– دي بقى يا سيدي أوضة التأهيل في المصححة، تقدر هنا تهري بأي كلام إنت عايز تقوله، كلهم هيسمعوك.

كتم ضحكته بعد العبارة الأخيرة إثر نظرة حازمة من عين وليد الذي شاركهم الدائرة ممسكاً بين يديه كتاباً أزرق اللون، أخبرني بأنه اجتماع أول أشارك بالمتابعة فيه فقط، سأراقبهم ليس إلا، الهدوء مخيم على الجميع وكلهم يجلسون في وضع التزام.

كم أعشق الصمت عليهم يبقوا على هذا الوضع إلى الأبد... خبطات ثلاثة على مسند كرسيه الخشبي طرقها وليد، ثم تكلم محدثاً الجميع:

– زمالة المدمنين المجهولين مجموعة المصححة، أهلاً بيكوا في اجتماعنا الغير رسمي المنتظم، أنا اسمي (وليد) مدمن بدير اجتماع النهار ده عشان مشربتش خمرة ولا مخدرات.

ارتعش جسدي مع هدير أصواتهم الذي ارتج به المكان تحية للمتحدث:

– أهلاً يا وليد.

استكمل الرجل بعد تحيتهم حديثه مواصلاً:

– نبدأ اجتماعنا كالعادة بلحظات سكون نفتكر كنا فين وبقينا فين، وندعي لكل مدمن بيعاني داخل وخارج المكان.

ها هو ذا الصمت وقد عاد مرة أخرى لأرجاء المكان، أراهم وقد أطرقوا الرؤوس وأغلقوا أعينهم على تأملات لا أدري عنها شيئاً، أحتاج لمثل تلك اللحظة مثلهم، فلربما استطعت خلالها محاصرة شتات أفكارى الشاردة في كل الاتجاهات.

لحظات من الصمت لم تطل، فتح الجميع بعدها أعينهم.

– في حد يبحضر اجتماعنا هنا لأول مرة؟ في حد هنا يبحضر
اجتماعنا لأول مرة؟

كررها وليد، ضاغطاً على حروفها في المرة الثانية لتنبيه ذلك الذي
جلس بجواري فتنبه رافعاً يديه إلى أعلى وهو يقول بنبرة حماسية:

– أنا عسلية، مدمن.

ارتفع هدير أصواتهم من حولي ثانية:

– أهلا يا عسلية.

ابتسم المشرف لحماسته ثم تابع بعد هتافهم موجهاً حديثه
لرفيقي:

– عايز أرحب ببيك وأقولك إنك أهم عضو معنا النهار ده،
بطلب منك تكون متفتح ذهنيّاً وتدي لنفسك فرصة، وبتمالك
استمرار في التعافي بمساعدة البرنامج.

هز عسلية رأسه متفهماً حديث الرجل الذي تابع يسأله:

– عندك أي مشاعر سلبية أو تحفظات تحب تخرجها من
جواك في أول اجتماع؟

صمت عسلية قليلاً وهو يعقد حاجبيه ممصمباً جانب شفته
السفلى قبل أن يعاود هز رأسه بنعم. فأشار له محدثه أن ابدأ قائلاً:

– طب عرّف نفسك مرة ثانية للناس واتفضل احكي، كلنا
سامعينك.

أنهى عبارته متخذًا مع الجميع وضع الإنصات في حين اعتدل الأخير إلى جوارى باعتياد بادٍ رافعًا يديه مرةً أخرى وهو يهتف بصوت قوي:

– أنا عسلية، مدمن....

وباعتياد مماثل جاوبه الهدير الجماعي:

– أهلا يا عسلية.

ثم ودون انتظار بدأ الحديث.

فجأة وبشكل مضطرب ارتفع صوت طرقات متتالية سريعة على باب المكتب الذي حوى كلا من وداد وجلال والدكتور إبراهيم في غرفة ذلك الأخير، فالتفت نحوه في سرعة مواجهًا عم راضي حارس البوابة الذي دلف بعد طرقاته داخلًا وهو يهتف بتوتر:

– أنا آسف يا دكتور، بس الحاجة والدة الأستاذ تعبت برة فجأة والسواق عايز حد يلحقها.

انعقد حاجبا الدكتور إبراهيم وانقبضت عضلات وجه وداد في حين هب جلال من مكانه مندفعًا إلى الخارج وهو يصيح:

– مالها أمي؟

تخطى المسافة الفاصلة بينه وبين السيارة في سرعة قافزًا درجات السلم بلا وعي متجاوزًا الجميع ويتبعه إبراهيم بأقصى قدرة

له على الهرولة.

كانت هناك بداخل السيارة ترقد في غياب تام عن الوعي على الكرسي المجاور للسائق والذي أعاد نعيم ظهره للخلف، وإلى جنبها حقيبتها التي أفرغ الأخير كل محتوياتها بحثاً عن شيء يمكنه إفاقتها.

هتف في قلق من خلف الرجل الملتاع قائلاً:

– أنا معرفش إيه اللي حصل يا جلال؟ كنت نايم وفجأة صحيت لقيتها بتكلم نفسها وغرقانة في عرقها، وفلحظة بعدها راحت زي مانت شايف كدا.

متيألي دي كومة السكر اللي كانت بتجيلها زمان، قلبت شنطتها عشان الأقي أي دوا معاها بتاخده ملقيتش.

لم تخترق كلماته حائط الذعر المسيطر على جلال وهو يتشبث بكفها البارد في قوة محاولاً كيح جماح مشاعره في حين اقترب الدكتور إبراهيم ممسكاً بيدها لقياس النبض واضعاً اليد الأخرى فوق جبينها قبل أن يقول موجهاً حديثه لعم راضي الذي اقترب ناحيتهم من بعيد:

– خلوا بالكوا من المكان لحد ما أرجع.

ثم التفت نحو نعيم وجلال يحدثهما:

– لازم ناخدها لأقرب مستشفى، هتحتاج تدخل العناية فوراً.

قالها وهو يستقل المقعد الخلفي للسيارة دون إضافات قبل أن

يصيح:

– بسرعة.

وعلى الفور اتخذ كل من جلال ونعيم مكانهما داخلها معه قبل أن تنطلق بهم في سباق مع الوقت، ومع القدر.

اتجهت الأنظار جميعها نحوه ومعهم فعلت، لم يبد مثيراً للريبة في حديثه أمامي تلك اللحظة، بدا صادقاً لحد تعجبته وهو يتنحج بعد تحيتهم له مغمغماً:

– صدقوني لو قتللكوا أن دي مش أول مرة أقول فيها الكلمة دي في اجتماع، بس حقيقي المرادي كأنها فعلاً أول مرة... أنا هاني الشهير بعسلية، مدمن، دايمًا كانت عندي حته الإنكار اللي بتقوللي لأ، إنت مش كده.

يمكن أه تكون بتتعاطى مادة معينة بتغير مودك، ويمكن فعلاً تكون بتحس بحاجة ناقصاك لما متكونش المادة دي موجودة، بس ده كله مش معناه أبدا إنك مريض أو محتاج لمكان تقعد وتتكلم فيه زي اللي جامعنا دلوقتي ده.

كانت عيناه ترصدان السجادة فوق الأرض وسطهم، وأعينهم ترصدانه في تركيز واحترام وهو يتابع:

– إن التحفظات تسلبنا فوائد البرنامج، جملة تافهة وبسيطة جدًّا في البرنامج اللي احنا شغالين عليه ده مفهمتهاش أنا غير دلوقتي، بعد 7 سنين إدمان نشط وانتكاس اترددت فيهم على

أكثر من مصحة ومركز تأهيل.

التحفظات، السر اللي جوه كل واحد منكو ومستخي مش عايز يطلع، سواء بسبب خوف أو خجل، وللا حتى إحراج.

كان يدقق النظر في السجادة، لا يرتب حديثه وإنما يخرج منه تلقائياً بغير حاجة لتنظيمه.

– واحد قبل كدا في واحد من الاجتماعات اللي حضرتها قبل آخر انتكاسة قالي إننا بندخل أوضة الاجتماع شايلىن جوانا زباله، أرضية المكان اللي احنا قاعدين فيه بتبقى أنصف مننا، والشاطر بس هو اللي يخرج مفرغ حقيقي اللي جواه، وسايب وراه الوساخة على أرضية المكان.

لم يتعجب أحدهم لفظه، يبدو أنهم معتادين على نوع كهذا من أساليب الوصف والتعبير... سارحة أعينهم مع سكناته ونبرته، تهبيداته المتكررة، وهنات الضحك الصادرة من شفثيه بين الحين والآخر.

– جملة تانية اتقالتلي برضو موجودة في الكتاب اللي معاكم دلوقتي، إن أفكارنا بتنمو في الظلام، وتحترق في النور، وأنا الصراحة سبت أفكارى بتكبر، مفضحتهاش، عمري ما فضحتها، كنت على طول بخاف أطلع عيوي قدام الناس لحد ما طفحت على وشي، وبقيت بشوفها قصادي في المراية وفي عين أي بني آدم ببصلي.

فرد ذراعيه على امتدادهم أمامنا وهو يكرر:

– أنا مدمن، حقيقي أنا مدمن. بدليل انتكاستي الأخيرة دي واللي قبلها واللي قبلها... أنا مدمن، بدليل أثار الحقن اللي في دراعي، والجلطة اللي في رجلي، بدليل الجروح اللي مالية وشي وجسي من خناقات الشوارع والمواقف اللي حطيت نفسي فيها، أنا مدمن بدليل أحلامي اللي محققتش منها أي حاجة، وحبايي اللي خسرت منهم كثير... أنا وصلت لمرحلة كنت بحقن فيها الحقنة لنفسي وأنا بعيط، ألف حاجة بتقوللي إنت غلط، ومليون يقولولي إن ده طريقك الوحيد... كثير أوي اتمنيت الموت، بس كنت بفوق عشان أعرف إني حتى مستاهلش مجرد التمني... أمنية الموت تلك أعرفها، وأدرك قدر الحسرة من إلتنها.

لفتت انتباهي تلك الجملة من حديثه فتأملته مطرفاً يجلس بجواري ويواصل حديثه:

– أنا عندي النهار ده 30 سنة، مش متجوز، معنديش شغلانة ثابتة، معنديش حتى في نطاق حياتي واحد يثق فيا أو أقدر أطلبه بفرصة جديدة يديهالي، عشان أنا استنفدت فعلاً كل الفرص، ومش باقيلي النهار ده غير فرصة واحدة بس مع ربنا وعايظه يديهالي.

تهدجت نبرته عند تلك النقطة وبدأ يبكي.

– عايظه يسامحني لأنني فعلاً مبعقتش قادر أسامح نفسي، بقالي سنين بحاول أهرب وكل اللي بعمله إني واقف عند نفس النقطة... السر اللي فقلبي محاوطني وسادد قدامي كل

المخارج، ومبقتش شايف قدامي حل غير إني أفضحه، جايز ألقى في اعترافي بيه التوبة.

قالها وهو يتذكر الحدث القديم ويحكيه، والده أمامه على السرير في منزلهم الضيق يعاني، يتصبب العرق من جبينه وترتعش كل خلية من خلاياه وإلى جنبه والدته التي اعتصرت الكمادة مع آخر ما تبقى فيها من أمل قبل أن تضعها فوق رأسه داعية:

– جيب العواقب سليمة يا رب، جيب العواقب سليمة.

قالتها في وهن وقد فقدت من حولها كل ملتجأ ووسيلة... صوت الحشرجة المنبعثة من حلقه تعلن اقتراب النهاية، وعيناه الجاحظتان للحظة تنبئهم أن لا أمل قبل أن ينطفئ النور فيهما دفعة واحدة في لحظة اقترنت بصرختها الملتاعة وهي تحتضن جسده الذي سكن تمامًا.

وحده أمام المشهد كان يدرك الحقيقة، يتحسس في جيبه تلك الجرعة المخدرة التي ابتاعها بثمن علاج أبيه، كذبًا أخبرها بأنه فقد المال، سقط منه خطأً خلال طريقه للصيدلية، ربما كان لينجو الرجل لولا فعلته.

– أنا قتلت أبويا، قتلته عشان جرعة مخدر زائدة طمعت فيها، قتلته ومن ساعتها وأنا بضرب بس عشان أنسى اللحظة دي، وللأسف؛ عمري ما قدرت أنساها، فضلت شايلها حمل ثقيل أوي في قلبي، حمل يخلي الموت بالنسبالك هدف، مش حاجة تخاف منها، يمكن لو رحته هناك أقدر أخليه يسامحني، ده

اللي كنت بفكر فيه، ودا اللي أنا كنت عايزه...

بس في آخر انتكاسة ليا وفي اليوم اللي جابتي أمي فيه هنا حصلت حاجة غيرتلي طريقة تفكيري، لما شفت الدموع في عين الست الغلبانة وهي بتتحايل على إدارة المستشفى هنا عشان يدخلوني بفلوس أقل من اللي متعودين يحجزوا بيها الناس لمبة كبيرة في دماغى نورت، وسألت نفسي: إيه اللي يخلها تتذلل عشان كلب زي ميستاهاش حتى إنه يعيش؟ حتى لو مش عارفة إني سبب في موت جوزها، بس كفاية علمها كم البلاوي والفضايح اللي سببتها لها...

أنا اللي كل الناس بقت تقرف حتى تبص في وشه، هو في حد لسه يهमे أمري؟ في لسه حد بيتوجع عشاني وعايزني أبقى كويس؟ في حد لسه مستعد يضحي بكرامته عشان خاطري؟ طب ليه؟ وليه إدارة المكان هنا برغم قوانينهم يوافقوا؟ إيه يا رب اللي كويس فيا إنت شايفه وعايزني أعيش علشانه؟ إيه اللي باقى جوايا يستاهل فرصة تانية بعد كل اللي عملته ده؟ تقدرُوا تقولولي؟

تأثر الجميع بكلماته دون أن ينبس أحدهم ببنت شفة احتراماً لتقاليد الاجتماع، وشعرت أنا بتعاطف رهيب نحوه، ونحو نفسي، تهديدته التالية بدت وكأنها تهديتي، وعبارته الأخيرة ما زلت أذكرها:

– عشان السؤال ده بس، أنا المرادي بقولكم إني فعلاً وبمتمتي الوضوح: عايز أنعافي، وأسف لو طولت عليكم في الكلام.

أنهى كلامه فصمت خافضاً رأسه، ليرتفع صوت أكفنا جميعاً من بعده بالتصفيق.

من خلف حائط زجاجي داخل تلك المستشفى التي وصلوا إليها وقف نعيم يتابع بعينيه في هدوء يد جلال المربطة على كف أمه التي تمددت فوق سريرها أمامه قبل أن يتهد ملتفتاً نحو إبراهيم القادم نحوه من آخر الممر وهو يسأل:

– إيه الأخبار؟ فاقته وللا لسه؟

أشار له نحوهم وهو يتمتم:

– الحمد لله.

شاركه إبراهيم نظرة إلى الداخل ثم اكتفى بهزة رأس قبل أن يتراجع ملقياً جسده فوق أقرب مقعد انتظار إليه وهو يقول:

– الحمد لله إننا لحقناها، الدكتور بيقولي إن الموضوع كان وارد جداً لو اتأخر عن كدا ببقاله مضاعفات مش مضمونة.

اكتفى نعيم بدوره من المراقبة فتراجع هو الآخر ليتخذ مقعداً بجواره قائلاً:

– إحنا متشكرين أوي يا دكتور، لولا معارف حضرتك هنا كنا يمكن خدنا وقت زيادة على ما يسعفوها.

هز له الرجل كتفيه أن لا شيء يستحق، بينما استمر هو:

– أنا مش عارف إزاي ده حصل؟ كانت بتتكلم مع نفسها وفجأة لونها وشها اتغير ولقيتها بتقع قدامي، أنا قلت خلاص بتروح.

فرد إبراهيم إحدى قدميه لآخرها أمامه مدلًا بيده على منطقة الركبة وهو يسأله:

– كان في حاجة مزعلاها؟

أوما نعيم برأسه أن نعم متممًا:

– جلال بيه لما طلع من عندك قالها كلمتين يظهر إنهم وجعوها أوي.

تفهم إبراهيم الأمر دون إضافة ثم قبع للحظة في الصمت مفكرًا قبل أن يسأل مرة أخرى:

– معاشر الناس دي بقالك فترة إنت يا اسطى نعيم؟

– يا اااه يا دكتور، ده عمر، إنت بتتكلم عن حاجة بقالها أكثر من ثلاثين سنة، أنا شغال عندهم من أيام البيه الكبير جوز الست إشراق الله يرحمه.

ارتفع في تلك اللحظة صوت رنين الهاتف المحمول الخاص بإبراهيم فالتقطه من جيبه متطلعًا عبر شاشته إلى اسم المتصل قبل أن يعقد حاجبيه في استغراب وهو ينهض مستأذنًا نعيم:

– بيتصلوا بيا في المصححة، بعد إذنك هشوفهم عايزين إيه؟

أشار له الرجل أن تفضل وهو يتابع ابتعاده المقترن بصوت كعب

الحذاء الأثوي المقترّب من جهة الممر الأخرى، فاستدار على إثره
ليراها قادمة بقوامها الممشوق وملامحها الحادة الواثقة.

نهض مرحبًا بمجيئها مع قوله:

– جيهان هانم، كويس إنك عرفتي توصلي، أنا آسف لو قلقتك
بس أنا كنت لوحدي ومكنتش عارف أتصرف.

أتاه ردها على عكس المتوقع باردًا خاليًا من المشاعر وهي تشير
له بيدها في فتور:

– مفيش قلق ولا حاجة أنا كنت قريبة كدا كدا.

ثم أخرجت من حقيبتها علبة سجائر تناولت منها واحدة دستها بين
شفتيها فسارع بتنبيهها:

– خلي بالك مانعين التدخين هنا في المستشفى.

تأففت في ضيق وهي تلقي بالسيجارة المنطفئة أرضًا دون اكتراث
ثم سألته بنبرة حادة:

– طب هما خلصوا وللا لأ؟ وفيين جلال عشان أنا عايزاه.

نهض منحنيًا يلتقط لفافة التبغ من فوق الأرض ليلقي بها في سلة
مهملات قريبة قبل أن يشير لها نحوهم من خلف العازل الزجاجي
قائلًا:

– جوة معاها أهو، بيظمن عليها بس عشان لسه فايقة، الحمد
لله لحقناها على آخر لحظة زي ما قال الدكتور.

لم تعباً بشيء من رده وهي تلتفت إلى حيث أشار راصدة تقبيل
جلال لكف أمه في الداخل هامساً لها بصوت لم تسمعه هي:

– سامحيني يا إشراق، لو أعرف أن كلامي هيجرك مكنتش
قلته، أنا كنت مخنوق بس.

وبإعياء واضح، وصوت واهن ردت عليه هي:

– أنا اللي المفروض أعتذرلك يابني، سامحني إنت أرجوك،
سامحني بجد.

تأملها بكم من الحسرة باحثاً عن رد لم يجده فربت بكفها
المتعرق فوق ذراعه وهي تتحدث بصعوبة من فرط التعب:

– أنا كل الي عملته معاك كنت عاملاه بدافع الحب، ومكانش
عندي شك فإنه ممكن يضرك أو يبقى فيوم شر ليك، بس
النهار ده أما شفتك بتلومني صدقتك، واكتشفت كدبة الأنانية
الي كنت معيشة نفسي فيها.

بصعوبة حاول اسكاتهما للتهوين عليها قائلاً:

– مفيش داعي للكلام ده دلوقتي يا أمي، ريحي إنتي بس
ومتشغليش بالك بالكلام عشان متتعبيش.

أطلقت ضحكة قصيرة واهنة تأوهت بعدها وهي تقول:

– يابني بكمالة كل الكلام الي اتكلمته، منا طول عمري بتكلم
بس وانت بتسمع، خليني المرادي أقول الكلمتين الي فعلاً

هيريجوني.

ابتسم لها بدوره وهو يحتضن كفها إلى جوار وجنته بينما هي تلتقط بصعوبة أنفاسها لتتابع:

– كنت أصغر من أبوك يوم ما اتجوزته بعشرين سنة، ناس كثير اعترضت عالجوازة دي ساعتها، بس أنا مسمعتش كلام حد فيهم عشان كنت بحبه... كان بالنسبالي البطل، مثل أعلى زي ما بيقولوا، جامع في عيني بين الحبيب والأب.

سعلت وسط الحديث للحظة فأحاط كفها بقوة أكبر ذارقاً دمعة من عينيه على ذكرى والده الذي لم يره إلا من خلال الصور وحكاياتها وهي تكمل:

– لما جبنك كنت إنت الوردة الوحيدة اللي قطفها لي من روحه قبل ما يموت ويسيبني أفهم إن كل الناس اللي حذرتي كانت صح، وأنا لوحدي مع الحب الأعشى اللي اخترته مكناش فاهمين.

فهمت ساعتها بس متأخر هما ليه قالولي بلاش، بلاش تربطي مستقبلك بخيط مش مضمون اسمه الحب، لما حسيت بوجع الفراق لقيتني بقدم لكل واحد فيهم من جوايا ألف اعتذار...

لقيت نفسي بتقولي فادك بايه الحب؟ عمك إيه؟ سابلك ورت زيادة؟ مكنتش محتاجاه، أنا كده كده كنت من عيلة مستريحة زي مانت عارف، طب سابلك طموح؟ كان كدا كدا عندي وكان ممكن أحققه بشكل أبسط وأمن، سابلك إيه غير إنه سابلك أرملة؟ ولا حاجة! غير شوية ذكريات وخيبة وألم، ومعاهم

حاجة واحدة جميلة بس هي إنت.

أنا عشت أيام اكتشفت فيها أد إيه الزمن ده ميبرحمش، وعشان أحافظ عليك كان لازم في كل يوم أسعى إني أكون أقوى برغم إن حاجات كتير أوي من الماضي كانت بتضعفني.

ربيتك وكبرت قدامي وأنا شايلة في قلبي شعور بذنب اختيار كتب عليك من صغرك تعيش يتيم من غير أب يطبطب عليك أو يكون جنبك يوم ما تحتاجله.

شعر باختناق أنفاسها فرفع عينيه نحوها يطالها بالصمت ولكنها ابتسمت له مطمئنة وهي تستمر:

– فاهم دلوقتي أنا ليه اعترضت على جوازك من وداد؟ مش عشان الفرق الاجتماعي اللي كان بينك وبينها، ولا عشان هي بني أدمة مش كويسة، أنا اعترضت بس عشان شفت فعينك ناحيتها اختيار شبه اختياري زمان أساسه الحب وبس.

لا أنا ولا أبوك كنا وحشين، الحب اللي بيننا بس هو اللي كان وحش، دا اللي أنا كنت شايفاه، ودا اللي شفت إنه غلط كبير ممكن معاك يتكرر.

أنا كنت شايفة إن الحب اللي ميحترمش المنطق ده بي موت، وإن عاش بيعيش بس على موت اللي عايشين يفتكروه، مكنتش عايزالك النهاية دي يا جلال، مكنتش عارفة إني غلط، وإني لاغية كل تصاريق القدر والنصيب من حساباتي.

إنت مغلطتش لما جيت النهار ده تلومني لأنني أستاهل فعلاً منك
دا، أنا آسفة يا ابني، حقيقي أنا آسفة.

قالتها ثم انهارت في بكاء حارق دُرِّقَتْ له دموعه بدروه وهو يقبل
يدها مرة أخرى منتحبًا مع قوله:

– مسامحك يا أمي، أنا والله العظيم مسامحك، ارت...

قطع عبارته بغتة مع صوت طرقات من خلفه فوق الحائط
الزجاجي فالتفت إلى تلك التي وقفت وراءه بوجهها حاد النظرات تتطلع
إليه منتظرة، ثم تمتم باسمها رافعًا حاجبيه في تعجب لوجودها في تلك
اللحظة: زوجته الثانية، جيهان.

الفصل التاسع

«الوهم حقيقةٌ خَدَعَتْكَ»

بشأني كانت تلك المهاتفة التي وردت الدكتور إبراهيم أثناء تواجده في المستشفى، توقعت ذلك قبل حتى أن يخبرني به وهو يجلس أمامنا وأنا وعسلية مشبكًا أصابع يده أمامه ليستكمل القصة بتفصيلٍ منحني فرصة تخيل الصورة برممتها، كان يحكي وكأنما يعايش المشهد ثانية، لم يغفل أية تفصييلة، حتى تلك الذبذبات الصوتية التي صاحبت صوت محدثه في بداية المكالمة بسبب ضعف إشارة الاتصال داخل نطاق المكان حينها ذكره.

– الشبكة كانت ضعيفة في المستشفى هناك، ودا خلاني مضطر أنزل برة المكان خالص عشان أعرف أسمع باقي المكالمة كويس.

هز رأسه وهو يعاود استمتاعه بتذكر الأمر قبل أن يتابع:

– كان عاطف موظف الاستقبال اللي معايا هنا في المصححة، مصدقتوش أول المكالمة لما قاللي إنها عايزة تاخذك وتمشي، قلت لنفسي إزاي؟ وسألته إيه اللي يخليها فجأة تاخذ قرار زي

ده؟

لم يستوعب عقله الأمر في البداية، تلك التي أتت حاملة فتاها إلى هنا منذ أيام في ظروف كانت أشد قساوة، ثم قبعت لساعات معه بطول اليوم لغايةٍ ورغبةٍ وحيدة هي علاج ابنها، أنى لها في نصف ساعة فقط أن تلغي كل ما صنعته، وتتخذ قرارها المفاجئ بالرحيل؟ ساورته كل تلك الأسئلة بعد انغلاق الخط سارحًا يقف أمام البوابة الزجاجية غير آبه بانفتاحها فور استشعار راصدها الحراري اقترابه.

– هتدخل يا فندم وللا إيه؟

انتشلته عبارة رجل أمن المستشفى الواقف يرتدي زيه الزهري خلف مكتب الاستقبال قبالة باب الدخول فرفع عينيه نحوه لحظة قبل أن يهز رأسه معيّدًا هاتفه إلى جيبه وهو يجيب:

– آه عفواً، معلش أنا آسف.

ثم دلف عابراً الساحة الداخلية متجهًا نحو المصعد الذي احتواه في رحلة عودته لطابقه المنشود، إلى حيث نعيم، إشراق هانم، وجمال، هذا الذي ينبغي أن يخبره بالأمر.

– مجاش في بالي وقتها غير أني أطلع وأقول لوالدك، هو الوحيد في اعتقادي ساعتها اللي كان قادر يتخذ قرار، أو على الأقل يفهمني هيا إيه اللي يخليها تعمل كده.

بات داخل الصندوق الكبير وكأنما يقلب أفكاره بين انعكاساته فوق الجدران المعدنية الأربعة التي أحاطت به لدقيقة أو يزيد قبل

أن ينفرج إحداها مع وصوله ليندفع بغير تركيز عبره مرتطمًا بتلك المتأنقة التي انبعث منها عطر أنثوي نفاذ وهي تخاطبه محتدة:

– في إيه يا أستاذ؟ مش تخلي بالك وانت بتطلع؟

لوح لها بكفيه معتذرًا دون النطق بكلمة وهو يفسح لها المجال لتخطيه دائرًا ببصره في المكان بحثًا عن الوحيد القادر في اعتقاده على تفسير الأمور، في آخر الردهة الطويلة أمامه رصده، كان يقف مستندًا بكفيه إلى نافذة كبيرة في نهاية الممر، فمشى إليه.

– صحيح كان غريب اللي والدتك عايزة تعمله، بس رد فعل أبوك لما رحت أقوله على قرارها حقيقي بالنسبالي هو اللي كان أغرب.

مضت نصف ساعة عليها منذ رحيلهم، تجلس وحدها في حجرة المكتب عاصفة برأسها الأفكار.

والآن يا وداد، ماذا بعد؟ ما هو فصلك التالي من روايتك الخاسرة هذه؟ أفقد آخر؟ أم وجع جديد تبدو مقبلة في الأفق رياحه؟ كانت تتجول في أركان المكان داخل المكتب أيبهً وذهابًا، مرتبكة، حائرة الوجد غير مهتدية لبر أمان ترسو عليه أشرعتها، تمتد يدها مداعبة أوراق التقرير الطبي الذي تركه إبراهيم خلفه، تقلب بين صفحاته، تقرأ الاسم المكتوب على صفحته الأولى: شريف جلال عبد العزيز، يعاودها خليط من الحوارات والصور.

– إنت فعلاً عايز تسافرله وتسبيني؟

– أيوه، هسافر يا أمي، ودا قرار نهائي.

انعكاسات الضوء الأزرق والأحمر على وجهها وفوق الأسفلت، أبواق سيارات النجدة والإسعاف، مشهد الأشلاء المتفحمة، دماء ينزفها جسد بالكاد يتنفس، وصرخاتها: «ابنك مات»، حسن: «عبيط بقى وغلبان زي ما أمي كت بتقول»، جلال: «أنا عمري ما خنتك يا وداد»، إشراق: «جوزك مع مراته الثانية»، شريف: «الحرية اللي إنتوا بأنانيتكم طول الوقت حرمتوني منها»... لا...

تردد هدير الصبحة في رأسها من بين أصواتهم المختلطة جميعها دون صدى، لا، لن تترك نفسها رهينة هذا الضياع، عليها أن تنجو بما تبقى لها، امتدت يدها ملتقطة حقيبتها الملقاة على حافة كرسيها قبل أن تتجه في سرعة نحو باب المكان لتفتحه منادية على أقرب الموجودين أمامها فأقبل متسائلاً لتهتف بعصبية في وجهه:

– أنا عايزه ابني، روحوا جيبدوهولي، مش عايزاه يفضل هنا دقيقة واحدة كمان، خدوا بقيت حسابكم وهاتولي ابني حالاً.

تلعثم الرجل أمام عصبيتها محاولاً تهدئتها:

– طب حضرتك إهدي شوية بس، هو إيه اللي حصل؟

صاحت بكل ثورتها فيه:

– مش ههدى، بقولك هاتولي ابني، عايزاه دلوقتي حالاً، إنت فاهم وللا لأ؟

أوماً الرجل برأسه أمامها في قلق، ثم ابتعد مختفياً عن ناظرها ملتقطاً هاتفه المحمول ليبحث فيه عن رقم الدكتور إبراهيم الذي ما إن أتاه صوته على الجهة الأخرى حتى أخبره:

– ألو يا دكتور، أنا أسف للإزعاج، بس في مشكلة مش فاهمها بتحصل عندي هنا.

هناك، في آخر الردهة الطويلة للمشفى وقف يستند بكلتا راحتيه على زجاج النافذة الكبيرة أمامه مقاوماً فقد اتزانته، محملاً بقدر لا يستهان به من القهر، وأسرار فضت له تَوًّا غشاءها تلك الراحلة من خلفه: جيهان.

وقع أقدامها المبتعدة من خلفه عبر الممر كمطارق تدك كل خلية في جسده، وتبدو صورته فوق الزجاج باهتة تماماً كروحه، لم تطل عليه الحديث، كلماتها كانت موجزة، طليت بسم الحقيقة المرة، تلك التي نخشى دوماً مواجهتها ونمضى العمر كله هرباً من أن نفعل.

– أنا زهقت وعايضة أطلق يا جلال.

بدأت بها معه الحوار، لم تطلها منه، كانت تأمره بها تماماً كما أمرته بالزواج منها في السابق لكنه حينها لم يفهم: «كل اللي أعرفه إني بحبك، بحبك وبس، ومش عايضة من الوجود أو منك غير حاجة واحدة بس، إنك تبقى معايا» لا فارق بين الجملتين اليوم في نظره، فكلتاهما رغبة، وفي كليهما نجحت هي في تحقيقه.

تمامًا كما عارضها بالضعف في طلب الارتباط قديمًا فعل
بالصدمة أمام طلب الانفصال المفاجئ منذ لحظات، بذات النظرة
البهاء واجهها، تسألها عيناه عن السبب، أخبرته بأنها ملت، تلك
المدللة كان هو لسنين لعبتها، وها قد فرغت منه الآن، لم تخش بتاتًا
مصارحته، ولم توار فيضًا من البجاجة بات يراه لأول مرة في عينها
الواثقتين أمامه وكلماتها المصطبغة بكل لامبالاة الأرض.

– يا جلال متأفورش الموضوع، أنا وانت عارفين أن التمثيلية
اللي احنا فيها دي كان هيجيلها وقت وتنتهي.

– تمثيلية؟

ردد الكلمة من ورائها مندهشًا، أنى لكل هذا الماضي أن يغدو
زيقًا؟ كيف كان المغرر به إلى تلك الدرجة؟ لا يؤلمه أن ترحل بقدر
ما يؤلمه الدور الذي أوكل إليه وبكل اقتدار وجهل أداه، مألئًا لفراغها
النفسي كما عنت، فترة من فترات العبث، مجرد لعبة!

– كل الحكاية أني متعودتش أعوز حاجة ومطولهاش، طول
عمري بعشق الرهانات، وانت بالنسبالي كنت رهان مميز،
راجل ناجح، عنده المقومات الكافية اللي تخلي أي بنت تدخل
في معركة عشان توصله، إضافة لأنه متجوز وفوق ده كله
كمان بيحب الست اللي هو متجوزها.

تواصل دقات الكعب من خلفه خفوتها التدريجي، بينما صدى
الكلمات يواصل إحراقه، لم تلك السنين إذًا كلها؟ لقد أمضيا معًا فترة
ليست بالقصيرة، عاشا كالأشباح يجمعهم قبر واحد، لطالما ظن بأنه

السبب الأوحـد في ذلك الفتور المتنامي بينهما، لكنه الآن أدرك أن غير هذا الفتور لعلاقتهما ومهما اختلفت الأوضاع لم يكن ليُكتَب، لقد مكثت فقط لتأكيد انتصارها عامًا بعد عام.

بقيت وهدفها ذروة المتعة، تلك النشوة التي يستشعرها مصارع الثيران لحظة وضع قدمه على رقبة ثوره الصريع بعد فيض جراح أنختها فيه سهامه، هكذا فعلت هي، بالبـدء من سهم أصاب وفاءه كمحب، تلتـه إصابات في فرحه وطموحه وثقته في ذاته؛ كانت هي تتابع كل شيء تباغًا، متأهبة للحظة انتشاء أخيرة؛ تسحب فيها القوس عن آخر ما تبقى في جعبتها من سهام لتشهد منه خوارًا يعلن النهاية.

– يمكن لو كنت حبيتي من الأول مكانش الموضوع بقاله لازمة، صدقتي يا جلال، عنادك في الأول واعتراضك هما اللي خلوا للتحدي ده طعم.

– إنتي أحقر بني أدمة أنا شفتها في حياتي.

بكل السخط المعتمـل في ذاته نطق بها، قالها بجام كراهية الكون، واستقبلتها هي بضحكة مجلجلة تردد صداها موجعًا كل ركن من خلاياه وهي ترفع سبابتها أمامه محذرة:

– مفيش داعي للغلط، خـلينا نكون متحضرين، أنا مش حقيرة زي ما بتقول، كل الحكاية أني واحدة صريحة بس وعارفة كويس هيا عايزة إيه.

قالتـها ثم أولت له ظهرها استعدادًا للرحيل فصاح مفرغًا رغبته الانتقامية:

– إنتي طالق.

هزت كتفيها دون أن تلتفت نحوه قائلة دون اكرات:

– مش حابة أسمعها بالطريقة دي، بس حرك.

قبل أن تستطرد وهي تخطو أولى خطوات الانصراف:

– يا ريت ورقتي متأخرش، إنت عارف عنوان بيتنا على ما
أظن.

ثم توقفت وكأنما تذكرت أمرًا ما، ذلك السهم الأخير القاتل الذي
التفتت ناشبة إياه بكل قساوة في قلبه وهي تقول:

– نعيم السواق قاللي صحيح إن شريف هو اللي لسه عايش.

رصدت عيناه ابتسامتها التي اتسعت على نحو لن يغدو في مقدوره
نسيانه بينما تكمل:

– لما يطلع من المصححة، إبقى خليه يحكيك عن العلاقة اللي
كانت بيني وبينه في الكويت.

بغمزة أنهت جملتها، تلك التي لم تكن بحاجة لأي توضيح،
كصاعقة هطلت ممزقة كيانه، شعر وكأن الأرض تميد من تحته، ها
هو ذا الثور الجريح يطلق خواره الأخير، تهاوت كل طاقاته الدفاعية
دفعة واحدة وكاد أن يتبعها جسده فالتف مستندًا براحتيه إلى النافذة
الزجاجية من خلفه متنامٍ لأذنيه وقع ابتعادها، مطأطئ الرأس كتمثال
نحت من الخزي، يحمل أطنان عار فوق رأسه، تتردد كلماتها في عقله

بلا توقف؛ ليدرك في كل مرة أنه خسر كل شيء.

من ورائه يقترب الدكتور إبراهيم، يتنحى معلناً عن وجوده، ثم يخبره:

– أستاذ جلال، كلموني في المصحة دلوقتي وقالولي أن مدام وداد عايزة تاخد شريف حالاً وتمشي.

صمت، طال صمته حتى بدا وكأنه في عالم آخر، قبل أن يتمتم بنبرة كسيحة:

– خليها تاخده يا دكتور.

قوللهم عندك يسبوها تاخده وتمشي، وحضرتك كمان تقدر تمشي، أنا مش راجع معاك خلاص، مفكرش أن في شيء دلوقتي ممكن يتصلح، وهنا انعقد حاجبا الدكتور إبراهيم من ورائه بحيرة بالغة، بينما هو الواقف تتأكد الصورة في ذهنه، لقد خسر حقاً –وللأبد– كل شيء.

ها قد باتت النهاية موشكة، يعلن عنها لون السماء الملطخ بحمرة المغيب عبر نافذة المكتب المطلة على الخارج، وصوت مرشات المياه المشتعلة لتوها في الحديقة الخارجية، والذي اقترن بنظرة الدكتور إبراهيم الطويلة التي تفحص بها ملامحي بعد انتهائه من سرد كافة ما لديه من تفاصيل قبل أن يتمتم:

– متهيألي جه دورك دلوقتي إنت بقى يا شريف تفهمي.

نطق بها ثم تلاها بعبارة مباشرة ختمها بسؤال واضح:

– ثاني يوم على طول، لقيتك واقف قدامي هنا لوحدك في المكتب ده، شايل شنطة هدموم صغيرة على كتفك وبتطلب مني إنك تكمل فترة التأهيل، وعلى قد ما فرحت بيك بس كان نفسي أسألك ساعتها إيه اللي رجعتك؟

لوهلة تأملته مفكرًا، ها قد تبادلنا الأدوار، من الآن سيترك لي مقعد السردي لأحتله، وسيجلس هو مع عسلية في الغرفة لأول مرة متخذًا دور المستمع لما أقول:

– لو عايز تعرف سبب رجوعي، اسأل ده؟

قلتها وأنا أحرك رأسي باتجاه ذلك الأخير الذي اتسعت عيناه في دهشة وأنا أستطرد موجهاً حديثي إليه:

– إنت يا عسلية السبب الحقيقي ورا رجوعي هنا للمكان.

بنظرة غير فاهمة وبشفتين تلعثم فوقهما سؤاله المقتضب هتف:

– أنا؟

هززت رأسي بالإيجاب وتابعت:

– من تسعين يوم بالضبط، وفي أول اجتماع حضرته هنا إنت سألت سؤال أنا لسه فاكره لغاية النهار ده.

هو ربنا إيه اللي شايفه كويس فيك وعايزك تعيش علشانه، وأعتقد أن الإجابة ممكن تكون واضحة قدامك دلوقتي في وش اللي

بيكلمك، ظل عسليّة يتأملني وقد بدت في عينيه بوادر عبرات متجمعة لا تكاد تصدق شيئاً مما يقال، بكل امتناني الحقيقي له كنت أخطبه موضعاً له الأمر:

– أنا مش بجاملك، حقيقي إنت صدقك اللي اتكلمت بيه يومها هو اللي شجعتني على قرار الرجوع، ربنا وضعك في طريقي، سبب لولا وجوده كان زماني واخذ طريق تاني خالص في حياتي، طريق إسود مفهوش غير حزن وفشل وضياح.

بذات الشفتين المرتعشتين كرر عسليّة مرة أخرى مشيراً إلى صدره:

– أنا؟

هزرت له رأسي ثانية في لحظة ارتفاع صوت أذان المغرب من مكان ما حولنا ليمنحنا السكوت، مختزين لدقائق حفنة من المشاعر داخلنا حتى انتهائه الذي تلتته عبارة الدكتور إبراهيم:

– عندك لسة تفاصيل أنا معرفهاش يا شريف، ومحتاج أسمعها، أنا مسألتكش عن السبب اللي خلاك ترتاح للمكان ده أو تفضله عن غيره من الأماكن، أنا سألتك إيه اللي خلاك ترجع.

أفصحت شفتاي له عن ابتسامه إعجاب بنظرته السابرة لأغوارِي، ثم تمت ببطء شديد:

– ينفع تخدع حد، وانت بتقوله الحقيقة يا دكتور؟

ضاحت حدقتها محاولاً استشفاف غرض السؤال الذي تبعته
بأخر استفسار لي:

– صحيح، إنت مقلتي ليش يا دكتور بعد الحب، تفسيرهم
للكلمتين التانيين كان إيه؟

لم يتغلب سؤالي على فضوله، وبالرغم من أنه استشعر فيه تهرباً
من سؤاله أجاب بكامل الاهتمام:

– لما سألت أبوك السؤال ده واحنا مستنيين جدتك تفوق في
المستشفى فإكر إنه احتمل أن تكون الحرية بالنسبالك هي
سفرك ليه الكويت، وبالنسبة للطير أكدي أن طول عمرك
بتكره الطيور، قاللي أن أخوك ياسين كان من عادته إنه
يجيبها أقفاص عندكوا في بيت الوالدة ويربها، وإنك كنت كل
ما تلاقيه جايب جوز تفتح عليهم القفص وتطيرهم، بس. مش
فإكر إنه قاللي حاجة تانية غير كدا.

تمت أقواله ليستعيد مرة أخرى هيئة المنتظر، أخبرته بأن
الحقيقة كانت لسان أبي، لكنها –وبرغم كل الصدق فيها– زائفة، ثم
تمهدت أمامه ساحباً من هواء المكان إلى صدري نفساً عميقاً راقبت
خلاله عينيه المترقبة لجواب سؤاله:

«لماذا عدت؟»

معها رحلت.

أذكر تفاصيل النظرة الملهوفة التي استقبلتني بها، وتستعيد مخيلتي ذلك الصمت الطويل الذي اقتاد كلينا داخل سيارة أجرة انطلقت عائدة بنا للبيت، يكوّن عقلي صورة للحارة من قبل الوصول، شيئاً فشيئاً كان انتمائي لكل الأشياء يعود، رائحة أكوام القمامة المتراكمة في مدخل الشارع، ارتجاجة أجسادنا فور عبور الطريق غير الممهّد على ناصية حارتنا، ميزت بعض السائرين حول السيارة من أهالي المنطقة، وتلك البناية في آخر الشارع الضيق الذي توقف السائق على ناصيته، إنها البيت.

ترجلنا أنا وهي نكمل الطريق سيراً على الأقدام، أتكى عليها أو تحتويني بذراعها، لا أعرف أيهما أدق وصفًا، كل ما عرفته حينها هو أن وقتاً طويلاً مضى منذ غبت عن المكان، لكن شيئاً من صورته الثابتة في ذهني لم تتغير.

أمشي بجوارها في شرود، وتتلقى هي التهاني والمباركات من بعض المارة المعربين عن فرحتهم بعودتي حتى شارفنا الوصول إلى مدخل البناية، منحت الشارع بعيني نظرة أخيرة، قطعها عند نقطة ما وأنا أشير برأسي نحوها متسائلاً:

— هو فين عم حسن؟ وياه يا أمي اللي عمل في ورشته كدا؟

بدت أمامي كأطلال خربة، كبيت تعرض لقصف من غضب، كل ما فيها محطم، حتى اليافطة التي كانت تحمل اسمه رأيتها وقد تهشمت

لأكثر من جزء فوق الأرض أمامي، لماذا لم تجب السؤال هي؟ ولماذا لاح الانقباض على وجهها حين أخبرنا أحد جيراننا الواقفين بما جرى؟

حدثنا عن لوثة أصابت هذا الأخير، عن جنون دمر به كل شيء، عن صرخات غضب لم يتسع قلبه لكتمانها، بصعوبة أوقفوه، فتركهم بفرجة يأسه جميعاً وابتعد، لماذا ارتعشت يدها التي أحاطت بها خصري؟ هل تدرك أمراً لا يدركه الآخرون؟ لم أكن أعرف!

تهاديت بعقل يواصل استعادة كامل استيعابه معها صاعداً سلمنا القديم حتى باب الشقة الذي فتحته وهي تهمس:

– ألف حمد لله عالسلامة.

من حولي لم يبد المكان أبداً على حاله.

المقاعد مرصوفة بشكل لم أعهده، وفناجين جفت فيها آثار القهوة هنا وهناك، عقلي مجهد إلى حد لا يمكنني وصفه؛ تلاحقه الومضات التي لا أدرك لها أي معنى: أسفلت، مذاق دم، صرير إطارات ممتزج بصرخات، صور دارت بها الأرض من تحتي وكدت أفقد توازني معها، فنفضتها جميعاً عن رأسي وأنا أتمتم:

– دخليني أوضتي وسيبيني مع نفسي شوية، أنا حاسس إني تعبان.

لم تجادلني بكلمة حتى، وصلنا إلى عتبة الغرفة فدلقت أنا وحدي إليها وجذبت الباب من ورائي أغلقه، أيا عالي الصغير الضيق؛ كفاك عبثاً في رأسي، وأفصح لي الآن وهنا عما لديك.

مجموعة الكتب المترابطة فوق المكتب كما هي، السرير كما هو، وذلك القفص المفتوح الخالي إلى جوار نافذة مغلقة اقتربت نحوها بخطوات مرتابة، ويبد من فضول دفعت درفتها فانفتحت، فقط لأراها، كالعادة من خلف الشرفة المفتوحة على الجهة المقابلة، تلك التي صنعت نوافذ الكون بأسرها حتى تطل: إيما.

حينها لم تبد لي عيناها كالبحر، حينها لم تكن تبتسم، كانت تنظر مباشرة في عيني وكأنها قبعت هنالك بانتظاري. أنا، أو شخص آخر. من حسرة في عينيها لحظة رؤيتي استعاد عقلي بغتة كل شيء، وفي لحظة واحدة تبدلت من وهم صنعته بخيالي إلى حقيقة:

حقيقة مؤلمة.

– قصدك البنت الآسيوية؟

قطع الدكتور إبراهيم وصل خواطري بسؤاله، فرفعت نحوه عيني وهو يستطرد:

– جارتكم اللي كنت بتحبها، كان اسمها إيما متهياي، هي دي اللي إنت شفتها؟

مع هزة من رأسي اقتنصت له ابتسامة بأسنة رسمتها فوق شفتي وأنا أجيبه:

– هي دي الوهم اللي كنت هريان فيه.

أمال نحوي رأسه مهتمًا بعلامة استفهام كبيرة بدت في ضيق
عينيه وسؤاله:

– إيه اللي افكرته ساعة ما شفتها؟

أغمضت عيني وهممت بالرد عليه لولا صوت الطرقات السريعة
التي ارتفعت فوق باب الحجره قبل أن يفتح كاشفًا عن وجه الكابتن
وليد مشرف التأهيل الذي أطل على ثلاثتنا برأسه من الخارج، فاجأته
النظرات المتفاجئة فرفع كفًا بالاعتذار وهو يعقد حاجبيه قائلاً:

– إيه التبريقه دي؟ شكلكوا كنتوا مركزين في حاجة مهمة أوي.

تمتم بها مازحًا دون أن يأتيه من ثلاثتنا أي رد، فأشار بإصبعه نحو
كلينا أنا وعسليه وهو يكمل:

– بعد إذنك يا دكتور، الشباب دول وراهم اجتماع دلوقتي
ولازم يحضروه، أنا معنديش استثنائات زي مانت عارف.

ثم اقترب تجاهي بابتسامه على وجهه ومد يده يساعدي على
النهوض معه متابعا:

– وللا انت فاكر اكمنه آخر يوم ليك يعني هتهرب؟

ندت من بين شفتي عسليه ضحكة قصيرة هتف بها:

– لا، يهرب إزاي؟ ده احتفاله النهار ده باليوم التسعين.

في حين تبادل الدكتور إبراهيم معي نظرة طويلة اتخذ خلالها
قراره ليتمتم:

– روح عالاجتماع دلوقتي طيب، وبعدها لو في كلام حابب قبل خروجك تقوله نبقى نكمل.

تأبط وليد ذراعي بشيء من غبطة متجهاً بي ومعنا رفيقي حليق الرأس إلى الخارج، توقفت للحظة التفتت خلالها نحو الرجل وراءنا ونظرت إليه، تحدثني نفسي عن شيء أرغب في الإدلاء به.

– ممكن طلب أخير يا دكتور؟

خرجت العبارة مني فأطل عليها بنظرة المتسائلة.

– عايزك تحضر معايا الاجتماع ده.

ابتسم، ظل على الوضع للحظة ثم لم يجيني بغير التنفيذ وهو يتحامل على مسند كرسيه للهبوض مشاركاً إيانا الطريق إلى حيث نتجه، جميعنا صامتون، يحمل كل منا للآخر امتناناً خاصاً، وحفنة من الذكريات... قطعنا الطريق عبر المكان متجاوزين الباب الزجاجي المزخرف لمبنى التأهيل، ودلفنا إلى غرفة بعينها مفتوح بابها، وترتص فيها الكراسي على شكل دائري يجلس فوقها أولئك الذين نهضوا احتراماً لحضوره مرحبين، فأشار لهم بيديه أن عودوا، ثم إلى ركن بعيد وحده اتجه متخذاً لنفسه مقعد مستمع.

على كرسي شاغر وسط الحلقة جلست، يجاورني كالعادة عسلية، وعلى الجهة الأخرى احتل وليد مقعده الخاص ملتقطاً من فوق المنضدة الصغيرة أمامه كتاباً أزرق احتواه بين كفيه قبل أن يتهدد للحظة من الصمت، ويبدأ:

– زمالة المدمنين المجهولين مجموعة المصححة، أهلاً بيكو في اجتماعاتنا واجتماعنا غير رسمي منتظم، أنا اسمي وليد، مدمن بدير اجتماع النهار ده عشان أنا مبطل ومشربتش خمرة ولا مخدرات.

ليصح هتاف الترحيب المعتاد بأصواتنا جميعاً.

– هنبتدي اجتماعنا بلحظات سكون نفتكر كنا فين وبقينا فين وندعي لكل مدمن بيعاني داخل وخارج المكان.

أغلق الجمع كالعادة أعينهم، إلا أنا، ظلت عيناى معلقة بوجوههم جميعاً، كنت أبتسم مستشعراً ذلك التغيير الذي لامسته في روحي، ممتناً له، ولكونهم سبباً من أسباب حدوثه، لحظات من التأمل منحها للجميع قبل أن يعاود حديثه:

– شكراً يا جماعة، قبل ما نبدأ اجتماعنا النهار ده بس هندي مهلة للاحتفالات والأفكار المسيطرة.

لأجلي قال عبارته تلك، بات جلياً ذلك في ابتسامته التي اتسعت، وتلك الغمزة التي منحني إياها وهو يتساءل بنبرة فخورة:

– في حد هنا تم تسعين يوم تعافى؟

أنا المقصود هنا، وهذا هو يومي المنشود، الكل من حولي يترقب، خلفي الدكتور إبراهيم، وإلى جوارى عسلىة الذي حملت أنفاسه المسموعة لي كثيراً من الإيجابية، ومن حولي الزملاء جميعهم، نظراتهم لي كبطل في يوم انتصاره تلهمني، وتثقلني في ذات الوقت، بكف

رفعته مرتبًا أمامهم، وعقل تجمعت أسراره كلها فوق لسان مرتبك
قرر التصريح أخيرًا بكل الحقيقة، فأدليت:

– قبل ما أبدأ كلامي بس معاكو في سر أخير كنت شايله
لليوم ده، تحفظ جوايا خبيته لمدة تسعين يوم، ووجه الوقت
المناسب عشان كلكو تعرفوه.

درت بنظري بعد العبارة في وجوههم ثم أكملت:

– أنا ياسين، ياسين جلال عبد العزيز، مدمن.

الفصل الأخير

«طير صغير أزرق لم يكن حرًّا كما ظن»

لحظتها أدركت كل شيء، امتلك عقلي وعيه الكامل حين رأيتهما،
أهدتني صدمة كانت البداية لانحراف بمسار تفكيري كله.

إيما، تلك التي لم أكن أعرف حتى اسمها، فتاة البناية المقابلة،
والصورة المتجسدة لوهم صنعته، تصنع الوحدة حولنا أشباحًا،
كانت هي إحداهن، قبعت هنالك دومًا بوجهها البض المبتسم،
وشعرها الحريري الأسود المتطاير.

اعتدت مراقبتها اختلاسًا من خلف نافذتي وهي تسقي نبتة
الصبار الصغيرة على حافة شرفتها كل صباح، تخيلت أحاديثًا بيننا
تُحكى، وضحكات على امتداد المسافة الفاصلة تتناثر، كانت هي
الملاذ الأوحده، والملاك الأنقى الذي لا أخجل مشاركته في أحلامي
كل أحاديث الهم والفرح، كنت وحيدًا، وحيدًا قدر ما عانيت لإرضاء
الجميع، وحيدًا ملء نظراتهم المتعشمة، وعقولهم الطامحة دومًا
لمزيد من الأخذ.

أنا ياسين، الابن الذي حكمت عليه دقائق ثلاث سبقت خروجه

للحياة قبل أخيه بأن يكون الأكبر، ذلك المعتمد عليه في كل شيء، ولا يسمح له بخطأ أو زلة أو حياد، الثابت دومًا برغم انهيار ما حوله، الآن أستعيد إدراكي، وأفهم لم بدت لي الأمور غريبة في بدايتها حين استفتت من غيبوتي لأجدي داخل ذلك المكان الرطب المغلق بالمصحة، أفهم صلة النوافذ بانقباض بات يصيب قلبي، وأدرك أن صورتها لم تكن محض خيال اصطنعتة كما خُيل لي.

«إنت هنا في مصحة تأهيل»... «طبيعي الي إنت فيه ده عشان الفترة الي قضيتها غايب عن الوعي بعد الحادثة»... «اسمه شريف، قاللي كدا الدكتور من شوية وأنا عنده»... كشريط مسحوب من الذكريات في رأسي انهمرت الكلمات، بينما صرير الباب المفتوح من خلفي يعلن عن دخول أُمي، لم ألتفت نحوها، لم تستشعر هي حتى إدراكي لاقترابها إلا من تمتمة خرجت من بين شفتي المرتعشتين:

– اللي في الصالة ده كان عزا أخويا، صح كدا؟

ربتت بيدها على ظهري وهي تنطق اسمي بصوت خفيض
متحشرج:

– ياسين.

شعرت بارتجافة جسدي مع لمسها فاستعادت يدها كرد فعل
عكسي قبل أن ترتعش نبرة صوتها وهي تسألني:

– مالك يا ياسين؟ إنت خايف مني؟

وعلى نفس وضعي دون أن أحرك منه ساكنًا جاوبتها بسؤال حمل
في خروجه من قلبي كل نبرات اللوم:

– كنتي عارفة إن أنا اللي مسافر المرادي مش هو، صح كدا؟

سكتت منعقد في لسانها الرد، فاجأها اكتشافي للأمر بمثل تلك
الطريقة التي لم تكن في استعداد لمواجهةها، لم أحاول الكذب هذه
المرة، ولم أكن لأقبله، فاض كيل المرضاة بداخلي فصرحت:

– ليه عملي كده؟

كنت أغالب عبراتي بصعوبة، إلا أن واحدة منهن اندرفت جارية
فوق وجنتي محملة بشعور مختلط بين الوجد وإحساس الضياع.

– عشان متضيعش انت كمان مني.

بصوت انتحاب نطقت بها، شعرت بدفقات الضعف التي امتلأت
بها كل خلية من خلاياها وهي تتابع:

– عشان متروحش زي ما راح أخوك، وتسيبوني هنا لوحدي،
بعد ما كل حاجة في الدنيا سابتي.

ندت من بين شفتي ضحكة ألم متهكمة وأنا أتمتم:

– وهو أنا إيه اللي فاضل مني دلوقتي عشان ميسيبكيش؟

ياسين المخدوع اللي عاش بمزاج اللي حواليه لحد ما اتأخذت منه
في الآخر كل حاجة؟ وللا شريف اللي مات وقتيلهم هناك في المصححة
إنه لسه عايش، عشان أفضل قدام الناس كلها مجرد سر، عايش

برضو بمزاج حد شايف إن الحب مجرد امتلاك؟

أجبرتني على الالتفات نحوها لتتلاقى أعيننا وهي تحيط بكفيمها
رأسي ناظرة لي بعينين محمرتين ونبرة تهدجت من فرط البكاء:

– بلاش تقول كدا يا ياسين، بلاش تقول كدا يا حبيبي، دانا
معادش ليا في الدنيا دي حد غيرك، متتغيرش إنت كمان،
أرجوك، بلاش تتغير.

لم تطرف عيناى أمامها، وكأن مشاعري كلها سلبت مني في لحظة،
كنت أراها كالقدر أمامي يعاتبني على اختياراته.

– أنا مكنتش حمل خيانة أبوك، بس أما سيبته وخذتكوا معايا
بقيتوا العكازين اللي بتعكز عليهم عشان أفضل واقفة، إنت
متتصورش أد إيه سفر أخوك الله يرحمه حسسني بعجز،
حسسني بأني طرف خسران ضعيف، ممكن أبسط ريح بسهولة
تدمره، وتخلي كل اللي استنوا اللحظة دي يدوسو عليه.

خبيت ده كله ورا كلمة عادي اللي قلمهاله، بس من جوة أنا كنت
موت، وطول ما هو عنده هناك كنت بسأل نفسي: إزاي اللي
يخون هو اللي يكسب في الآخر كل حاجة؟ إزاي أبقي بعد اللي
عملته ده كله الوحيدة المجني عليها؟

لم أكن أتحاشى النظر في عينها، كنت أتحاشى الماضي المطل
منهما أمامي كئيبًا موحشًا كظلمة الحجرة التي احتوتنا، بينما هي لا
ترى من فرط دموعها نظراتي تستطرد:

– عشان كدا أما رجع، مهمنيش أي شيء غير إنه يفضل، مهمنيش غير إني أرجع متعكزة بوجودكوا إنتوا الاتنين من ثاني، مهما كان الوضع، ومهما كان اللي هيتعمل في سبيل ده إيه.
– بس احنا مش عكازين للأسف يا أمي، احنا بني آدمين.

تمتمت لها بالكلمة فانخفضت عيناها مطرقة، ودموعها ما زالت منهمة تثقل أنفاسها وتمنح نبرتها الكثير من الأسى:

– لو عرف إنك عايش كان هياخدك، عشان إنت اللي كان مستنيه يروحله يومها، لو عرف إنك عايش كان هيلومي على موت شريف بحجة إنها الأمانة اللي أنا مقدرتش برغم تحذيراته أحافظ عليها، وأنا مكانش ينفع أبدًا أسمح بده، مكنتش هقدر أبدًا أستحمله، كفاية عليا كسرة واحد، كسرة تانية معناها موت.

مال طرف شفتي لقولها، لم أكن لأقسو عليها، بيد أن الماضي بتفاصيله التي استرجعها عقلي كانت على نفسي أشد قساوة، وباتت معها نظرتي للأمور أشد وضوحًا وأنا أنبس:

– شريف كان عنده حق يا أمي للأسف، شريف فعلاً كان عنده حق.

قبل تسعين يومًا فقط.

داخل السيارة المنطلقة بنا في طريقها نحو المطار جلست

يجاورني من أمام المقود شريف، يطل كل منا نحو الآخر بين الحين والآخر مترقبين أينما يبدأ جملته الأولى، يبدو الشرود جليًا على وجهي، وازرقاق أسفل عينيه بات واضحًا مع نحوله الشديد، سبقني هو بعد برهة من الصمت بها متممًا:

– مرتاح يا ياسين لقرار السفر ده؟

بهزة كتف لم أرغب أن يكشف زيف لامبالاتي فيها أحبته:

– شايف إني محتاج أعمل كده.

تابع الطريق أمامه وهو يقول:

– الموضوع مش بالشوف يا أخويا، الموضوع إحساس، إنت حاسس أن ده الأحسن ليك وللا؟

تأففت مشيخًا بوجهي بعيدًا عنه تجاه نافذتي المجاورة وأنا أهتف حانقًا على تضييقه الخناق بأسئلته حول روجي:

– إنت عايز إيه دلوقتي يا شريف؟ إحنا مش اتكلمنا في الموضوع ده ألف مرة قبل كدا؟ وبعدين ما انت وافقت عالاتفاق ده معايا من الأول.

– أنا مكسي إني أبعد، وانت مكسبك إنك تفضل هنا مع أمك وتعيش حياتك براحتك بعيد عن سيطرة أبوك اللي أكيد مستنيك المرادي بخطط تقييد ووعد بجولة ما بين المصحات ودكاترة الإدمان، عمال بتعيد وتزيد في الكلام تاني ليه دلوقتي؟

رمى انفعالي بنظرة لا مبالية، وهو يلوك قطعة لادن في فمه تفلها عبر نافذته على الأسفلت المتآكل من تحتنا بإطارات السيارة المنطلقة فوقه ثم باقتضاب قال:

– عشان أمك عارفة دلوقتي أن إنت اللي مسافر مش أنا.

أدرت نحوه رأسي بحركة حادة فرفع كفاً أمامي مستدرجاً:

– متبصيليش، أنا مقلتلهاش حاجة، هي عرفت لوحدها.

امتلكني الاضطراب وأنا أنظر إليه مطالباً منه التوضيح فتابع:

– امبارح وأنا راجع البيت بليل شفتها بتقلب في شنط السفر اللي المفروض إنها بتاعتي، وانت شايل جواها الباسبور فأكيد شافته.

سألته:

– وقالتك حاجة؟

– توء.

أصدر بغمه الصوت وهو يهز رأسه نافيةً فعقدت حاجبائي وأنا أتمتم مرتبجاً:

– تبقى معرفتش، مش شرط يعني تكون شافت الباسبور.

التقط نفساً عميقاً من الهواء وهو يؤكد:

– لأ شافته، وبعدين مش دي المشكلة عموماً ما هي كدا كدا،

كت هتعرف لما تلاقيني أنا اللي راجعلها كمان ساعتين.

زادني أسلوبه الغامض حنقًا فصحت به:

– طب إنت بتأكد منين إنها عرفت؟

مال نحوي يرمقني بنظرة جانبية، وعينه لا تزالان على الطريق أمامه قائلاً:

– من عينها النهار ده وهي بتسلم علينا.

لم أستوعب ما يقصده فاستطرد:

– مش فاهمني، طيب، خليني أستلف سؤال قلتهولي بنفسك من مدة جايز تفهم: «ليه مستهون بمشاعر كل الناس اللي بتحبك؟».

رمقته بنظرة تهكم وأنا أرد:

– وخليني أنا المرادي أكرر ردك عليا ساعتها، عشان مفيش حد أساسًا بيحبني يا شريف.

بشيء من امتعاض لوح بيده الحرة لي مغمغماً:

– متخلطش الأوراق يا ياسين وترد ردود مش لايقة عليك، السؤال أصلاً مش واحد، والوضع المرادي مختلف.

أنا مش زيك بقيس الحب على تصرفات الناس وطريقتهم في التعامل أو من اللي باين منهم، أنا بحسه في عيونهم، ولما أقولك

النهار ده أن أمك بتحبك بجد وسفرك حقيقي فارق معاها يبقى بقولها لك وأنا متأكد ومن منطلق إنك لازم تعرف ده أيا كان.

أمك النهار ده كان في عنينا حزن كبير عليك، فاعمل حساب ده عشان متجيش تحس بخنقة هناك بعد ما تكون فعليًا خدت القرار.

تمتت محاولاً اعتراضه:

– طب ما نفس الحزن ده كان في عنينا يوم مانيت سافرت، وأنا قلتك عليه برضو، وبرضو عملت اللي في دماغك واستمرت في السكة اللي إنت عايز تمشي فيها.

مرة أخرى هز رأسه بالنفي ثم قال:

– غلط، ده مش زي دا، حزننا اللي في الأول مكانش عليا أنا كشريف، كان على إنها خسرت مصدر قوة بتنتقم بيه من أبونا اللي سابها زمان واتجوز عليها واحدة تانية.

زفرت في اختناق وأنا أهتف:

– وياه اللي يخلي سبب الحزن النهار ده مختلف؟ ما يجوز يابو الإحساس هو هو.

بنظرة جانبية أخرى رمقني وهو يقول:

– متريش عليا عشان أنا فاهم في الحجات دي أكثر منك بحكم خبرتي في الناس، وسيبك من كتب علم النفس اللي بتحب تقرا

فيما دي عشان مش هتبينلك أبدأ الفرق ما بين حب الامتلاك الناتج عن أنانية أو رغبة انتقام، وبين الحب الحقيقي الخالص اللي ملوش فعلاً غرض تاني.

إنت أمك بتحبك يا ياسين، بتحبك لشخصك ولكينونتك، مش لمجرد بس أن إنت ابنها، بس يمكن عشان طبيعتك الهادية من زمان، أو عشان إنت الوحيد اللي عمرك ما خذلتها أو اتخلت عنها زي ما بقيت الناس عملوا.

كانت كلماته تعتصر قلبي اعتصارًا في ذلك الوقت، شعرت ببرودة انقباضها عليه وعلى أوجاعي الكامنة فيه.

– لا، لا تحاولوا التأثير علي، بالله عليكم دعوني، دعوني أمتلك لمرّة واحدة قرارى حتى وإن كنت مخطئًا فيه، دعوني أنزع قيودكم الملتفة حول عنقي ولو لمرّة واحدة حتى أشعر بقليل من الحرية، ثم أصدروا بعدها الحكم بإعدامى وأهبلوا على التراب، أحتاج إلى هواء غير هوائكم الملبد بسحب ظروفكم وخياراتكم ووجهات نظركم، أحتاج لأن أكون حرًا بالمعنى الحقيقى للحرية، لا بمعناها السطحي المرتبط فقط برضاكم والمتعلق دومًا بأحاسيسكم وردود أفعالكم تجاه اختيارى.

بنبرة محتدة أخبرته محاولاً تغليظ قلبي:

– حتى ولو، إيه يعنى؟ ما كل حاجة بتنسى، هيا يعنى كانت ماتت لما أبونا ساءها؟ وللاكت كرهتك أو غيرت تعاملها معاك بعد كل اللي عملته سواء بسفرك أو بإدمانك للمخدرات اللي

بتعاطاها دي؟ بالعكس، ده إنت بقيت واخد حقوقك بعد ده كله أكثر مني.

ثم استحل البكاء نبرتي وأنا أتابع بانفعال:

– ده حتى يا أخي البننت اللي أنا بحبها، لما خطفتها مني قصاد عنيا ملقيتش إيد فيكوا تططبب، محدش حس أصلاً، لأ وإيه؟ راحت تاني يوم على طول تخطيالك، كإنك قديس، مفترض اللي تشاور عليه بس بدون أي تفكير يتحققك، عايزني أنا ليه اللي أبقى على طول حاسس وعامل حسايي وواخد بالي؟ ياخي يلعن أبو الناس كلها.

نطقها بالقهر الخالص في قلبي لكل شيء، وشعر هو بالتأثر حيالي فزاد من سرعة السيارة وهو يغلق عينيه للحظة قبل أن يفتحهما مغمغماً:

– يابني متضحكش على نفسك، متصبش روحك في قالب الضحية اللي هيخليك عايش طول عمرك في وهم كبير.

قالها ثم استطرد بصوت عالٍ مع إشارات يديه وكأنما يحاور الطريق:

– إنت مش فاهم، وبتحكم عالواقع بمنظور غلط.

– مين اللي فهمك أن أمك بتعاملني كقديس؟ يا غبي. أنا أمك بتقايض عليا في انتقامها من أبوك، بتميل لي كفة اختيارها هي عن اختياره، عشان متحسش إنه كسب منها حاجة، ومش من

منطلق حيي لأ، دي عايزاني أفضل حتى ولو مستمر في إدماني،
منا قلتلك هيا كت زعلانة من إيه...

ولو عايز دليل أوضح بص لتراييزة الصالة اللي بقت على طول
بتسيب حقن دواها والفلوس فوقها، بالرغم من أن أبوك أنا
سامعه وهو في التليفون قبل رجوعي بيحذرنا من الأماكن
والأشخاص والأدوات لأن ده خطر علينا زي ما الدكاترة هناك
نصحوه، وإن الحججات دي خطوة أولى بالنسبالي بتحفز فكرة
التعاطي في عقلي.

سكت للحظة ملتقطاً أنفاسه قبل أن يكمل:

– وبالنسبة لإيما اوعى يتيألك إني مكنتش واخد بالي من
تتنحك طول اليوم في الشباك عليها، بس أنا حبيت بالطريقة
أفوك، وأعرفك أن الناس مش ملايكة زي مانت شايفهم،
البت فاضية وقالت تجيبك بالنظرات، وحيدة بقي وعايزة
اللي يسندها في غربتها بأي طريقة حتى ولو شمال، يا راجل دي
مخدتش في إيدي غلوة وكنت معاها في الشقة.

قالها قبل أن ينفجر ضاحكاً على نحو أربكني ليكمل من جديد:

– وسيادتك عايش في عالم حالم أوي، مصدق حدوتة كيوبيد
اللي واقف في السما مستني يرشق سهم الحب لا مؤاخذة ف...
فعيونكو.

دا أنا أتحداك يا ياسين إنك معرفتش اسمها أساساً غير لما
أنا قلتها، هايم بس مع النظرات والابتسامات اللي كت

بتبعتهالك، بت شمال وبتشتغل أخويا، إيه؟ أسيبها؟ وأنا في الآخر بتسلى، لا بحبها، ولا هتجوزها، ولا أي حاجة.

الغرض الأساسي كان في الدرس اللي اتمنيت إنه يوصل لك، لما تشوف ملاكك المصون سهلة في حضن واحد تاني، وتعرف أن اللي انت معيش نفسك فيه ناحيتها ده مش حب، إنما مجرد احتياج بتملئ بيه فراغك النفسي مش أكثر.

كشلال من الحمام الملهبة فوق رأسي كانت كلماته، كل خلية في كياني كانت تستصرخه أن اصمت، كفاك تدميرًا لكل الحقائق التي اعتنقتها، كفاك هدمًا لكل الأساسات، خرجت بصوت كالسقوط كلماتي وأنا أتمتم بمرارة:

– كفاية بقى، كفاية، أنا مش عايز أعيش في بير القرف ده.

مد يده مرتبًا فوق قدمي، وبلهجة كانت صادقة حينها قال:

– مفيش حب بيتولد من بعيد لبعيد، متزعلش متي يا ياسين، أنا مش عايز بكلامي ده أضايقك، أنا عايزك بس تبطل تبص للحياة بعينك، من غير ما تدي اعتبار لعقلك ولا إحساسك إنهم يوجهوك.

أشحت بوجهي بعيدًا مرةً أخرى عنه مندفعًا في ألهي وتركته يتابع:

– متعملش زي الناس اللي شايفة من بعيد إنك بتجيب أفضاص الطيور وبتربيهما من منطلق الحب، أنا وانت اللي عارفين بس إنك مبتعملش كدا غير متعة في حبسها وتقييد حريتها بسبب

عقدة زمان، وقصا ده أنا كل ما هشوفك قفص، هطير كل
عقدك المحبوسة فيه... فاهمني يا ياسين؟ كل عقدك!

للحظات ربما اقتربت من تخطي دقيقة كاملة، ظلت أعينهم
معلقة بي، دكتور إبراهيم، كابتن وليد، عسلية، وكل من احتوتهم معي
مساحة الغرفة، جميعاً أطلت من نظراتهم الدهشة، وعقولهم ترفض
التصديق، بدو أمامي كتماثيل جامدة نُحِتت من صدمة، اختبرت
شعوراً كهذا قبلاً، بل إنني لم أعهد ربما في نهاية كل طريقي الماضية
شعوراً غيره: الوهم.

إدراكك فجأة أن كل ما تراه ليس سوى صورة من زيف صنعها
عقلك، لم أطل عليهم في صمتي، وبدا لهم صوتي كأنما ينبعث من باطن
عقولهم المزدحمة بأكوام الأكاذيب وأنا أبدأ في خوض الحكاية لهم من
مشهدا الأول.

من هناك، داخل إحدى الشوارع الجانبية المحفوفة بالأشجار،
في سيارة مستعملة قديمة الطراز طفل لم يتجاوز بعد السابعة من
عمره، يحتويه المقعد الخلفي وبجواره شقيقه التوأم يبكي، لا تطل
عيناه غير جزء من كتف والده الجالس أمامه، وأطراف أصابعه تلك
التي كان ينقر بها في رتابة وعصبية فوق إطار المقود، تهرب من رؤية
تلك الكراهية المنبعثة في عين أمه، تهرب من أن يفهم، أو يسمع أي
شيء، لكنه مع كل الأسف فعل، كنت أتكلم وكأني أرى المشهد أمامي
متجسداً برغم سنوات مرت عليه، أذكر أنفاسي المختنقة اضطراباً
وخوفاً، النقاش المحتد فيما بينهما، وكلماتهما التي تعلن نهاية كنت

أخشاها، وإن كنت حينها لا أعلم حقًا ما تودي إليه.

– بلاش يا وداد نكمل عالغلط بغلطة أكبر منه، مش إحنا لوحدنا اللي هندفع التمن، متحملنيش ذنب اختيار مفكرتش يوم ما اختارته إلا في نفسك.

– أنا مفيش حاجة هتغير رأيي يا جلال، طلقني.

تلك اللوحة الخشبية الصغيرة، المعلقة في مدخل البناية المجاورة لي تحمل عبارة لا أفهم معناها: (مأذون شرعي)، سرحت هروبًا منها في استهزاء حروفها عبر زجاج نافذتي المغلق، والذي صنعت أنفاسي المتوترة فوقه هالة من البخار، الشارع بسيط هادئ، تلقي الأشجار فيه ظلالها فوق الأرض وعلى وجهي، وتتخلل أوراقها خيوطًا من أشعة الشمس.

هبط كلاهما من السيارة مغلقين الأبواب وراءهما، ليختفيا أمامي في مدخل البناية، وليمتلكني أنا المزيد من الاختناق، أجفلي ذلك الصوت الذي علا فجأة من خلفي فاستدرت برأسي تجاهه، عصفور أزرق اللون، لم أر شيئًا يمثل روعته في حياتي، حط على الجزء الخلفي من السيارة مداعبًا بمنقاره جناحيه قبل أن يحلق بهما من جديد.

تابعته ببصري وهو يحوم في الأرجاء من حولي قاطعًا سلاسل الشمس الذهبية، يهبط فوق الأسفلت ملامسًا الأرض بقدميه متقافزًا فوقها يخطو نحو شيء ما التقطه ثم ارتفع مختفيًا عند آخر مدى لرؤيتي في السماء.

– حسدته ساعتها، كنت حاسس إنني محبوس جوة قفص كبير

عالأرض، مش قادر أتنفس حياتي، وهو حر، منطلق، العالم كله مفتوح من حواليه، اتمنيت أكون مكانه، طائر، مفيش حواليا إطار ولا عالم أو حدود...

قطعت الحديث ملتقطا أنفاسي، أرصد نظراتهم التي غابت بين تفاصيلي وأنا أستطرد:

– لما أبويا وأمي انفصلوا، أنا وشريف اتفاجئنا بإن كل حاجة اتغيرت... الدنيا كأنها بقت أضيق، حتى حضن أمي مبقاش فيه نفس مساحة الدفا بتاع زمان، بقت عصبية في أغلب الوقت، وهو كان بيجيلنا زيارات من فترة للتانية كضيف مش أكثر، مع كل سنة بتمر عليا كبرت فيها كنت بحس الدنيا بتصغر، انهمرت أحلامي أمامي في تلك اللحظة كمطر من بلورات ظلت تتهشم على الأرض في خيالي واحدة تلو أخرى: الحب، الحرية، وطير صغير برغم جماله رأيته لعنة، بت أفرغها على كل طير سواه... عشت وحيداً داخل قوقعة من عدم الرضا، منعزلاً في ذاتي عن الآخرين، ألعب الأدوار كما كُلفت بها، لا كما أريد...

تخرج الكلمات من بين شفتي كما كنت أسمعها، وكما كانت تُقال: «إنت الكبير يا ياسين لازم تكون عاقل»، «إنت راجل يا ياسين لازم تسندني»، «إنت شاطر يا ياسين، لازم تطلع الحاجة اللي إحنا عايزين نشوفها»...

مفضليش مساحة أقدر أتنفس فيها غير أوضتي الصغيرة اللي اتبقى منها سرير فاضي بعد سفر أخويا، مع شوية كتب، وقفص صغير بفرغ جزء من كبتي في عصافيري اللي حابسها

جواه، جنب شباك بيطل على بنت صنعت من وجودها طموح ساذج ليا، طلع في الآخر سراب برضو، زي كل الحاجات الثانية اللي جريت وراها: مجرد وهم.

هل كانت دموعًا تلك المتجمعة فوق أعينهم؟ أم إنه التماع في عيني أنا رأيت به الأشياء؟ لا فارق. سأواصل الكلام دون اعتبار لشيء من حولي:

– شريف أخويا مرة قاللي إن الحقيقة مش شرط تكون هيا الحاجة اللي شايفينها بعيوننا. عشان الحقيقة تعريف لشيء أعمق من ده بكتير. بيتقاس بميزان أحاسيسنا وشعورنا تجاه الناس اللي بنقابلهم. والحاجات اللي بيعملوها.

التقطت من الهواء نفسًا عميقًا آخر، ثم أكملت:

– وأما جيت هنا، اتعلمت أن إرضاء الآخرين مبينديش غير صاحبه، وإن الخطوة الأولى في بداية أي طريق جديد هي البعد عن الأماكن والأدوات والأشخاص اللي أذونا نفسيًا، واللي حاولنا كثير نغيرهم ومقدرناش، لأن زي ما واحدة من قواعدنا الأساسية بتقول: إن من حماقة والجنون تكرار نفس الأخطاء، وتوقع نتائج مختلفة.

التقت عيني بعين عسلية في تلك اللحظة، هذا الرفيق الذي أمست تشعرني ملامحه بالراحة، ابتسمت له امتنانًا بينما لحديتي أوصل:

– يمكن الصدفة هي اللي جابتني بسبب حقنة مخدر خطفتها من جيب أخويا عشان أهرب بيها من الدنيا في يوم الحادثة،

بس من أول اجتماع حضرته معاكوا هنا، شفت أسلوب جديد
للتحرر، وفهمت حقيقي معنى الحرية، الحرية اللي بجد، حرية
الاعتراف والتصالح النفسي اللي بين كل واحد فيكو ونفسه.

قبل أن أستدير برأسي نحو الدكتور إبراهيم الجالس ورائي وعلى
محياه نظرة خاصة مزجت بين حفنة من المشاعر وأنا أستمر:

– وفي اليوم اللي خرجت فيه، اكتشفت إن شريف الله يرحمه
كان صح، أنا كنت مغمي قلبي بنفس العين اللي بشوف بيها،
عشان كدا رجعت...

لحظة صمت، تدور عيني خلالها في أركان المكان، أملاًها بكل
تفاصيله، بكل الوجوه، بكل المشاعر، ثم أتابع سارداً للحكاية نهايتها:

– إنتوا علمتوني هنا إزاي أكون حقيقي، وعرفتوني قد إيه
التحفظات ممكن تسلبنا فعلاً كل قيمة حلوة في الحياة.

أنا ياسين مدمن كل الوهم والأكاذيب اللي كان عايش فيها،
وبقائه النهار ده تسعين يوم متعافي بسببكم، فشكراً لكل
الأقدار التي جمعتي بكم، وآسف لو كنت طولت.

أنهيت الحديث فصمتت، وسكن المكان بأكمله إلا من صوت
الأنفاس التي امتلأت بها الصدور، قبل أن يرتج بتصفيق طويل هادر،
علاصوته فوق كل الأصوات وبمتمتى القوة.

ها أنذا وقد أدركت أن ما يربطنا بفلك الكون خيط لا يُرى،
معقود طرفه في الأقدار، وله بين أيدينا طرف آخر، يمكننا بقدر من

الإيمان، من الرضا، ومن الحب تقبله...

اللهم امنحني السكينة لتقبل الأشياء التي لا أستطيع تغييرها،
والشجاعة لتغيير الأشياء التي أستطيع تغييرها،


والحكمة

لمعرفة الفرق بينهما.

رامي أحمد

2018/1/24

كما نثق بكتابنا نثق بصوتك / هنا نصغي إليك!



الصالحة للنشر والتوزيع

AL HALA PUBLISHING & DISTRIBUTION



تواصل معنا، ونحن نسمعك!

<https://www.facebook.com/alhalapublishing>

info@alhalapublishing.com

